




Ex Libris



PROFESSOR J. S. WILL



Library
of the
University of Toronto



2343

v. Chermouza = 2312

Wagon 340
~~Wagon~~
Wagon 800

Digitized by the Internet Archive
in 2011 with funding from
University of Toronto



RECUEIL

DES OEUVRES

DE FEV BONAVENTURE

DES PE-

RIERS,

*

*Vallet de Chambre de Treschrestienne Prin-
cesse Marguerite de France, Royné
de Nauarre.*



A LYON,
Par Ican de Tournes.

1544.

Avec Priuilege.



A TRESILLV

STRE PRINCESSE

MARGVERITE DE

FRANCE ROY-

NE DE NA-

VARRE.

ANTOINE DV

MOVLIN S.

*



YANT ouy plusieurs
fois dire à Bonauentu-
re des Periers, peu de
moys auant son tres-
pas, Que son intention
estoit que vous, tresil-
lustre Royne, fussiez
heritiere des siens pe-
tiz labeurs : lesquelz

il ne doubtoit point que ne acceptissiez de celle prom-
pte voluté, que vous auez faict les œuures de maints
autres, qui n'ont pensé mieulx employer ailleurs les
fruietz de leurs engins. Mais estant aduenu en la
personne dudict Bonaenture l'effaict du prouerbe
commun, qui dit : Que l'homme propose, & Dieu
dispose. Mort implacable, implacable Mort l'a sur-

* 2 prins

prins au cours de sa bonne intention, lors qu'il estoit apres à dresser & à mettre en ordre ses compositions, pour les vous offrir & donner, luy viuant. Il n'a donques peu veoir l'effaiect de ses ardens vœux accompli, tresillustre Dame: Et ce certes i'estime vne tresgrande perte & dommaige au monde, de n'auoir point eu, iusques icy, la lecture de si diuines conceptions. Et quant à moy, de tant que i'ay esté de ses plus intimes & familiers amys, les yeux de mon cueur en larmoyant largement toutesfois & quantes (& ce aduient tressouuent) que la recordation du Deffunct me passe par la memoire: voire tant me remplit elle de desirs, reuocans coup à coup l'Amy trespasé en vie, que ie suis presentement forcé pour ma consolation, & de ceulx qui ont esté ses amys, de mettre en lumiere ses elegans & beaulx escriptz, reliques vrayment sacrees (comme lon pourroit dire) & tirees du Buste & feu de leur Seigneur. En quoy faisant, tresillustre Royne, ie donne refrigerere à mon ame, & quant & quant ie satisfais aux suppresmes intentions de vostre Seruiteur: en vous signifiant & declairant heritiere vniuerselle des petitz biens par luy delaissez: lesquels eussent (s'il eust vescu plus longuement) neantmoins estez de bien plus grande estime: parce mesmement qu'il les eust mis en leur entiere perfection, & grace: puis, à la
mode

mode des autres, en eust posée la liste & roolle en
l'Arc d'Eternité, vostre Temple, en la veüe des hom-
mes, & hors neantmoins à iamais du danger & ca-
lumnies de l'Enuie: laquelle n'adresse ses pas ou elle
entend que vostre haulte Vertu seigneurie: ou elle
congnoist la force de voz rempars, & ou elle sent,
tant soit peu, l'odeur de ces vertuz & excellences
vostres, desquelles est embelly & orné le Monde.
Receuez donques, tresillustre Royne, la belle presen-
te hoirie telle qu'elle est, & ne prenez garde si elle
n'y est toute entiere: puis que ce n'est par le larcin
d'autre, que de l'enuieuse Mort, qui encores taschoit
(si ie ne fusse) d'enseuelir en eternal oubly les œuures
avec le corps. Car i'espere qu'a vostre faueur nous
recouurerons encores partie de ces nobles reliques,
desquelles aussi (à ce que i'ay ouy dire au Deffunct)
auez bonne quantité riere vous: & partie en y ha
d'un mien congneu à Montpellier. Si mes desirs
en ce sortent effect, les aura le Monde as-
sez prochainement: Et de ce Dieu le
createur, & vous tresillustre
Royne, me donnent la gra
ce. De Lyon ce
dernier iour
d'Aoust.

M. D. XLIIII.


The first part of the document is a list of names and titles, including "The Earl of Arundel", "The Earl of Surrey", "The Earl of Devon", and "The Earl of Devonshire". These names are followed by various titles and descriptions, such as "Knight of the Garter", "Baron of the Exchequer", and "Clerk of the Council". The list continues with several more names, including "The Earl of Pembroke" and "The Earl of Montgomery".

The second part of the document is a list of names and titles, including "The Earl of Kent", "The Earl of Lincoln", "The Earl of Northumberland", and "The Earl of Norfolk". These names are followed by various titles and descriptions, such as "Knight of the Garter", "Baron of the Exchequer", and "Clerk of the Council". The list continues with several more names, including "The Earl of Devon" and "The Earl of Devonshire".

VOEV.

CE NATVREL ESPRIT QVEL QVIL
SOIT, QVE LA BONTE' DE DIEV A
OTTROYE' A' BONAVENTVRE DES
PERIERS, SOVSTENV DE LA ROY-
ALLE MVNIFICENCE APPENT RE
VEREMMENT CE PETIT VOEV AVX
HONNOREZ PIEDZ DE LA SACREE
IMAIGE DE TRESILLVSTRE MAR-
GVERITE DE VALOIS ROYNE DE
NAVARRE, LE VRAY APPVY ET EN-
TRETENEMENT DES VERTVS.

Ca part



L E

DISCOVRS

DE LA QVESTTE

D'AMYTIE,

DICT,

LYSIS DE PLATON.



Enuoyé à la Roynne de
Nauarre.

Socrates racompte les propos que luy, Hippothales, Ctesippe, Menexene, & Lysis, eurent ensemble. Et dict ainsi,



L'ALLOYE vn iour de Lacademie droict au Lyceon, par le faubourg, le long des murailles. Et quand ie fuz au droict de la porte, à la fontaine Panopis, ie rencontray Hippothales le filz de Hieronyme, & Ctesippe Peaneen avec plusieurs autres ieunes Enfans. De tant loing que Hippothales me veit, O Socrates, dist il, dont est la venue, & ou allez vous maintenant? Ie viens, dis ie, de Lacademie, & m'en vois droict au Lyceon. Alors il me dist: Si donc il vous plaisoit adresser vostre chemin par deuers nous, & vous reposer vn petit, vous ne vous tourdriez pas, Socrates, & vrayment vous

le deuez faire. Je le dois faire voyrement, dis ie, mais ou, & chez qui d'entre vous voulez vous que ie voise? Ceans, dist Hippothales, me monstrant vne maison d'exercice & esbat, close de murs, vis à vis des murailles, de laquelle la porte estoit ouuerte. Ceas nous nous esbattons, dist il, & faisons exercice avec plusieurs autres honnestes Enfans. Et à quoy, dis ie, vous esbattex vous? Au ieu de Luitte, nouvellement institué, dist il, & mesmement en disputes, & propos que nous vous communiquerons volentiers. C'est tresbien fait, dis ie: Et qui est vostre Maistre? Vostre Compaignon, dist il, qui dict tant de bien de vous, Miccus. Miccus certes, dis ie, n'est des pires hommes du monde: mais il est merueilleusement Sophiste, & grand causeur. Vous plait il pas me suyure, dist il, à fin de veoir ceulx qui y sont? Je voudroye, dis ie lors, scauoir pour lequel veoir ie y entreroye, & qui est ce tant bel Enfant. Les vns, dist il, y sont beaulx aux vns, & les autres aux autres, Socrates. Mais encores lequel, dis ie, vous semble beau leans? Dictes moy ie vous prie, qui est ce bel Amyaimé. Quand ie veis qu'il ne sonnoit mot, ie luy dis en ceste maniere, O filz de Hieronyme, Hippothales mon amy, il n'est ia besoing que vous me disiez si vous estes Amy-amoureux de quelcun, ou non: car ie suis asseuré, que non seulement vous aymex, mais que vous estes bien

auant

auant en amours. En toutes autres besongnes ie ne
 suis que trop grossier & ignorant : mais en cas d'a-
 mour, i'ay bien ce don de Dieu, que de prime face ie
 congnois ceulx qui ayment. Il ne me respondit rien;
 mais Cresippe print la parolle, & luy dist : Vraye-
 ment vous auez bonne grace, Hippothales, d'ainsi
 faire difficulté de dire le nom de vostre Amy à So-
 crates, lequel, s'il demeure guere icy, sera tout bossu
 & assommé de vous l'ouyr nommer. Certes Socra-
 tes, il ne faict tous les iours autre chose que nous rom-
 pre la teste, & assourdir les oreilles du nom de Lysis.
 Et s'il aduient qu'il soit quelque peu ioyeux deuers le
 soir; il ne se fainct point de nous resueiller pour nous
 faire ouyr & entendre le nom de son amy Lysis. Or
 ne nous ennuyeroit il point de luy en ouyr parler sans
 cesse, encores que la chose soit moult ennuyeuse, s'il ne
 se parforçoit nous matter de tout poinct, & acheuer
 de paindre par la frequenté lecture, ou recit continuel
 de ses beaulx Vers & Epigrammes. Et, qui est bien
 plus ennuyeux, s'il ne nous chantoit ses Amours à
 tant haulte voix comme il peult, laquelle nous som-
 mes contrainctz ouyr & endurer : & maintenant
 il faict du honteux quand vous l'en interrogez. Il
 semble, dis ie, que cestuy Lysis soit encores bien petit;
 par ce qu'à l'ouyr nommer ie ne puis penser qu'il est.
 On l'appelle, dist Cresippe, peu souuent par son nom:

car il porte encores celuy du pere, lequel est homme fort renommé. Et à mon aduis, Socrates, qu'il n'est pas que la beauté d'un tel Enfant ne soit paruenue à vostre congnoissance: car certes il est de si honnestefacon, qu'il n'est possible que par ce seulement tout le monde ne le congnoisse. De qui est il filz, dis ie lors, ie vous prie dictes le moy. C'est, dist Ctesippe, le plus grand des deux Enfans de Democrates Exoneen. Voire? dis ie, & bien Hippothales, soit ainsi qu'ayez acquis vne noble & ferme Amytié, mais monstrez moy aussi un petit, s'il vous plait, voz compositions, comme vous auex faict à ceulx cy, à fin que ie voye si vous scauez les propos qu'un Amy amoureux doit tenir de son Amyaimé, tant à soy mesme qu'à autruy. Cuydez vous, Socrates (dist adonques Hippothales) qu'il faille prendre estime à chose que Ctesippe die? Vouldriez vous dire, dis ie lors, que vous ne aymez celuy qu'il dict? Nenny, dist il, mais ie ne cōpose ny escripts rien d'Amour. Adonques Ctesippe dist: Ie croy qu'il n'est en son bon sens; Socrates, car certes il resue & rassotte. O Hippothales, dis ie, ie ne me soucy pas grandement d'ouyr voz Rithmes ou Chançons, si vous en auex faict quelques vnes de voz Amys: mais ie desirerois entendre de quelle affection vous estes enuers eulx. Ctesippe vous le dira, dist il: car il le scait, & en est assez records, puis que
 ainsi

ainsi est, comme il dict, qu'il en est tout battu de m'en ouyr parler & chanter tous les iours. Voire vrayement, dist Ctesippe, Mais encores y ha bien de quoy rire, Socrates, car pour louer l'esprit de celuy lequel il ayme plus que toutes les choses de ce monde, il ne scait que mectre en auant, sinon ne scay quelz propos qui sont telz que certes vn Enfant auroit honte de les tenir. Il va racomptant par tout les mesmes choses qui se disent communement de Democrates, de Lysis ayeul de l'Enfant, & de tous leurs predecesseurs. Il deuise de leurs cheuances, du train qu'ilz menent, & des prouesses & vaillances qu'ilz ont faictes en Pythos, en Isthmos, & Nemea, tant en chariotz qu'a cheual: ensemble de leurs autres faictz & gestes bien plus antiques que ceulx cy. Encores dernièrement nous recita il, en Vers, vn banquet que vn des Ancestres de Lysis fait vne fois à Hercules estant logé en sa maison, à cause de parenté, pource qu'il estoit aussi filz de Iupiter, & de la fille de ie ne scay quel Prince: & plusieurs autres choses semblables, que les vieilles chantent en filant leurs quenouilles. Voyla, Socrates, ce que tous les iours nous sommes contrainctz d'ouyr en ces comptes & chansons. Que vous estes mocquable Hippothales, dis ie, ains qu'ayez vaincu. vous escriuez, & chantez voz louenges. Est ce de moy, dist il alors, si i'escrrips ou

chante telles choses? Ne l'estimez vous pas? fais ie.
 Comment l'entendez vous, dist il. Comment? dis ie:
 Tous ces escriptz & chansons redondent à vous
 seul: car si vous venez à chef de voz amoureuses
 entreprinſes, telles louenges tourneront toutes à l'bon-
 neur de vous, comme de quelque Triumphateur, par
 ce qu'aurez acquis vn tel Amy. Que si vous n'y po-
 uez attaindre, de tant plus digne serez de mocque-
 rie, comme vous aurez estimé & loué le bien dont
 vous serez forcluz. Quiconques est ſcauant & bien
 expert aux pourchas & acquests d'amytie, iamais
 ne loue aucun de ſes Amys, que premier il ne iouyſſe
 de la familiarité d'iceluy, & ce de peur des inconue-
 niens qui en peuuent enſuyure: car il y en ha plusieurs
 qui de tant plus ſe rendent difficiles, comme ilz ſe
 ſentent priſez & estimez. Il n'y ha rien ſi vray,
 dist il. Quel vous ſembleroit, dis ie, le Veneur qui
 pourſuyuroit la beſte de telle facon, que touſiours il la
 feiſt retirer en ſon fort, dont elle fuſt plus malaiſee à
 prendre? Trop lourd, dist il, & inutile. Rendre aux
 gens, dis ie lors, les courages arrogans & haultrains,
 en lieu de les leur cuyder amollir, eſt ce point faiçt
 d'homme bien ignorant? Ouy ce me ſemble, dist il.
 Or prenez bien garde, fais ie, Hippothales, que ne
 ſoyez de ce reprehensible pour l'ardant friffon de
 Poëſie, dont eſtes eſprins enuers voz Amours. Cer-
 tes ie

tes ie pense que vous ne tiendriez pas celuy pour bon Poëte qui escriroit contre soy mesmes. Non vrayment, dist il, car quelle espece de follie seroit ce? Pour ce, Socrates, veulx ie bien me descouvrir à vous, à celle fin que me doniez, s'il vous plait, quelque meilleur conseil, comment vn Amant peult acquerir la bonne grace de sa partie Aymee. Ce n'est pas chose aisee à dire, dis ie, Hippothales, mais si voulez tant faire que ie puisse parler à vostre Amy aymé, possible que ie vous feray entendre les propos que luy deuez tenir, en lieu des choses que vous allez racomptant & chantant, ainsi que ceulx cy disent. O Socrates, dist il, cela se pourroit bien faire facilement, s'il vous plaisoit venir ceans avec Ctesippe: car vous ne scauriez si tost estre assis & entrer en parolles, qu'il ne vienne vers vous de soy mesmes, comme ie pense, tant est curieux & desirant d'ouyr. Et mesmemēt pource qu'il est au iourd'huy la feste des Mercuriales, que les Enfans font ceans, i'espere qu'il sera de loysir, dont ne fault de venir. Autrement, il est biē familier de Ctesippe à cause de son Nepueu Menexene, le plus grād Compaignon qu'il ayt. Il vous le pourra appeller, s'il ne vient à vous de soy mesmes. Ainsi nous conuiendra il faire, dis ie: Et en prenant Ctesippe par la main ie le suiuy leans, & les autres vindrent apres nous. Quād nous fusmes entrez, nous

trouuaſmes les Enfans ſacrifiants, & les ſacrifices
 preſque paracheuez. Or eſtoient tous ces ieunes En-
 fans bien parez & accouſtrez, & iouoient aux ta-
 bles, aux martres, & aux oſſelets: les vns eſtoient
 hors le porche, les autres au coing du parquet paſſans
 le temps à per ou non, en choyiſſant & tirant des
 iettons de dedans ne ſcay quelles boetelletes: & les
 autres ſe tenoient debout à l'enuiron, qui les regar-
 doient iouer, entre leſquels eſtoit Lysis coronné d'un
 chappeau de Fleurs, lequel Lysis ſurpaſſoit tous les
 autres de Phyſionomie & bonne grace: & n'eſtoit
 point ſeulement beau, mais bien ſembloit eſtre bon &
 honneſte. Nous nous allaſmes ſeoir ſur des ſieges qui
 là eſtoient vis à vis d'eulx. Quoy voyant Lysis ſe re-
 tournoit ſouuent, & iectoit ſes yeux vers nous, com-
 me ayant grand' enuie de s'approcher, mais il auoit
 honte d'y venir tout ſeul. Ce pendant voicy Mene-
 xene qui s'en venoit iouant & mignottant de vers
 le porche: & quand il veit Cteſippe & moy, il s'en
 vint droit ſeoir vers nous. Si toſt donc que Lysis le
 veit venir, il ne faillit à le ſuyure, & s'aſſit aupres
 de luy. Apres leſquels là arriuez, pluſieurs autres y
 vindrent auſſi. Quand Hippothales veit tant de gens
 aſſemblez, il ſe voulut cacher parmi eulx, & ſe re-
 tira en tel endroit ou il penſoit qu'il ne ſeroit apper-
 ceu de Lysis: & ce de peur que ſa veüe & preſen-
 ce ne

ce ne luy fust, peult estre, ennuyeuse: par ainsi il se tenoit illec debout, & escoutoit tous noz propos. Or cōmençay ie à dire ainsi à Menexene: O filz de Demophon, lequel est plus aage de vous deux? Nous ne scauons, dist il. Scauez vous point aussi lequel est le plus noble? Non certes, dist il. Nylequel est le plus beau, & hōneste? De ceste parolle tous deux se soubrirent. Je ne vous demanderay point, dis ie, lequel est le plus riche, car vous estes Amys ensemble, estes pas? Ouy bien fort, dirent ilz. Or sont les biens des Amys, dis ie, tous cōmuns entre eulx, dont en ce n'estes differens si vous faictes ce prouerbe d'amytie auoir lieu en vostre endroit, laquelle chose ilz confesserent: mais comme ie leur voulu demander lequel de eulx estoit le meilleur & plus sage, vn quidam nous entrerōpit le propos: car il appella Menexene, disant que le Maistre du Ieu le demandoit: & me semble que cestuy là estoit le Preuost des Sacrifices. Menexene s'en alla, & ie me mis à ce pēdant entretenir Lysis, & luy dis ainsi: Dictes moy, Lysis, vostre pere & vostre mere vous ayment ilz pas bien? Ouy, dist il. S O C R A T E S. Desirēt ilz point que vous soyez heureux? L Y S I S. Pourquoi non? S O C R. Celuy vous semble il heureux qui est en seruitude, & n'a le pouoir nyle loysir de faire ce qu'il veult? L Y S I S. Nenny certes. S O C R. Si donques vostre pere &

vostre mere vous aymēt, & veulent que soyez heureux, mettent ilz pas toute peine & diligence à ce que vous viuiez en pure & franche liberté? L Y S. Qui en doute? S O C R. Ilz vous laissent donc faire tout quant que vous voulez sans contreuvenir à voz desirs. L Y S. En bonne foy, Socrates, si me sont ilz bien contraires en plusieurs choses. S O C R. Comment dictes vous cela, Lysis? ilz desirent que soyez heureux, & vous gardent de faire voz plaisirs. Or me dictes vn petit: si durant le tournoy vous auiez impetré de vostre pere de monter sur son Chariot, & que pour le conduire vous voulussiez prédre les resnes des cheuaulx, vous le permettroit il pas? L Y S. Nenny certes. S O C R. A qui le permettroit il dunque? L Y S. A vn palefrenier qui est à la maison, que pour ce faire, il tient à gages. S O C R. Qu'est ce que vous dictes, Lysis? Vostre pere baille il plus tost ses cheuaulx à gouuerner à vn Seruiteur, & argent pour ce faire, que non point à vous? dont vient cela? D'auãtaige, vostre pere & vostre mere souffriroient ilz que vous touchissiez leurs mulets à tout vn fouet s'il vous en prenoit enuie? L Y S. Pourquoi me le souffriroient ilz, Socrates? S O C R. Comment? ame ne les oseroit il toucher? L Y S. Ouy dea, mais c'est à faire au Mulatier. S O C R. Le Mulatier est il de Serue, ou Frãche condition? L Y S. C'est vn Seruiteur.

SOCR. Ilz estiment donc plus vn Seruiteur que vous qui estes leur propre filz, & luy donnent plus de credit. Mais encores vne chose: Permettent ilz que vous ayez l'esgard & maistrie sur vostre personne? LYS. Nenny. SOCR. Qui l'a donques? LYS. Mon Pedagogue. SOCR. Est ce point aussi vn Seruiteur? LYS. Ouy. SOCR. Vrayement le cas est bien gref & estrange, qu'un Enfant noble soit subiect à vn Seruiteur de son pere. Et en quoy est ce qu'il ha sur vous esgard? LYS. Quand il me mene vers les Maistres qui m'enseignent. SOCR. Ceulx là ont ilz point aussi puissance sur vous? LYS. Ouy. SOCR. Vostre pere vous ha donc bien baillé des maistres & gouverneurs pour son plaisir. Or ca quãd vous estes de retour à la maison, vostre mere pource que aussi elle desire que vous soyez heureux, vous laisse faire tout ce que vous voulez en matiere de filer & deuyder la soye, & besongner sur le mestier. Elle vous souffre tenir & manier le coutelet, les ciseaulx, le pigne, la nauette, & toutes ces autres besongnes. LYS. Dictes vous Socrates: Elle ne me les feroit pas seulement poser, mais bien me battrait si ie les osoye toucher. SOCR. Mon Dieu, auez vous fait quelque chose à vostre pere & à vostre mere? LYS. Nenny. SOCR. Pourquoi donques ne veulent ilz point que vous soyez heureux, & faciez

tout à vostre plaisir, ains vous nourrissent de sorte que vous estes tousiours subiect à quelcun, & qu'à bref parler ilz ne vous laissent faire chose quelconque qui vous agree? A raison de quoy il semble que tant de biens ne vous seruent de rien, veu qu'un simple vallet en ha plus tost le gouuernement que vous: voire (qui est bien le pis) & de vostre personne mesmes: car l'un vous la traicte et nourrit, l'autre vous la peigne & accoustre, sans que vous y ayez droit ou puissance quelconque, Lysis mon Amy, dont ne scauriez mettre à effect chose qu'ayez en voulenté.

L Y S. Je ne suis pas encores en aage, Socrates. S O C. Vous n'estes pas encores en aage dictes vous! Donnez vous garde, filz de Democrates, que ce ne vous soit le moindre empeschement. Car à mon aduis que vostre pere & vostre mere vous laissent faire à vostre appetit toutesfois & quantes qu'ilz veulent que vous leur lisiez ou escriuiez quelque chose, & n'attendent point qu'ayez plus grand aage: ains se fient desia bien en vous, de ce, plus qu'en nul autre de la maison. L Y S. Ouy bien. S O C R. En cest endroit soit en lisant ou escriuant, il vous est loysible de disposer les lettres tout à vostre plaisir. Et quand vous prenez le Lut ilz ne vous gardent point d'en lacher ou tendre les cordes, ou d'en iouer autrement qu'à vostre fantasie? L Y S. Non certes. S O C R. A quoy
tient

tient il donc qu'en telles choses ilz vous laissent faire tout ce que vous voulez, & aux autres non? L Y S.

Pource que ie me cõgnoy en cestes cy, & que ie n'entends rien en celles là. S O C R. Donc voyez vous, mon bel amy Lysis, comment vostre pere, pour vous donner entiere liberte, n'attend point que vous ayez plus d'aage, mais que soyez plus sage: car des qu'il se apperceura que serez deuenu plus prudent que vous n'estes, il vous lairra incontinent le gouuernement de toutes voz affaires, & de vostre personne aussi.

L Y S. Telle est mon esperance, Socrates. S O C R. Et que feront les autres? se porteront ilz point tout ainsi enuers vous comme voz pere & mere? Car pensez vous que quelque Seigneur vostre voyfin ne vous laissast semblablemẽt volentiers la charge de sa maison, s'il vous congnoissoit estre bon mesnager?

L Y S. Ie le pense. S O C R. Faiçtes vous doubte que les Atheniens ne vous baillent le gouuernement de la chose publique, aussi tost qu'ilz scauront que vous serez meilleur & plus suffisant à ce, que nul autre? Disons vn petit, Que feroit le Souuerain d'Asie? souffriroit il à son filz aîné, lequel doit apres luy succeder au Royaume, aller mettre en ses potages tout ce qu'il voudroit, plus tost qu'à nous, apres que luy aurions faiçt entẽdre que nous nous cõgnoissons mieulx en faiçt de cuyfine que son filz? L Y S I S. Nenny.

S O C R.

S O C R. Si l'enfant y vouloit mettre grande quantité de sel, il l'engarderoit, feroit pas? ce que toutesfois il nous permettroit bien. L Y S. Voire. S O C R A. Oultreplus, si d'adventure iceluy Enfant auoit mal aux yeux, luy defendroit il pas d'y mettre les mains, puis qu'il scauroit bien que iceluy ne seroit Cyrurgien ne Medecin? Mais s'il nous estimoit estre bons Cyrurgiens, ne nous y lairroit il point faire tout ce que nous voudrions? Voire quand pour les luy medeciner nous en ouuririons les paupieres, & ietterions de la cendre dedans. L Y S. Cela est vray. S O C R. D'auantage, se fieroit il pas mieulx en nous de toutes ses autres affaires, qu'en soy mesmes, ou en son propre filz, s'il congnoissoit que nous y fussions beaucoup plus scauans & experts? L Y S. Aussi seroit il necessaire, Socrates. S O C R. C'est bien dict, Lysis mon amy, Les nostres, & les estrangers, hommes & femmes, tous nous lairront besongner & faire à nostre guise, de ce en quoy nous serons scauans: & n'y aura ame qui nous en garde, qu'en cela ne soyons libres, & remonstrans aux autres. Parquoy, puis qu'en telles choses serions vtils & duisans, à bon droit seroient elles nostres. Mais de ce en quoy ne nous entendons, personne ne nous permettra disposer comme nous voudrions bien, ains vn chascun de son pouoir nous y resistera, non seulement les estrangers, mais les nostres aussi:

& enc

& encores de ce qu'aurons plus cher, voire de noz
 propres personnes serons contraincts bailler la char-
 ge à quelques seruiteurs plus tost que la prendre nous
 mesmes. Lesquelles choses, veu que ne les scaurions
 aprofiter, nous seroient alienes & estranges : le con-
 fessez vous pas? LYS. Ie le confesse. SOCRAT.
 Pourrions nous estre Amys de quelcun, ou quelcun
 nous aymera il à raison de ce en quoy nous sommes
 inutiles? LYS. Nenny. SOCR. Vostre pere ne
 vous ayme donc point, ny vn autre quel qu'il soit au-
 truy, en tant que vous ou luy ne leur estes à profit.
 Mais si vous deuenex sage, chascun sera amoureux
 & familier de vous, autremēt personne ne vous ay-
 mera, ny les Voysins, ny voz Parēts. Or ie vous de-
 mande si aucun se peult glorifier du scauoir qu'il n'a
 encor acquis. LYSIS. Comment se pourroit il faire?
 SOCR. Si vous auez besoing de Maistre, donques
 n'estes vous pas encores scauant. LYS. Non certes.
 SOCR. Par ainsi ne vous glorifiez vous pas en sca-
 uoir si vous n'en auez point. Non, dist il, comme ie
 croy. Apres lesquelles parolles, ie iettay mes yeux sur
 Hippothales, & à peu que ne luy disse en ceste ma-
 niere : Voyla les propos, Hippothales, que lon doit te-
 nir aux Enfans, en les reprenant & rabaisant, non
 pas les louer & flatter. Mais voyant qu'il estoit tout
 fasché pour les raisons susdictes, ie m'aduisay qu'il se
 cachoit

cachoit de Lysis, dont ie me teu & retiray. Ce pen-
 dant Menexene retourna, & s'assist en sa place au-
 pres de Lysis. Alors Lysis me dist à l'oreille, autant
 gracieusement & amyablement qu'il est au monde
 possible, sans que Menexene l'entendist: Socrates, dist
 il, Je vous supplie tenez à Menexene le mesme pro-
 pos que vous m'auex tenu. Vous mesmes, dis ie, Ly-
 sis le luy tiédrez par apres: car vous m'auex escou-
 té bien ententiement. Ouy certes, dist il. Mettez
 donc peine, dis ie, qu'il vous souuienne de tout ce que
 nous auons dict, à fin de le luy raconpter entieremēt
 de poinct en poinct. Et s'il y ha quelque chose dont ne
 foyez bien records, vous m'en pourrez interroguer
 la premiere fois que me rencontrerez. Certes ie y es-
 saieray, dist il, mais dictes luy donques s'il vous plait
 quelque autre chose, à fin que ie l'apprenne aussi, en
 attédant qu'il soit heure de nous en retourner. Vraye-
 ment, dis ie, ie le dois faire, quand ne seroit que pour
 l'amour de vous & à vostre requeste: mais pensez
 donc à me donner secours si d'adventure il me repoul-
 se, car vous scauez bien qu'il est vn petit contētieux
 & opiniastre. Ce fais mon, dist il, & ceste est la cau-
 se pourquoy ie desireroye vous veoir en disputes avec
 ques luy. Voire, dis ie, Lysis, à fin de vous gaudir de
 moy? A Dieu ne plaise, Socrates, dist il, mais à celle
 fin que vous le repreniez & corrigiez vn petit.

La chose n'est pas aisée à faire, dis ie ; par ce qu'il est fort audacieux & beau parleur, & avec ce disciple de Crisippe. Crisippe, dist il, est aussi en la cōpaignie, le voyez vous pas ? mais ne vous souciez, Socrates, ains luy parlez hardyment, ie vous prie. Ie le veulx bien, dis ie, mais ce sera à part icy entre nous, tandis que les autres deuissent ensemble. Pourquoi, dist adōc Crisippe, tenez vous voz propos tāt secrets, que n'en faictes part à ceulx qui sont en la cōpaignie ? C'est biē raison, dis ie, qu'ilz en soient participans. Voicy Lysis qui n'entend point plusieurs choses que ie luy demande : or pense il que Menexene les sache, parquoy il me prie que ie l'en interrogué. Que ne l'interrogué vous donc ? dist Crisippe. Aussi vois ie : Menexene, dis ie lors, respõdez moy ie vous prie à ce que ie vous demanderay. I'ay de nature certaine couuoitise d'acquérir vne chose en ce mōde, selon que chascun ha sa fantasie : car nous voyons l'un desirer des Cheuaülx, l'autre des Chiens, l'autre de l'Or, & l'autre des Hōneurs : toutes lesquelles choses i'estime bien peu, & n'en fais pas grand compte : mais ie brusle du desir d'acquérir des Amys. De sorte que i'aymeroye beaucoup mieulx auoir vn bon Amy que quelque bel Oyseau, ou plaisant Papegay, ou quelque beau Chien, ou Cheual. Et par mon ame, si on me mettoit au choix, i'auroye plus cher acquester vn bon Amy,

b que

que tout l'Or du Roy Darius, ou que l'auoir prisonnier luy mesmes. Or aduisez combien ie suis connoiteux d'amytié. Pource, quand ie voy Lysis, & vous, certes ie suis surprins d'un merueilleux estonnement en vous reputât tresheureux, que estâs encores si ieunes, ayez desir tant aiseemēt acquis un tel bien que de vous estre si tost accointé de luy, & que luy pareillemēt vous ayt ainsi prins en amour. Duquel bon heur tant me trouue eslongné, qu'encores mesmes ne entends ie point comment aucun peult estre Amy. Qui est la chose que ie voudroye bien vous demander, comme à celuy qui la scauez. Parquoy ie vous prie, Menexene, me vouloir dire quand quelcun ayme un autre, lequel de ces deux est l' Amy, l'aymât, ou l'aymé: ou s'il n'y ha aucune differēce. MENEEX. A mon aduis que c'est tout un. SOCR. Que dictes vous, Menexene, tous deux sont Amys l'un à l'autre, encores que l'un seulement ayme. MENEEX. Il me le semble. SOCR. Seroit il point possible d'en trouuer un qui aymast sans party? MENEEX. Ouy dea. SOCR. Advient il point aucunes fois que tel Amant est mal voulu, comme souuēt les Amoureux sont de leurs Amyes, lesquels iacoit qu'ilz aiment ardemment, toutes fois point ne sont aymez, mais bien hays & deboutez. Est il pas vray? MENEEX. Ouy certes. SOCR. De ces deux personnages, cestuy cy ayme,

ayme, & celuy là est aymé. MENEX. C'est mon.
 SOCR. Mais lequel est amy de l'autre, cestuy cy qui
 ayme, soit aymé ou mal voulu, ou celuy là qui est ay-
 mé, encores qu'il n'ayme point, ou si nul d'entre eulx
 est Amy, veu que tous deux ne s'entreament. ME-
 NE. Il me sembleroit en tel cas, que nul des deux se-
 roit Amy de l'autre. SOCR. Nous iugeons donc
 tout autrement que ne faisons n'agueres, quand nous
 disions que tous deux estoient amys, encores qu'il n'y
 en eust qu'un seulement qui aymast, veu que mainte-
 nant nous trouuons le contraire: assauoir que si tous
 deux n'ayment, ny l'un ny l'autre sont Amys. ME-
 NEX. Il le semble. SOCR. A ceste cause n'y ha
 il point d'amys de Cheuaulx, par ce qu'ilz n'ayment
 d'amour pareille ceulx de qui ilz sont aymez, ny
 semblablement point d'amys d'Oyseaux, de Chiens,
 de Vin, de Ieux, ny de Sapience, si Sapience ne les ay-
 moit aussi. Vray est qu'on ayme telles choses, mais tou-
 tesfois ce ne sont point Amys. Parquoy, est pas le Poë-
 te bien menteur, qui dict en ceste maniere:

L'homme ayant de beaulx Enfans,
 De beaulx Cheuaulx triumphans,
 Force Chiens & force Oyseaulx,
 Et tousiours hostes nouveaulx
 Dont force argent il recoit,
 Est le plus heureux qui soit.

MENEX. *Nenny pas à mon iugement.* SOCR. *Comment, Menexene, vous semble il qu'il die vray?*

MENEX. *Ouy certes.* SOCR. *Vous voudriez donc dire, que ce qui est aymé, encores qu'il n'ayme point, ou bien qu'il soit mal vueillant, est neantmoins amy de qui il est aymé, comme sont les petis Enfans qui n'ayment aucunement, ains plus tost hayent totalement leurs peres & meres pource qu'ilz les chastient, lesquels Enfans, combien qu'ilz portent aucunes fois hayne mortelle à leurs parèts, sont nonobstant moult chers tenuz d'iceulx.* MENEXE. *Voire.*

SOCR. *Par ce moyen, non qui ayme, mais qui est aymé seroit tant seulement Amy.* MENEX. *Ouy.*

SOCR. *Et non celuy qui hayt, mais celuy qui ayme seroit ennemy mal voulu.* MENEX. *Il le semble.*

SOCR. *Si ainsi estoit, Menexene, maints ennemys aymeroient, & plusieurs amys hayroient: & seroiēt telles alliances d'ennemys à amys, & au rebours, de amys à ennemys, si celuy là qui est aymé estoit plus tost amy que cestuy cy qui ayme. Mais quelle resuerie seroit ce mon doulx amy Menexene: car il est impossible que amytié soit d'ennemy à amy, ou d'amy à ennemy.* MENEX. *Il me semble que vous dictes la verité, Socrates.*

SOCR. *Or si cela ne peult estre, il fault donc dire que celuy qui ayme soit amy de l'aymé.* MENEX. *Il le semble.* SOCR. *Et que sem-*

blable

blablemēt celuy des deux qui veult mal à l'autre soit ennemy. MENEK. Ouy. SOCR. Voire, mais s'il est ainsi, Menexene, nous concludrons encores un coup comme nous auons desia faict une fois, assauoir que l'hōme est aucunesfois amy de celuy qui n'est pas le sien, ou bien de son ennemy, quād iceluy ayme sans estre aymé, ou ayme son mal vueillant. Et que au contraire on est souuent ennemy à celuy qui ne l'est pas, ains plus tost est amy quād on hayt celuy qui ne veult point de mal, ou cestuy là de qui on est aymé. MENE. Je le croiroye ainsi. SOCR. Qu'est il de faire, Menexene, si ny les Amants, ny Aymez, ne se trouuent estre Amys? Dions nous que le nom d'amytié doiuue estre transporté à autres qu'à ceulx cy? MENEK. Par mon ame, Socrates, ie ne scay que vous respōdre. SOCR. Pensez y bien, Menexene, que peult estre nous n'ayons failly le chemin tout au commencement. Alors Lysis dist ainsi: C'est bien ce qu'il m'en sembleroit. Et ce disant rougit de honte. Or pense ie, que pour le trop grand desir & affection d'ont il se penoit d'escouter, il n'auoit pas bien entendu tout le discours du propos, qui luy faisoit ce dire: toutesfois qu'il en sembloit autrement à tous ceulx qui estoient en la cōpaignie. A cause de quoy, & à fin de laisser un petit reprendre l'alaine à Menexene, le scauoir duquel me auoit fort resiouy, ie tournay le propos deuers Lysis,

Et luy dis en ceste maniere : Il me semble, Lysis, que vous auez raison: car si du commencement nous eussions biẽ consideré l'affaire, nous ne nous trouuissions pas maintenant ainsi esgarer. Et pource n'allons plus par ceste voye, car telle consideration me semble estre comme vn sentier trop scabreux & malaisé à tenir: mais pour acheuer le reste du chemin que nous auons à faire, ie serois d'aduis que nous le demandissions à quelque de ces Poëtes, lesquels sont comme Peres & Gouverneurs de Sapience. Or n'est ce pas mal consideré à eulx, quand en remonstrant quelz doinẽt estre les Amys, ilz estimẽt que iceulx se font par le moyen & conduicte de Dieu, qui en faicẽt toutes les menees: car ilz disent ainsi:

Toujours Dieu meine & adresse
 Le Pareil à son Semblable,
 Dont apres mainte caresse
 Naist Amytié perdurable:
 Et si est tant fauorable,
 Qu'entre plus d'un milion,
 Par sa bonté secourable,
 Robin trouue Marion.

Leustes vous iamais ces Vers là? L Y S I S. Ouy bien. S O C R. Il est bien possible aussi qu'ayez leu les escripts des Sages, ou ilz disent le mesmes, assauoir, Que toute chose, necessairement, ayme son Semblable.

blable. Et telle est l'opinion de ceulx qui ont traicté du Naturel, & de tout l'Vniuers. L Y S. Vous dictes vray. S O C R. Disent ilz pas bien? L Y S. Peult estre. S O C R. Peult estre aussi que ce que nous disons est vray en partie, & peult estre du tout, mais nous ne l'entendons pas encores. Toutesfois si me semble il, que tant plus vn mauuais homme s'accointe d'un meschât, de tant sont ilz plus ennemys : car telles gens ne scauroient viure ensemble, que tousiours ilz ne s'entrefeissent quelque desplaisir l'un à l'autre. Et Amytié ne pourroit estre là ou l'un poulse, & l'autre frappe. Est il pas vray? L Y S I S. Ouy certes. S O C R. Par ainsi donques telle sentence seroit faulse par la belle moytié : car les mauuais sont ilz pas semblables? L Y S. Ouy. S O C R. Mais ie croy, Lysis, qu'elle entend dire que les bons seulement sont pareils & amys entre eulx, & que les mauuais ne sont aucunement semblables, comme lon dict communemēt, ny à eulx mesmes, ny à autruy, mais inconstans & variables. Or quiconques est different à soy mesmes, n'accordera iamais avec vn autre, & ne pourra estre amy de personne. Ne l'estimez vous pas ainsi? L Y S. Ouy certes, Socrates. S O C R. Donques, Lysis mon Amy, à mon iugemēt, ceulx qui disent le Pareil estre Amy de son Semblable, entendent que les Bons sont Amys aux Bons seulemēt. Aussi, à dire la verité, les

mauvais ne pourroient estre amys ny aux meschans,
 ny aux bons. L Y S. Ie le confesse. S O C R. Par ainsi
 donc maintenant nous appert qui sont les amys, car la
 raison nous monstre que les bons sont amys des bons.
 L Y S. Voire. S O C R. Et ie le croy aussi: mais il y ha
 ie ne scay quoy qui me trouble, & met en doubte,
 oyez ie vous prie que c'est: Par la mesme raison que
 les hommes sont pareils entre eulx, par icelle sont ilz
 amys, & par consequent vtiles & duysans les vns
 aux autres. Or considerõs ainsi: Quel profit ou dom-
 mage peult faire aucun à son semblable, que luy mes-
 mes ne le se puisse faire? ou, que luy scauroit il aduenir
 du costé de son semblable, que luy ne s'en puisse bien
 autant donner de soy mesmes? Si donques le Pareil se
 passe aiseement de son semblable, y ha il cause pour-
 quoy telles gens se puissent desirer l'un l'autre? L Y S.
 Non pas ce semble. S O C R. Celuy qui ne desire au-
 truy, peult il aymer, ou estre amy? L Y S. Nenny cer-
 tes. S O C R. Possible que le Pareil n'est pas amy à son
 Semblable, par ce qu'il luy est pareil: & que le Bon
 est Amy au bon, non entant qu'il luy est semblable,
 mais à raison de ce qu'il est bon. L Y S I S. Peult estre.
 S O C R. Assauoir mon si le Bon, à raison de ce qu'il
 est bon, peult pas bien suffire à soy mesmes? L Y S I S.
 Ouy. S O C R. Celuy qui suffit à soy mesmes, en tant
 qu'il est prou suffisant à soy, n'a que faire d'autruy.

L Y S. Qui voudroit dire du contraire? S O C R. Qui de rien n'a affaire, il ne desire rien. L Y S I S. Non. S O C R. Si rien il ne desire, donques, n'ayme il point? L Y S. Non certes. S O C R. Qui n'ayme point, n'est pas amy. L Y S. Il me le semble. S O C R. Comment dōques se peult il faire, que les Bons soient Amys des bons, lesquels n'ont cause de desirer l'un l'autre en absence, veu qu'un chascun d'eulx peult suffire à soy-mesmes en presence, & n'a besoing de son semblable? Quelle estime scauroient faire telles gens l'un de l'autre? L Y S. Nulle. S O C R. Ceulx qui ne s'entreeestiment point, pourroient ilz iamaiz estre amys? L Y S. Iamaiz. S O C R. Or considerez un petit, Lysis, on nous en sommes venuz, & si nous auons point esté abusez. L Y S. Comment donques, Socrates? S O C R. Pource que i'ay autresfois ouy dire à quelcun (encores en ay ie bien memoire) que toute chose est aduersaire à son semblable: & que les bons sont ennemys aux bons. Or s'aydoit il du tesmoignage de Hesiode, qui dict que le Potier porte au Potier enuie, le Musicien au Chantre, & le Coquin au Mendiant. Et estimoit que necessairement fust ainsi de toutes choses, de maniere qu'entre les semblables tousiours y eust enuie & dissention: mais entre les contraires toute concorde & amytié, veu qu'il fault par necessité que le pouure se face amy du riche: que le petit quiere l'accoin-

tance du grand, à fin de faueur & ayde: que le Malade prenne congnoissance du Medecin, à raison de Santé: & l'ignorant hante le Sage, pour apprendre & scauoir. Il disoit bien encores d'auantage, que tant s'en fault que quelcun ayme son Semblable, que toute chose quiert, non son Pareil, mais son Contraire. Chose seiche demande humeur: le froid desire le chaud: ce qui est aigu cherche chose camuse, ou plane. Amertume souhaitte douceur: le vuyde repletion: ce qui est plein quiert à se descharger: & ainsi de toutes autres choses. Oultreplus disoit qu'un Contraire estoit vie & nourrissement à sa chose Contraire, & que le Pareil n'auoit de son Semblable bien ne profit quelconques. Or le personnage, qui telles choses enseignoit, sembloit estre fort beau parleur, car il disoit moult bien. Que vous en semble, Menexene? M E N E X E. Je iugerois de prime face, ainsi que vous, qu'il disoit bien. S O C R. Nous disons donc que tout Contraire est grand Amy de son Contraire. M E N E X. Voire. S O C R. Prenons qu'ainsi soit, Menexene, mais ie vous prie considerer si cela seroit point estrange, & hors de propos: car ces Sages tant eloquents & proüpts à contredire, se pourroient incontinent leuer contre nous, & nous demander si Amytié & Hayne sont pas bien Contraires. Que leur respondrions nous alors pour le meilleur, serions nous pas contraincts leur confesser

fesser que ouy? Par ainsi, voudroient ilz pas conclure & dire, qu'un Amy seroit aymé de son Ennemy, & un Ennemy mal voulu de son Amy? MENEEX. Peult estre. SOCR. Et que semblablement le Loyal seroit amy du Meschât : le Dissolu du Modeste: et les Bons des Mauuais. MENEEX. Si ne me le semble il pas toutesfois. SOCR. Il faudroit bien qu'ilz fussent Amys, si tât estoit qu'à raison de Cōtrarieté vne chose fust amy de l'autre. MENEEX. Il le faudroit bien voirement. SOCR. Donques ny le Semblable est Amy de son Semblable, ny le Cōtraire de son Contraire. MENEEX. Il semble que non. SOCR. Or à fin que meshuy nous ne nous amusions à ces propos, qui ne nous ont rien profité, quant à entēdre que c'est que Amy. Considerons vn autre cas, assauoir, que ce qui est Ne bon ne mauuais, fust amy de ce qui est Bon. MENEEX. Qu'est ce que vous dictes, Socrates? SOCR. Par mon ame, Menexene, ie ne scay : car l'esprit me chancelle tout, & varie, pour la difficulté du propos. Toutesfois il m'est aduis, cōme dit le vieil Prouerbe, qu'il n'est point de laydes amours: car beauté est tousiours amyable, laquelle semble estre ne scay quoy mol tēdre, & grasset, qui soudain coule & passe en nous, comme chose doulce & glissante : & pense que ce qui est Bon ne peult estre qu'il ne soit Beau. Que vous en semble? MENEEX. Ainsi l'estime ie. SOCR. Or

vous ay ie dict, en deuinant à toutes aduentures, que ce qui est ne bon ne mauuais est amy de ce qui est bon. Et scauez vous bien la cause de cestuy mon deuinement : pource que, selon mon aduis, il y ha trois differentes especes des choses: car les vnes sont bonnes, les autres mauuaises, & les tierces, ne bonnes ne mauuaises. Qu'en dictes vous? MENE. Ie le pense ainsi. SOCR. Puis que selon les raisons susdictes le bon n'est amy du bon, ny le mauuais du mauuais, ny semblablement le bon du mauuais, donc reste il, s'il y ha quelque amy au monde, que ce soit ce qui est ne bon ne mauuais, lequel soit Amy amoureux du bon, ou de qui luy est semblable: car nul n'est amy de chose mauuaise. MENE X. Cela est vray. SOCR. Voire mais, comme nous auons dict, le Pareil n'est point amy de son semblable. MENE X. Non. SOCR. A raison de quoy, ce qui est ne bon ne mauuais ne pourroit estre amy de cela qui est tel. MENE X. Il semble que non. SOCR. Par ce moyen, ce qui est ne bon ne mauuais peut donc seulement estre Amy amoureux de cela qui est tout seul bon. MENE X. La consequence semble estre necessaire. SOCR. A ce coup, Enfans, auons nous bien demeslé le poinct: car si nous considérons le Corps de l'homme, estant en santé, il n'a besoin de Medecine, ny des remedes d'icelle, par ce qu'il luy suffit qu'il se trouue bien: dont la personne

saine,

saine, à raison de santé, n'est Amyamoureuse du medecin : mais bien le malade, comme ie pense, à cause de maladie. MENEEX. Ouy. SOCR. Maladie est ce pas chose mauuaise, & Medecine chose bonne & vtile? MENEEX. Voire. SOCR. Le Corps, en tant que corps est ne bon ne mauuais. MENEEXE. Il est vray. SOCR. Or est le Corps contrainct, à cause de maladie, desirer Medecine : dont s'ensuyt que ce qui est ne bon ne mauuais deuienne Amyamoureux du bien, pour la presence du mal : laquelle accointance se faict, comme il appert, auant que par la presence de ce qui est mauuais il deuienne tel. Et ne peult estre mauuais en tant qu'il est Amyamoureux de biē: veu que nous auons monstré estre impossible, que le mauuais soit amy au bon. MENEEXE. Aussi certes ne peult il estre. SOCR. Entendez vn petit, Menexene, à ce que ie veulx dire: Ie dy que les choses deuiennent aucunes fois telles, que ce qui leur eschet & aduient, aucunes fois non : comme si on vouloit taindre quelque chose de couleur, couleur est ce qui eschet à la chose couloree. MENEEX. Voire. SOCR. La chose couloree, nonobstant la couleur, est elle pas encores telle qu'elle estoit parauant? MENEEXE. Ie ne vous entends point, Socrates. SOCR. Peult estre, Menexene, que l'entendrez ainsi: Si quelcun vouloit blanchir de Ceruse voz blonds cheueulx, assauoir mon
s'ilz

s'ilz seroient, ou sembleroient estre blancs? MENE. Ilz sembleroient estre blancs. SOCR. Encores que Blancheur leur escheust, si ne seroient ilz blâcs pourtant, & nonobstant la Blancheur escheuë ne seroient non plus blancs que Noirs. MENEXE. Il est vray. SOCR. Mais quand ilz blanchiront de vieillesse, adonc, mon bel amy, deuiendront ilz tels que ce qui leur escherra, c'est assauoir, Ilz seront blancs par la presence de la blanche couleur. MENEX. Et quoy donques. SOCR. Voyla ce que ie demandoye, assauoir mon, si tout ce à quoy quelque chose eschet deuiet incontinent tel, & le mesmes que la chose qui luy est escheuë: ou si en vne sorte il deuiet tel, & en l'autre non? MENEX. Je dirois qu'en vne sorte il deuiendroit tel & semblable que la chose luy escheuë, & en l'autre non. SOCRAT. Par ceste raison, ce qui est Ne bon ne mauuais, combien que le mal luy soit escheu, n'est pourtant encores Mauuais, mais bien l'est il alors qu'il est deuenu tel. MENEX. Ouy certes. SOCR. Quand le Mal estant present il n'est encores mauuais, telle presence le contrainct desirer ce qui est Bon: mais si icelle le rend mauuais, adonc luy oste elle le desir de bien & amytié aussi, de sorte qu'il n'est plus ce qui souloit, à scauoir, Ne bon ne mauuais, ains Mauuais entierement. Or est il impossible que le Mauuais soit amy du Bon, ny le Bon du Mauuais.

LYSIS. Il est impossible voirement. SOCR. A ceste cause ceulx qui sont desia Sages, soient Dieux ou hōmes, n'ont plus besoing d'estre Amyamoureux de Sapience, ny ceulx aussi qui ont esicé tellement corrompuz & perduz d'ignorance, qu'ilz en sont deuenuz totalement Mauuais. Car celuy qui est Mauuais, ou du tout Ignorant, n'a que faire de Sapience. Par ainsi, il ne rejte plus sinon ceulx qui, combien que ce Mal d'ignorance leur soit escheu, ne sont neantmoins Idiots & Ignorans de tout poinct, ains ont congnissance de leur ignorance, au moyen dequoy ilz sont Amysamoureux de Sapience, estans encores Ne bons ne mauuais: car les Mauuais ne philosophient, ou n'ayment Sapience ny les Bons aussi, selon que nous auons trouué, qu'il n'est point d'amytié de Cōtraire à Cōtraire, ny de Pareil à Pareil: vous en souuiét il pas?

LYS. Ouy bien. SOCR. O Lysis, & vous Mene-nexene, à ce coup auons nous donc trouué qui c'est qui est Amy, ou non: veu qu'il ha ia esté cōclu & arresté entre nous (tant au regard de l'ame comme du corps) que ce qui est Ne bon ne mauuais, deuiet amy de cela qui est Bon, à cause de la presence du mal escheu. Alors confesserēt ilz, toutes ces choses estre vrayes. Et moy d'estre bien aise, autant comme si i'eusse esté quelque Veneur ayant trouué à mon souhait le gibier que i'alloye querāt. Mais il me suruint tout en vn instant

stant ne scay quel doubte, & souſſeçon moult eſtrange, & hors de propos, comme ſi les choſes ſuſdictes ne fuſſent vrayes aucunement, dont tout faſché leur diſ ainſi : O Lysiſ, & Menexene, Il ſemble que ſoyons tombez en quelque ſonge ou reſuerie. A cauſe de quoy dictes vous cela ? dirent ilz. Pource, diſ ie, que i'ay grand' peur que tous ces faulx propos que nous tenons, touchât ſcauoir qui eſt Amy, ne ſe gaudiſſent de nous : comme ſi nous auions affaire à gens deſdaigneux, ou mocqueurs. Pourquoi donques ? dirent ilz. A ſcauoir mon, diſ ie, ſi l'amy eſt amy de quelque choſe, ou non ? Il fault bien, dirent ilz, qu'il ſoit amy de quelque choſe. Eſt ce, diſ ie, pour l'amour & à fin de rien, ou de quelque choſe ? M E N E X. Pour l'amour & à fin de quelque choſe. S O C R. Telle choſe pour l'amour & à fin de laquelle on eſt amy, de quoy que ce ſoit, eſt elle point auſſi amye, ou ſi elle n'eſt amye ny ennemye. M E N E X. Ie ne vous entends pas bien. S O C R. Ie vous en croy, Menexene. Or penſe ie que vous & moy l'entēdrons mieulx ainſi. Diſons nous pas que le malade eſt Amy amoureux du Medecin ? M E N E X. Ouy. S O C R. Eſt ce pas à cauſe de maladie & à fin de ſanté, qu'il ayme le Medecin ? M E N. Ouy. S O C R. Maladie eſt mauuaife. M E N E X. Voire. S O C R. Santé eſt elle bonne, ou mauuaife, ou ne bonne ne mauuaife ? M E N E X. Elle eſt bonne.

SOCR. Nous auons dict que le Corps, lequel est Ne bon ne mauuais, deuiet Amyamoureux de Medecine à cause de Maladie qui est mauuaise, & que Medecine est chose Bonne. Pour l'amour donques & à fin de Santé, Medecine trouue Amytié, car Santé est chose Bonne. MENEX. Il est vray. SOCR. Or ca, Santé, est elle Amye, ou non? MENEX. Amye.

SOCR. Et Maladie Ennemye. MENEX. Voire.

SOCR. Donques, ce qui est Ne bon ne mauuais, est Amyamoureux de chose Bonne, à cause de ce qui est Mauuais et Ennemy, pour l'amour & à fin de ce qui est Bon & Amy. Il y ha quelque apparence, dirent ilz. Par ainsi, dis ie, à cause de ce qui est Ennemy deuiet on Amyamoureux, pour l'amour & à fin de ce qui est Amyaymé. LYS. Ie le pense. SOCR. Or Enfans, puis que le propos nous ha amenez iusques icy, prenons bien garde, ie vous prie, que n'y soyons trompez. Tout premierement ie laisse cela, assauoir, que l'amy deuienne Amy de l'amy, c'est à dire, le Pareil de son semblable, ce que nous auons dict estre impossible: mais considerons plus oultre, à fin que l'opinion presente ne nous decoiue. Nous auons dict que Medecine est Amyeaymee pour l'amour & à fin de Santé. LYS. Voire. SOCR. Santé est donc aussi Amyeaymee. Or si elle est Amyeaymee, il fault bié que ce soit pour l'amour & à fin de quelque chose.

L Y S. Voire. S O C R. C'est assavoir, de ce qui est Amyaymé, si les choses ia confessees ont lieu. L Y S. Pour l'amour & à fin de ce qui est Amyaymé voirement. S O C R. D'avantage, ce qui est Amyaymé est il point tel, pour l'amour & à fin de quelque autre Amyaymé? L Y S. Ouy certes. S O C R. Or est il besoing que par tel discours nous venions à quelque But & commencement d'Amtyié, oultre lequel il n'y ayt point d'autre Amyaymé, de sorte que toute Amtyié soit rapportee à vn premier & principal Amy, pour l'amour & à fin duquel toutes choses Aymeées sont Amyes, & en portent le Nom. L Y S. Il est necessaire voirement. S O C R. Voyla à quoy ie disois, n'augeres, qu'il nous failloit prendre garde, à celle fin que les choses qui sont Amyes aymeées, pour l'amour & à fin du vray & seul Amyaymé, ne nous abusent & retardent comme phantosmes & semblances d'iceluy. Considerons donc en ceste maniere. Ce que quelcun estime & tient cher, comme le pere son enfant, il le prefere à toutes les autres choses qu'il tiët cheres pour l'amour de luy. Comme s'il scait que iceluy ayt beu de la Cicue, il prisera moult & aura cher le vin dont il espere s'ayder en lieu de Contrepoison. L Y S. Voire. S O C R. Aura il pas aussi en estime le flascon ou le vin sera? L Y S. Ouy. S O C R. Estimera il plus lors vne belle couppe, ou quelques beaux verres

verres, que son enfant? Certes ie pense que toute son intention ne visera à choses quelcōques de toutes celles qui lors seront apprestees les vnes à cause des autres: mais qu'il tendra & s'arrestera seulement à ce pourquoy tout le reste est requis. Et n'est vray semblable ce que lon dict communement, que l'or & l'argent soient en estime: car estime & intention ne sont sinon la chose seule, pour l'amour & à fin de laquelle l'or & l'argēt est quis & amassé. L Y S. Il est vray.

S O C R. Ainsi en prent il d'Amytié: car toutes choses que nous disons Amyes, pour l'amour & à fin de quelque Amy, sont ainsi appellees par Nom emprunté, veu qu'il est certain que cela est seul Amy, auquel toutes autres Amytiez tendent. L Y S. Il le semble.

S O C R. A raison de quoy ce vray Amyaymé n'est point Amy, pour l'amour et à fin d'un autre Amy.

L Y S. Non certes. S O C R. S'il est ainsi cela est donc faulx, que l'Amyaymé soit Amy, pour l'amour & à fin de quelque autre Amyaymé. Oultreplus, ce qui est Bon est il pas Amyaymé? L Y S. Ouy ce me semble.

S O C R. Ce qui est Bon est il pas Amyaymé à cause de ce qui est Mauuais? L Y S. A mon aduis que ouy.

S O C R. Mais si des trois dessusdicts, assauoir, Bon, Mauuais, & Ne bon ne mauuais, ne restoit plus que deux tant seulement, & que tout ce qui est Mauuais fust aboly, & osté de Nature, tellement que

il n'escheust aucunement, ny au Corps, ny à l'Esprit, ny à autre chose quelconque de celles que nous auons dictes estre Ne bonnes ne mauuaises de soy. Ce qui est Bon seroit il point lors totalement inutile? veu que si iamais riē ne nous faisoit mal, nous n'aurions besoing d'aucune faueur ou ayde de ce qui est Bon. Et viendrions lors à congnoistre comment, à cause du Mal, nous aurions quis & aymé le Bien, comme si ce qui est Mauuais fust Maladie, & ce qui est Bon le Remede. Or n'aurions nous besoing de Remede si n'estoit Maladie. Et puis vous semble il point aussi que le Bien soit tellement proposé de Nature, que à cause du Mal il soit aymé de nous, & que iceluy Bien ne profite aucunement de soy? Ouy, dirent ilz, il nous le semble. Donques, dis ie lors, ce seul & vray Amy-aymé auquel tous les autres tendent, lesquels sont appellez Amys, pour l'amour & à fin de celuy, est biē contraire & different d'iceulx. Car tous sont Amys pour l'amour de l'amy: mais au rebours, ce vray Amy est tel à cause de ce qui est Ennemy, comme il est manifeste. Et n'estoit ce qui est Ennemy, il n'y auroit plus d'Amy. MENEK. Non pas selon telle raison. SOCR. Si le Mal n'estoit plus en Nature, asauoir mon si Faim & Soif en seroient aussi abolies? Or si aux Hommes et Animaux, qui ne pourroient lors estre dommez, restoit encores quelque Faim & Soif,

& Soif, lesquels appetis ne seroient mauuais le Mal estant totalement osté, Je demanderois uolentiers qu'il en aduiendroit, si ie ne craingnois que tel propos semblast digne de mocquerie. MENEEX. Qui pourroit scauoir ce qu'il en aduiendroit? SOC. Et toutesfois nous scauons que de Faim aucunesfois aduient Douleur, & aucunesfois Plaisir. MENEEX. Voire. SOC. Aduient il pas aussi que celuy qui ha soif, ou Enuie de quelque chose, desire aucunesfois son profit, aucunesfois son dommage, aucunesfois ne l'un ne l'autre? MENE. Ouy. SOC. Si on ostoit toutes choses Mauuaises, aboliroit on aussi celles qui ne sont telles? MENEEX. Nenny. SOC. Donques les Appetis resteroient Ne bons ne mauuais, encores que tout ce qui est Mauuais fust aneanty. MEN. Il est vray. SOC. Est il possible de non aymer ce que lon souhaitte & desire? MENEEX. Non pas se!on mon iugement. SOC. Par ainsi, combien que le Mal fust lors du tout rasé de Nature, encores y auroit il (ce semble) quelques choses aymeas. MEN. Voire. SOC. Mais si le Mal est cause qu'une chose est Amye de l'autre, le Mal n'estant plus rien, ne seroit Amy: car l'occasion ostee l'effect ne peult demeurer. MENE. C'est tresbien dict à vous. SOC. Auons nous pas arresté que lon ayme quelque chose pour l'amour & à fin d'une autre, & que à cause du Mal cecy qui est

Ne bon ne mauuais ayme cela qui est Bon. MENE. Ouy. SOCR. Et toutesfois il semble maintenant que il y ayt quelque autre cause d'aymer. MENE. Voire, il le semble. SOCR. Desir, comme nous disions n'agueres, est il point cause d'Amytié? & qui desire est il pas Amy de la chose desiree? Parquoy tout ce que nous auons dict iusques à present, touchât Amytié, sont ce pas pures Resueries, comme quelque Farce, ou Sottie, ou autre semblable Poëtique inuention bien longue? MENE. X. On le droit. SOCR. Quiconques desire, il desire ce dont il ha Indigēce. MENE. Voire. SOCR. L'indigent donques est Amy amoureux de ce dont il ha faulte. Or est il ainsi que chascun ha faulte de ce dont il est priué. MENE. X. Qui en doubte? SOCR. Par ainsi, Menexene, & vous Lysis, Amour, Amytié, Desir, sont tousiours de ce qui est Propre & Appertenant. Nous le confessons, dirent ilz. Dōques, dis ie, si vous estes Amys il fault bien que soyez aucunement prochains, & appertenant l'un à l'autre. Aussi sommes nous, dirent ilz. Et qui desire, ou ayme autruy, dis ie, par ce le cherit il & ayme qu'il luy est Prochain & Appertenant, selon l'esprit ou étude d'iceluy, ou selon les mœurs & facons de faire, ou bien selon la face, autrement iamais ne l'aymeroit. Menexene s'y accorda, mais Lysis ne dist pas vn mot. Adōc ie dis : Puis qu'il fault
necess

*necessairemēt que nous aymions ce qui est de Nature
 Propre, c'est bien raison qu'un legitime, & non point
 faulx Amant, soit semblablemēt aymé de ceulx les-
 quels il ayme. Auquel propos, Lysis, & Menexene,
 à peine voulurent consentir : mais Hippothales, de
 l'aise qu'il en eut, changea tout de couleur. Or auois ie
 Intention d'un petit mieulx desduyre le propos, &
 leur dis en ceste maniere : O Lysis, & Menexene,
 S'il y ha difference entre ce que nous disons Propre,
 & ce qui est Semblable, nous auons trouué au vray
 que c'est qui est Amy. Mais si Propre & Semblable
 sont tous un, considerez que ce n'est chose aisee reiet-
 ter & racler ce poinct par lequel il ha esté dict que
 le Pareil est inutile à son Semblable : & que en tant
 qu'il luy est inutile, iamais ne luy peult estre Amy.
 Toutesfois puis que nous sommes desia cōme presque
 iures & eslourdis de tant de disputes & parolles,
 voulez vous que nous confessions, que ce qui est Pro-
 pre est autre que cela qui est Semblable? Nous le vou-
 lons bien, dirent ilz. Mettrons nous, dis ie, que ce qui
 est Bon à un chascun luy soit Propre? & au contraire
 ce qui est Mauuais, Aliene & Estrange, ou que le
 Bon soit Propre au Bon, le Mauuais au Mauuais,
 & le Tiers au Tiers, assauoir, ce qui est Ne bon ne
 mauuais? Il nous semble, dirent ilz, que telles choses
 sont propres les vnes aux autres. O Enfans, dis ie,*

no:is retournons donques de rechef aux mesmes propos que au commencement nous auions nyez & reiettez: car le Meschant ne seroit pas moins Amy du Desloyal, ou le Maling du Mauuais, comme le Bon seroit du Iuste. Il le semble, dirent ilz. Mais si nous disions, dis ie, ce qui est Bon & cela qui est Propre ne estre qu'un, le Bon seroit il pas seulement Amy du Bon? Ouy certes, dirent ilz. Mais nous l'auons desia nyé, dis ie, vous en souuient il pas? Ouy bien, dirent ilz. Quels propos donques, dis ie, tiendrons nous desormais pour ne trouuer rien de certain? Or comme les Sages ont de custume faire en leurs consultations recourons vn petit tout le discours que nous en auons fait. Si donques les Amãs ny les Aymez, les Semblables ny les Contraires, ny de toutes autres choses qu'ayons dictes, dont à cause de la multitude ie ne suis bonnement records, rien qui soit ne peult auoir le nom d' Amy: Je ne vous scaurois plus qu'en dire. Quand i'euz ce dict, ie pensois bien interroguer quelcun des grands: mais les Pedagogues de Lysis, & Menexene, comme si c'eussent esté quelques Demons ou Esprits familiers, leur commanderent alors qu'ilz s'en retournaissent à la maison avec leurs Freres, car il estoit heure de vespres. Ausquels commandemens, nous autres qui estions là assemblez, voulumes de prime face resister, en reboutant & empeschant iceulx.

Pedagogues de ce faire, mais ilz ne tindrēt pas grād compte de nous ny de noz parolles : ains estans despits de ce, mourmonnerēt contre nous ie ne scay quoy en leur pattois, & appellerent les Enfans. Dont nous vaincu par leur importunité fusmes contraincts leuer le siege, & rompre la Compaignie aussi, par ce qu'il sembloit que les autres enfans n'eussent pas grād propos à nous communiquer pour l'heure, à cause de la feste à laquelle ilz s'estoient totalemēt addonnez. Finablement, comme desia Menexene & Lysis s'en alloient, ie leur dis ainsi : O Menexene, & Lysis, Auiourd'huy nous sommes nous bien monstrez, sots & mocquables, tant ie qui suis ia Aagé, que vous qui estes encores Enfans. Dont ceulx cy ne faudront à se gaudir de nous, qui nous tenons & estimons Amys (Ie me mets du nombre avec vous) Toutesfois que n'ayons encores trouué au vray que c'est qu' Amy.

*

F I N.

C O N T E N T E M E N T.

C 5

Q V E S T E D' A.
 M Y T I E', A' L A
 R O Y N E D E N A -
 V A R R E.

*



Leur Diuine
 Muse digne,
 Fauorifex par pitié
 A la veine
 Foible & vaine,
 Qui va querant Amytié.
 Vostre face
 De fa grace
 La peult rendre feurement,
 De Sterile
 Prou fertile
 Par vn regard feulement.
 Si mon Style
 Inutile
 Sent vn coup vofre faueur,
 Ie ne doubte,
 Qu'il ne goufte
 D'amytié quelque faueur.
 Ou eft elle
 La plus belle
 De mes Dames les vertuz?

Dont

Dont la vie
 Viuifie
 Maints cueurs par mort abbatuz.

O Dryades,
 Oreades,
 Faunes, Tritons, Demydieux,
 Pierides,
 Nereïdes,
 Est elle point en voz lieux ?

Je vous prie,
 Qu'on espie
 De quel' part elle viendra:
 Et qu'on voye
 Quelle voye
 L'amyeymee tiendra.

Si elle erre
 Par sus terre,
 Voyons sa grand' priuauté:
 Ou qu'on sache,
 Qui la cache
 Dessoubs Ferme loyaulté.

Je y prens garde,
 Et regarde
 Deux Amans, dont l'un en cueur
 N'a que larmes,
 Et alarmes,

Veux de l'autre la rigueur.

Ha, ou Hayne

L'inhumaine

Veult tenir son contrepoinct,

Il s'abuse,

Qui y muse,

Car la Nymphe n'y est point.

Les Semblables

Accointables

L'ont, possible, en leurs quartiers:

Tels, ce semble,

Sont ensemble,

Amys loyaulx & entiers.

Mais la teste,

Qui se creste

De semblable Mauuaiſtié,

Efforeille

Sa pareille,

Qui n'est ſigne d'Amytié.

Ny Fainctiſe

Qui aguise

La Menſonge à faulſeté,

Ny follie

Qui s'allie

D'imprudence, ou laſcheté.

La perſonne

Sage & bonne,
 Qui peult de soy prendre soing,
 N'a que faire
 De se traire
 Vers son Pareil au besoing.
 Tels n'aduisent,
 Ou peu prisent
 L'un de l'autre le pouuoir:
 Dont se partent,
 Et escartent
 Sans Amytié conceuoir.

Mais encore,
 Nul n'ignore
 Ce qu'on voit de iour en iour,
 Comme Enuie
 L'ennemie
 Entre Pareils fait se iour.

Dont r'estime
 Qu'en estime
 Amytié là ne seroit:
 Tournons bride,
 Car ie cuyde
 Que deca conuerseroit.

Vn Contraire
 Tasche attraire
 L'autre, lequel luy de fault:

Chose

Chose Seiche
 Ayme & lesche
 Humeur, & le froid le chaud.

Accointance,
 Non obstant ce,
 N'est en Contrarieté,
 Qu'on ne disse
 Que Malice
 Fust l'amy de Bonté.

Que sera ce,
 Puis que trasse
 Ne ca, ne là, n'en trouuons?
 C'est merueille,
 Je conseille
 Qu'ailleurs chercher la deuons.

Chose Tierce,
 Donques quiert ce
 Qui est Bon, propre, & duysant,
 Quand contraincte,
 Ou attaincte
 Se sent du Mal trop nuysant.

Et s'asseur
 De bonne heure
 De tel remede & secours,
 Ains que vice
 La rauisse

Hors de son naturel cours.

Je croiroye

Que la proye

Ne seroit pas loing d'icy:

Car ie treuve

Par esprouue,

Que le Bon est Beau aussi.

Or est telle

Beauté, qu'elle

Ne peult qu'aymee ne soit:

Car sa grace,

Coulant, passe

En tout cueur, qui l'apperçoit.

Ce Tiers, donques,

Ne fut onques.

Sans estre du Bien Amy:

Veul l'ordure,

Et laidure

Du Mal son grand Ennemy.

Le malade

Foible & fade

De la fiebure dont il ard,

En sousspire,

Et desire

Le Medecin & son art.

Ignorance

Tant

Tant nous tanse,
 Qu'elle nous contrainct vouloir
 Sapience,
 Dont l'absence
 Nous faict errer & douloir.

Pour laquelle
 La Sequelle
 Des beaulx escripts plantureux
 Est requise,
 Et comprise
 Deses Amyamoureux.

Mais quand l'homme
 Dort & chomme
 D'ignorance au grand portail,
 Tant s'atterre,
 Que sur terre
 Ne sert que d'espouventail.

Chose Amye
 Est cherie,
 Pour quelque Amy estimé:
 Et fault dire
 Qu'on aspire
 A vn seul Amyaymé.

Vers tel Sire
 Se retire
 Le Tiers, à fin d'estre heureux,

Pour l'oppreſſe
 Dont le preſſe
 Le Malrude & dangereux.
 Non faict certes,
 Car ſi Pertes,
 Maulx, & Perils n'eſtoient plus,
 Tant qu'Enuie
 Auroit vie
 On aymeroit le ſurplus.
 I'entends ceſte
 Qu'on accepte
 Au tiers reng des appetis:
 Non point celle
 Tant Cruelle
 Enuie qu'ont les chetifs.
 Ainſi donques,
 Qui adonques
 Enuie, ou deſir, auroit,
 Chacun iuge
 Qu'au refuge
 Diſette le chafferoit.
 Or Diſette
 Touſiours iette
 L'œil vers le Bien qu'elle auoit:
 Et regrette
 La Pourette

Ce dont priuee se voit.

O Princesse!

La Deesse

Tant quise, seroit bien là:

Somme toute,

Ie me doubte

Que ceste Garcette l'a.

Elle prie,

Elle crie

Iusqu'a souuent se pasmer:

Mais ie pense

Qu'en presence

N'a reconfort que d'aymer.

Tant Constante,

Et ardante

Est en l'amour de l'Amy,

Qu'elle ha craincte

D'estre Faincte,

Ou de n'aymer qu'a demy:

Et est telle

L'eternelle

Flamme d'amour, dont elle ard,

Qu'elle auouë,

Ayme, & louë

Toute chose de sa part.

Toute chose

Se propose
 A aymer qui ayme bien:
 Ce qu'icelle
 Iouuencelle
 Faiet tout pour l'amour du sien.
 Ses voysines,
 Et cousines
 Ha moult cheres, mesmement
 Ses prochaines
 Sœurs germaines,
 Qui ayment pareillement.
 Or, la Belle,
 Voyant qu'elle
 N'a de soy que la moytié,
 Se contente,
 Soubs l'attente
 De sa parfaicte Amytié.

Arrestez vous, ò petis vers courantz,
 Et merciez Amytié, & la Dame,
 Dont vous tenez, si n'estes ignorantz,
 Tout quant qu'auetz, le corps, l'esprit, & l'ame.

F I N.

d 2

D V V O Y A G E D E
 LYON A NOSTRE DA-
 ME DE L'ISLE.

1539.

A Monsieur le Lieutenant pour le Roy
 Iean du Peyrat, à Lyon.

*

*Ce passetemps, qu'au lieu du Roy prenois
 En son Batteau, au voyage de l'Isle,
 Noble Peyrat lieutenant Lyonnois,
 Soubs de Francoys la main franche & gentile:
 Combien qu'il soit pourtraict d'un menu style,
 Si ay ie espoir que ta main qui adresse
 De ce Lyon la fureur & simplesse,
 Et qui desia ressemble aucunement
 A sa loyalle & humaine maistresse,
 D'humanité souueraine Princesse,
 Le pourra prendre encor humainement.*



L E ne doibs
 Et ne voudrois,
 O du doulx Mayle Quinziesme,
 Tant anobly,
 En oubly
 Mettre ta Beauté supreme.
 Hamadryades,

Drya

Dryades,
 Vous leurs ioyeux Oyseletz :
 Hymnides,
 Et Nereïdes
 Inuentez chantz nouueletz :
 Pour m'ayder
 A recorder
 Celle ioye solennelle,
 Que reservez,
 Et auez
 En cure perpetuelle.
 Distant la Saone
 Du Rosne
 Vne lieuë, ou enuiron,
 Est l'Isle,
 L'isle gentile
 Dedans son moyte giron:
 Ou l'Enfant
 Tant triumpnant;
 Par sa mort trop plus qu'amerë,
 A des Autels
 Immortels
 Pour Soy, sa Grand, & sa Mere.
 Là sa notoire
 Memoire,
 Quand l'annee ha faict le tour,

Annonce

La grand' sermonce

De son Celeste retour.

Lors Lyon

Plus qu'Ilion

En toute sorte admirable,

Faiçt son deuoir

De reuoir

Ce saint Temple Venerable.

L'aube vermeille

Resueille

Du vert Rosier les iettons,

Rosée

S'est ia posée

Autour des petis Bouttons.

Le beau iour:

A Dieu seiour,

Demourez, vous, & les vostres,

Pour en ce lieu

Dire à Dieu

Voz dixains & patenostres.

Les Lyonnoises

Bourgeoises

Prennent Cotte, & Corcelet,

Huschees,

Et resueillées

Par le doux Rosignolet.

Maint Batteau

Est dessus l'eau,

Qui les attend, & ne bouge:

L'un est couuert

Tout de vert,

L'autre tapisé de rouge.

La Saone lente,

Fort gente

S'en tient, mais en bel arroy,

Encore

Plus la decore

Le noble Batteau du Roy.

Roy Francoys,

Qui des Francoys

Semble Fundateur antique,

Veut de son nom

Le renom,

Et l'effect plus Autentique.

Peuple Amyable,

Feable,

Le grand bien que Dieu t'a fait!

De naistre

Pour viure, & estre

Sous vn Prince tant parfait.

Gens heureux,

Sur tous les vœux
 De Saincteté desirense
 Sacrifiez,
 Et priez
 Pour sa Santé valeureuse.
 Ia la Bazoche
 S'approche,
 A fin qu'au Batteau paré
 Sa Bende
 Bleuë se rende,
 Dessous le Lys honoré.
 Plus de cent
 De sainct Vincent,
 En toute facon gourriere,
 Vont regardans,
 Et gardans
 Leur belle & ample Baniere.
 L'imprimerie
 Cherie
 Des Muses, comme leur Sœur,
 Plus graue
 Beaucoup, que braue,
 Y porte Amour & douceur.
 Que de gens
 Mistes & gents!
 Tous ceulx cy s'en vont par Vaise,

Moult

Moult gracieux,
 Et ioyeux,
 Dieu les maintienne en tel aise.

Ca, viennent elles
 Les Belles?
 Car Monsieur le Lieutenant
 Arrive
 Ia sur la rive,
 Et veult partir maintenant.

Or venez
 Dame, & prenez
 Loing du chauld hasle, icy place:
 Car s'il attainct
 Vostre tainct,
 Il en estaindra la grace.

Mes Dames fresches,
 Les flesches
 D'Apollo ne vous nuyront:
 De celles
 D'Amour cruelles,
 Je ne scay qu'elles feront.

Sus, allons,
 (Si nous voulons)
 Tandis que la frescheur dure:
 Le plaisant lieu:
 He mon Dieu!

Qu'il faict bon veoir ta verdure.

Toute la plaine

Est pleine

D'hommes & femmes marchants:

A dextre,

Et à fenestre

Oyez des Oyseaulx les chants.

Oyez vous?

Ce bruyt tant doux

Decliquer de la gorgette

Du Geay mignot,

Du Linot,

Et de la frisque Alloette:

Lesquels nous rient,

Et crient

Que chanter devons aussi.

O cures

Vaines, & dures,

Nous vous lairrons donc icy.

Vien Soulas

Nous rendre las

De Passetemps & Plaisance:

Sus, chantons tous.

Durons nous

Le Content, ou Ionysance?

Chantons en vne:

Fortune.

Doulce memoire, à loysir.

Et voire,

Doulce memoire,

Auant, ou Pour vn plaisir.

Papillons,

Et Oysillons

Voletans par la Montaigne:

Les tant follets

Aignelets

Sautelans en la Campaigne.

Chascun conuoie

La ioye

Des Lyonnois, que Dieu gard:

Les Bestes

Dressent leurs testes,

Pour en auoir le regard.

Les Poissons

Viennent aux sons

Des Rebecs, & Espinettes,

Et loing du fond

De l'eau, font

Petites gambadelettes.

Les tant honnestes

Brunettes

Nymphes, de Bacchus prochain

Suyvies
 S'en sont fuyes
 Là hault, pour veoir tout le train.

Et Ceres

Se tient expres
 Pres des Passans, file, à file:
 Pour iceulx veoir,
 Et scauoir
 Des nouvelles de sa fille.

De cueur, & veuë

Saluë
 Petis, Grands, & Grandelets:
 Dont telle
 Est la sequelle
 Que de vous, mes Verselets.

Ce vert Pré

Plus Diapré
 Que les haults chefz des Princesses,
 Bien voudroit
 Qu'en tout endroict
 On luy pillast ses richesses.

Voyez ia l'Isle

Fertile
 De riz, & là hault au bois
 Soubs branches
 Vertes, Fleurs blanches

Qui

Qui escoutent les Auois.

Menestriers

Soubs ces noyers

Sonnent à toute puissance,

Tant aux Passans,

Qu'aux Dansans,

Commune resiouyissance.

O Compaignie

Fournie

De miliers, tant qu'il souffit:

Benie

Sois, & vnie

En Celuy là qui te fait.

Qui ira,

Il se perdra

Par ceste presse incertaine:

N'ayez esmoy,

Suyuez moy,

Ce dict nostre Capitaine.

Chascun contemple

Ce Temple

Dont part la Proceßion:

Priere

Briefue, & entiere,

Faisons y d'affection.

Attendons,

Et re

Et regardons
 Vn petit ceste assemblee
 De Compaignons,
 De Mignons,
 Et de Dames redoublee.

Ces iolyettes
 Fillettes,
 Que Villageois vont menans,
 S'assemblent
 Toutes, & tremblent
 D'ouyr les Canons tonnans.

Au circuyt
 De tel desduyt
 La Saone son Rosne oublie,
 Pour s'eslouyr
 A ouyr
 La gent sans melancolie.

Oncques Riuiere
 Si fiere
 Ne se fait tant estimer,
 Il semble
 Qu'elle ressemble
 (Veu son Isle) à la grand' Mer.

Et ses beaux
 Coulans Batteaux
 Chargez, non de Marchandises:

Mais

Mais de Beautez,
De Bontez,
De Graces, & Gallantises.

A telle Feste
S'appreste
Le Dieu de ioye, & de pleurs,
Des aesles
Toutes nouvelles
Faictes de roses & fleurs.

Le Friand
S'en va riant:
Mais de nuyre ne se soule:
Il se gaudit,
Et brandit
Ses Flammes parmy la foule.

Il donne maintes
Attainctes
Aux poures cueurs esgarez:
Il poulse
D'arc, & de trouffe
Les Pensers mal asseurez.
Soubs tes ris
Doux & cheries
Lances tu Douleur amere,
Cruel Amour?
Au retour

Nous le dirons à ta Mere:

Qui en tristesse

Sans cesse

Te va cherchant de ses yeux

Par Hayes,

Prez, & Sauls Hayes,

Et par Spectacles ioyeux.

Si hardy:

Car ie vous dy

Frere, que telle entreprise,

(S'il l'apperçoit,

Ou qu'il soit)

Se verra bien tost surprinse.

Tel le menace

D'audace,

De qui possible le cueur

L'estime

Son legitime,

Et inuincible Vainqueur.

Tel fuyr,

Mais bien hayr

Le cuyde, qui le pourchasse:

Tel l'est chassant,

Et poulsant

Au loing, qui de pres l'embrasse.

A Dieu Sicile

(Dy ie) Isle,
 Autre Sicile en chaleur:
 Ta grace
 (Certes) la passe
 De gentillesse, & valeur,
 Sotz Esbatz,
 Cruelz debatz,
 A tant heureuse Iournee
 Ne faictes telz
 Ieux mortelz,
 Que vous feistes l'autre annee.
 La main Lorraine
 Humaine
 Met cy son Chapeau muny
 De grosse
 Pesante Crosse,
 Prinse en son Noble Cluny.
 Ou es tu
 Prince en vertu
 Tant parfaict? Soixante mille
 Seront tesmoings
 (Pour le moins)
 De l'honneur de ta Famille.
 Mais, à tant monte
 Le Compte,
 Que de Phœbus sans doubter,
 La veüe

Claire & agüe
S'esblouyt à les compter.

Nous irons
Delà (ferons?)
En vn Jardin de plaisance,
Ou trouuerons,
Et verrons
Des Dames à souffisance.

Ces Violettes
Seulettes
En leurs luyfantz affiquetz,
Se mirent
Et se desirent
V'oir conioinctes en bouquetz.

Le Rosier
Rid du Fraisier,
Qui tout au rebours agense
Dessus son fruiet
Meur & cuiet
Ses rouges grains de Semence.

La Marguerite
Petite
Aupres de la grand se tient:
Et celle
Iennette belle
Soubz le blanc Lis croist, & vient.

O Soucy,

Que fais tu cy?
 Si ton tainct est desolable,
 Las, c'est Amour,
 Qui de iour
 Te painct ainsi miserable.

De ces friandes
 Viandes
 N'est besoing tant se souler:
 Prou face,
 Voyons en place
 Les belles Dames baller.

C'est assez,
 O yeux lasséz
 De Beauté trop sadinette
 Veüe en ce lieu.

Or à Dieu
 Corydon, & sa Brunette.

La voye approche
 La Roche
 Place de grand' propreté,
 Iust' digne,

Francoys insigne
 Y auez vous point esté?

Là, Albert
 Ouurier expert
 Du Roy en Musique haultaine,

Auecques sons
 De chansons
 Ha Sacré vne Fontaine.
 Dont on dict, qu'elle
 S'appelle
 L'albertine proprement;
 Camuse,
 Que ceste Muse
 Te seruiroit loyaument,
 Fâcheux Soing,
 Qui de tout loing
 Nous rappelles à la Ville:
 J'aymeroix mieulx
 De ces lieux
 L'air, que ton vmbre ciuile.
 O bienheuree
 Seree,
 Trop soudaine à faire honneur;
 Et suuyre
 Le iour, qui liure
 Tant de liesse & Bonheur.

Retirez vous petis Vers mistes
 A seureté, soubz les Couleurs
 De Celle, dont (quand estes tristes)
 L'esperoir appaise voz douleurs.

A' Ianc, Princesse de Nauarre. #

Les Roses d'Auzone

Vn iour de May, que l'Aube retournee
 Refraischissoit la claire Matinee
 D'un Vent tant doux, lequel sembloit semondre
 A prendre l'heure ains que se laisser fondre
 A la chaleur du Soleil aduenir
 Ie me leuay, à fin de preuenir,
 Et veoir le poinct du temps plus acceptable
 Qui soit au iour de l'Este delectable.

Pour donc vn peu recreer mes Espritz,
 Au grand Verger, tout le long du pourpris,
 Me pourmenois par l'herbe fresche & drue,
 Là ou ie veis la rosee esbandue,
 Et sur les choux ses rondelettes gouttes
 Courir, couler, pour s'entrebaiser toutes:
 Puis tout soudain dcuenir grosselettes
 De l'eau tombee à primes gouttelettes
 Du Ciel serain : Là veis semblablement
 Vn beau Laurier accoustré Noblement
 Par Art subtil, non vulgaire, ou commun,
 Et le Rosier de Maïstre Jean de Meun,
 Ayant sur soy mainte Perle assortie,
 Dont la valeur deuoit estre amortie
 Au premier ray du chaud Soleil leuant,
 Qui ia taschoit à se mettre en auant.

Le Rosignol (ainsi qu'une buccine)
 Par son doux chant faisoit au Rosier signe,
 Que ses Bouttons à Rosee il ouurist,
 Et tous ses Biens au beau iour descouurist
 L'Aube duquel auoit couleur vermeille,
 Et vous estoit aux Roses tant pareille,
 Qu'eussiez doubté si la Belle prenoit
 Des Fleurs le tainct, ou si elle donnoit
 Le sien aux Fleurs plus beau que nulles choses:
 Vn mesme tainct auoient l'Aube, & les Roses,
 Vne rosee, vn mesme aduenement,
 Soubz d'un clair Iour le mesme aduancement,
 Et ne seruoient qu'une mesme Maistresse:
 C'estoit Venus la mignonne Deesse,
 Qui ordonna, que son Aube, & sa Fleur
 S'accoustreroient d'une mesme couleur.

Possible aussi, que (comme elles tendoient
 Vn mesme lustre) ainsi elles rendoient
 Vn mesme Flair de perfum precieux:
 Quant à cestuy des Roses, gracieux,
 Que nous touchions, il estoit tout sensible:
 Mais celuy là de l'Aube, intelligible
 Par l'air espars ca bas ne paruint point.
 Les beaulx Bouttons estoient ia sur le poinct
 D'eulx espanir, & leurs aesles estendre,
 Entre lesquelz l'un estoit mince & tendre,

Encor tapy deffous sa coeffe verte:
 L'autre monstroit sa creste descouuerte,
 Dont le fin bout vn petit rougissoit:
 De ce Boutton la prime Rose issoit:

Mais cestuy cy demeslant gentement:

Les menuz plis de son accoustrement
 Pour contempler sa charnure refaïcte,
 En moins de rien fut Rose toute faïcte:
 Et desploya la Diuine denree
 De son paquet, ou la graine Doree
 De la Semence estoit espaissement
 Mise au milieu, pour l'embellissement
 Du Pourpre fin de la fleur estimee,
 Dont la Beauté, n'agueres tant aymee,
 En vn moment deuint seiche & blesmye,
 Et n'estoit plus la Rose que demye.

Veul tel meschef me complainois de l'aage,
 Qui me sembla trop soudain, & volage,
 Et dis ainsi: Las, à peine sont nees
 Ces belles Fleurs, qu'elles sont ia fennees.

Je n'auois pas acheué ma complaincte,
 Que incontinent la Cheuelure paincte,
 Maintenant veue en la Rose excellente,
 Tomba aussi par cheute violente
 Dessus la terre, estant gobe & iolie
 D'ainsi se veoir tout à coup embellie

Du tainct des Fleurs cheutes à l'environ,
 Sur son chef brun, & en son vert giron:
 Mais la Rosee (encor) les luy souilloit:
 Car le Rosier que le Iour despoilloit,
 Veul l'accident de si piteux vacarmes,
 La distilloit en lieu d'amerès larmes.
 Tant de Ioyaux, tant de Nouveautez belles,
 Tant de Presens, tant de Beutez nouvelles,
 Brief, tant de Biens que nous voyons florir
 Vn mesme Iour les faict naistre, & mourir:
 Dont nous Humains à vous, Dame Nature,
 Plaincte faisons de ce que si peu dure
 Le port des Fleurs, & que de tous les dons,
 Que de voz mains longuement attendons
 Pour en gouster la iouyffance deuë,
 A peine (las) en auons nous la veüe.
 Des Roses l'aage est d'autant de duree,
 Comme d'un Iour la longueur mesuree,
 Dont fault penser les heures de ce Iour
 Estre les Ans de leur tant brief seiour
 Qu'elles sont ia de Vieillesse coulees,
 Ains qu'elles soient de Ieunesse accollees.
 Celle qu'hier le Soleil regardoit
 De si bon cueur, que son cours retardoit,
 Pour la choisir parmy l'espaisse nuë,
 Du Soleil mesme ha esté mescongneuë

*A ce matin, quand plus n'a veu en elle
Sa grand' Beauté, qui sembloit Eternelle.*

*Or, si ces Fleurs de graces assouuyes
Ne peuuent pas estre de longues vies,
(Puis que le Iour, qui au matin les painct,
Quand vient le soir leur oste leur beau tainct,
Et le Midy qui leur rid les raut)
Ce neantmoins chascune d'elles vit
Son Aage entier. Vous donc Ieunes fillettes,
Cueillez bien tost les Roses vermeillettes
A la rosee, ains que le temps les vienne
A deseicher: Et tandis vous souuienne,
Que ceste vie, à la mort exposee,
Se passe ainsi, que Roses, ou Rosee.*

*Epistre. A ma Dame Marguerite, fille du
Roy de France.*

*Heureuse Fleur de franche fleur issante,
Fleuron Royal, Marguerite croissante,
Qu'attendez vous du pouré Dedalus?
Qu'attendez vous? voulez vous des Salutx.
Vn milion? vrayment vous en aurez,
D'or ne seront, toutes fois, ny dorez,
Ce nonobstant qu'ilz soient prins au profond
Du bon thresor, ou les meilleurs se font,
Qui est le cueur, le cueur de moy, prou riche*

En tel auoir, dont iamais il n'est chiche.
 Salut vous doit Celuy qui seul le peult,
 Et sans guerdon sauue celuy qu'il veult:
 Salut vous doit le Pere par son Filz,
 Oultre lequel n'est nul salut prefix:
 Salut vous doit Cil qui voulut sauuer
 Tous les perduz, & sceut Salut trouuer:
 Salut vous doit Celuy qui sauue l'homme
 Bien mieulx gratis, que par argent à Romme:
 Salut vous doit Celuy qui mort souffrist,
 A celle fin que salut nous offrist:
 Salut vous doit, mille fois soit il dict,
 Celuy qui seul ha de Salut credit.

Ay ie faulsé ma foy à vous promise?
 Ces Salutx là sont ilz de bonne mise?
 S'ilz ne sont bons ie les vous changeray,
 Et bien soudain d'autres en forgeray,
 Ou faulusement contre Iustice & Loy
 Auec l'or pur meslerons d'autre alloy:
 Mais ie suis seur que vous vous contentez
 Bien de ceulx cy, sans que vous me tentez,
 Et essayez pour vous en contrefaire
 De ceulx desquelz on n'a pas grand affaire.
 Or ie voudrois bien scauoir & entendre,
 Qui vous esment vostre largesse estendre
 Par deuers moy, qui vous suis incongneu,

Et dont

Et dont iamais ne vous est aduenu
 Service aucun? Ha, i'entends vostre entente,
 Vous aymez tant & tant la vostre Tante,
 Que tout cela qu'estre à elle scauez,
 (Pour l'amour d'elle) en grand amour auez:
 Dont quand ce vint qu'ouyistes le propos,
 Que de santé n'estoit plus au repos
 Le sien seruant nommé Bonaventure,
 Pour luy vn don de douce confiture
 Donnastes lors à Frotté, secretaire,
 (Lequel ne peut des cieulx le secret taire)
 Qui tost à moy, de par vous, l'apporta.
 Lors vostre nom tant me reconforta,
 Que si i'ay faict de guarir bon deuoir,
 Ce ha esté plus tost pour vous reueoir
 Que pour tascher estre long temps en vie,
 Car autrement n'en auois nulle enuie:
 Et puis aussi pour craincte de soustraire
 (Par Mort qui scait tout à sa corde attraire)
 A vostre Tante vn seruant si fidele,
 Qui ayme tant l'honneur & profit d'elle,
 Qu'il se voudroit soy mesmes oublier
 Pour le Renom d'icelle publier,
 Ce qu'il ne peut, veu qu'il est si notoire
 Qu'il n'est besoing que langue ou escriptoire
 S'empesche ia pour cuyder entreprendre

A icel

A iceluy vouloir son vol apprendre,
 Car il est tel, son Renom, en tous lieux,
 Qu'il est congneu voire mesmes des Dieux.
 De Nom, d'Esprit, la nous representez,
 Et ses vertus de si trespres hantez,
 Que nostre Espoir ha prou cause & matiere
 S'il dict qu'en vous la doibt veoir toute entiere:
 Car vous aymez, tout ainsi qu'elle faict,
 Toute vertu, & hayez tout malfaict:
 Beaucoup prisez, tout ne plus ne moins qu'elle,
 La Poësie, & toute sa sequelle,
 Qui est scauoir, & science anoblie,
 Qui ne permet qu'on ignore ou oublie
 Chose qui soit qu'intelligence humaine
 Dedans le cloz de l'entendement maine.
 A cause d'elle eustes donc souuenance
 (Je n'y voy point nulle autre conuenance)
 Du Dedalus, quand maladie, las,
 Dernierement l'auoit prins en ses las,
 Dont il est hors prest à ruer l'enclume,
 Loué soit Dieu, & desia se remplume
 Pour s'en voler, s'il vous plait commander,
 En quelque lieu que les voudrez mander.
 Volera il aux faicts des Hesperides?
 Ira il veoir que font les Nereïdes?
 Voulez vous bien qu'il vole oultre les Cieulx

Pour espier si tant est soucieux
 (Comme lon dict) Iuppiter de ce monde?
 Descendra il là bas au Regne immunde,
 Que tient Pluton avecques Proserpine
 Trop enrichiz par Mort & sa rapine?
 Il volera par le trou Dauernus,
 Dont nulz Oyseaulx ne sont point reuenus,
 Et s'en ira aux champs Elisiens
 Si vous voulez, pour veoir les Anciens:
 Ou s'il vous plait que mieulx son vol esprouue
 Il volera iusques en terre neufue:
 Neufue ie dis, que trouuee on n'a point,
 Pour raconter les mœurs de poinct en poinct
 De ces Enfans, viuants en vraye enfance,
 A Dieu soyez noble Fille de France.

A Clement Marot, Pere des Poëtes
 François.

Mon Pere,
 I'ay veu mon Frere
 Accoustré mignonnement,
 Que ie m'en taise
 De l'aise
 Je ne pourrois bonnement.
 Il passe
 De telle grace

A CLEMENT MAROT.

Les cuydans luy ressembler,

Que mainte Muse

S'amuse

A le souuent contempler.

Son style

Coulant distille

Vn langage pur & fin,

Dont sont puysees

Risees

Ou lon se baigne sans fin.

La Tante

Tant florissante

S'en contente de formais,

Sa Renommee

Nommee

En sera à tout iamais.

Enuie

Iour de ma vie

Ne luy portay en mon cueur:

Ne scay à quelle

Querelle

Il me tient tant de rigueur,

De dire,

Qu'il marche & tire,

Tout oultre au plus pres de moy,

Sans qu'il me rie,

Ne die

Mot, dont ie suis en esmoy.

Fortune

Tant importune

Faiçt donc qu'on ne mest plus rien

Par Calumnie,

Qui nie

Au poure Innocent le Sien.

Vray Iuge,

Certain refuge

D'innocence en tout endroit,

Tien toy en contre,

Remonstre

Aux Ignorans mon bon droit.

Le Blason du Nombriil. A Iean des
Goutes, Lyonnois.

Petit Nombriil, milieu & Centre,

Non point tant seulement du ventre,

Entre les Membres enchaissé,

Mais de tout ce Corps compassé,

Lequel est Souuerain Chef d'œuure,

Ou naisuement se descœuure

L'art de l'ouurier qui l'a orné,

Comme vn beau Vase bien tourné,

Duquel tu es l'acheuement,

Et le

Et le bout, auquel proprement
 Celle grand' Chainé d'or des Dieux
 Tenant au hault Nombril des Cieulx
 Fut puis par iceulx attachee,
 Et petit à petit laschee,
 En auallant ca bas au monde
 Leur Poupine tant pure & munde,
 Qui leur donna, comme i'entends,
 Cent mille petis Passetemps
 Auant qu'elle fust descendue,
 Et des cieulx en terre rendue,
 Au reng de ses predecesseurs,
 Et au beau milieu de ses Sœurs
 Les Vertus & Graces benignes.
 Petit Neu, qui des mains Diuines
 Apres tout le reste parfaict
 As esté le fin dernier faict,
 Et manié tout freschement,
 Duquel tresheureux touchement
 La douce Memoire recente
 Tant te satisfait & contente,
 Qu'a peine à ton plus grand Amy
 Te veulx tu monstrier à demy,
 Ains te retires tellement
 Que tu ne parois nullement
 De peur que pollu tu ne sois

*Si l'humain touchement recois
Qui en toy le Diuin efface.*

*Petit Quignet, retraict, & place
De souueraine Volupté,
Ou se mussé la voulenté
De chatouilleuse iouissance,
Qui aux conuis d'auantnaissance
Seruis de Bouche au petit Corps,
Lequel ne mangeoit point pour lors,
Ains par toy sucçoit doucement
Son delicat nourrissement,
Dont le petit Poupin croissoit
A mesure qu'on le traissoit
Au flan gauche de la matrice.
O l'ancienne Cicatrice
De la rongneure doloieuse,
Que Deité trop rigoureuse
Feit iadis au poure Homfenin,
Animal sans fiel, ne venin!
Lequel, contre toute pitié,
Fut diuisé par la mytié,
Et faict d'un Entier tant heureux
Deux demys Corps trop langoureux,
Qui depuis sont tousiours errans,
Et l'un l'autre par tout querans
En grand desir d'eulx reünir,*

f

N'estoit

N'estoit le honteux souuenir
 De la Diuine cruaulté,
 Qui, nonobstant leur loyauté,
 Les vient si fort esfaroucher,
 Qu'ilz ne s'oseroient approcher
 Pour rassembler leur Creature
 Quand ilz se trouuent d'adventure,
 Sinon quelque fois en secret,
 Ou ilz desgorge le regret
 Qu'ilz ont de leur perte indicible,
 Essayans s'il seroit possible
 Que leurs NombriLz, ensemble mys,
 Deussent Vn de deux Demys,
 Comme ilz estoient premierement
 Auant leur desemparement.

Petit bout, petit but vniue,
 Ou le viser faulx & inique
 Ne peult atteinre de vistesse,
 Mais bien le loyal par adresse,
 S'il ne m'est possible en presence
 Te veoir, au moins en recompense
 Ay ie dequoy penser en toy,
 Car ie trouue ie ne scay quoy
 En toutes choses de Nature,
 Ayant la forme & pourtraicture
 De toy, NombriL, tant gracieux,

Et de celuy qui est es cieulx,
 Quand ne seroit ia que le mien
 Qu'en memoire de vous ie tien,
 Et considere iours & nuicts
 Pour tout soulas de mes ennuys.
 O Nombri! dont l'aise parfaicte
 Gist au Demy qui te souhaite,
 Lequel iamais ne sera aise
 Que franchement il ne te baise,
 En remembrance singuliere
 De l'union, iadis Entiere,
 Ou se peult trouuer iustement
 L'heureux poinct de Contentement.

Prophetie. A Guynet Thibault,
 Lyonnois.

Trois Compaignons de Basle bien en ordre,
 Et tant polis qu'il n'y ha que remordre,
 Mieulx vstitez aux perilz & hazards
 Que trois Hectors, ou bien que trois Cefars,
 Doiuent en brief (ainsi comme lon dict)
 Estre aduancez, voire en si grand credit,
 Que plusieurs gens de legere creance
 Mettront en eulx leur foy & esperance,
 Se promettans, moyennans leurs addresses,
 Ou grandz Malheurs, ou certaines Richesses:

f z Par

Handwritten signature: Jehan de...

Par ce qu'ilz ont ceste noble vertu,
 Que nul d'entre eulx ne fut onc abbatu,
 Ny ne sera, d'homme qui l'importune,
 Tant sont douez de Prudence & Fortune:
 Et ont, eulx trois, autant de force encores,
 Qu'il y en ha en Soixante trois Mores.

O qu'ilz auront autour d'eulx des flatteurs,
 Qui les tiendront comme legislateurs,
 Et les croyront, mesmes sans mot sonner,
 Mieulx que plusieurs par beaucoup raisonner !

Je ne scay pas s'ilz sont freres germains,
 Mais à les veoir au milieu des humains
 Ilz sont trop mieulx l'un l'autre ressemblans
 Que trois Pigeons, ou trois Papillons blancs,
 Et si sont tous d'une haulteur, ce semble:
 Ilz ne vont point qu'ilz ne marchent ensemble,
 Et quelque fois ne se trouuent que deux,
 Mais ces deux là ne sont moins hazardeux
 Que si le Tiers estoit en la presence.

Je ne diray meshuy ce que i'en pense,
 Pource qu'aussi de brief tout se scaura:
 Mais pour le moins sachez qu'il y aura
 (Entre ceulx là qui suyront leurs contentz.)
 Peu de Ioyeux, & plusieurs mal contentz.

A Ant

A' Antoine du Moulin, Mas-
connois.

L'homme de bien, de quelle graine aymee

La terre fut iadis si cler semee

Qu'a peine vn seul Apollo en trouua

D'vn milion, que tous il esprouua.

L'homme de bien, l'homme Sage & Prudent,

Est de Soymesme & Iuge, & president,

S'examinant iusques au dernier poinct,

Et si est tel qu'il ne luy en chault point

Que la court face, ou que le peuple die.

Il est semblable à la Sphere arondie

De l'vniuers, tout en soy recueilly,

Et par dehors tant rondement poly

Qu'vn brin d'ordure il ne peult amasser.

Son Passetemps est de soy compasser

Les longues nuictz de l'hyuer chassieux,

Et aux grandz Iours de l'este gracieux

A donner ordre au bastiment de Soy,

Que tant à poinct & à la bonne foy

De iour en iour il estoffe & cimente,

Qu'il n'a pas peur qu'il se iette ou desmente,

Ou qu'au droict coing ayt vne gauche pierre,

Tant bien l'asiet au plomb & à l'esquierre.

Il ha esgard sur tout au fondement,

Et aux appuys de son Entendement,

A ce qu'ilz soient tant proprement assis,
 Qu'ilz ne soient veuz peu fermes & massifz,
 Ce qu'on pourroit esprouver seurement
 Par y hurter du doigt tant seulement.
 De soir ne lasche au doux sommeil le cours,
 Qu'il n'ayt auant faict en soy vn discours,
 En espluchant poinct par poinct à seiour,
 Tout quant qu'il ha dict & faict celuy Iour.
 Ains que dormir songeons à nostre affaire,
 I'ay faict cecy, & cela reste à faire,
 (Dict il alors à Soymesme escoutant)
 I'ay tant perdu, i'ay gaigné tant & tant,
 A quoy tient il qu'on n'a point approuué
 Tel cas & tel, & que lon ha trouué
 Cestuy cy bon? Pourquoi l'ay ie louee
 L'opinion des mauuais aduouee,
 Que ie deuois de bonne heure changer?
 Pourquoi voyant quelque sot en danger,
 Ou le voulant releuer de langueur
 Ay ie tant prins les matieres à cueur,
 Que i'en sois veu esté passionné?
 Le mien Esprit s'est il point addonné
 A acquerir chose qu'il valoit mieulx
 Non desirer? O Fol malicieux,
 Que i'ay esté d'auoir trop plus aymé
 Vn peu de gain, que l'honneur-estimé!

Ay ie

Ay ie point dict de parolles cuyfantes ?
 Ay ie point faict de mines malplaisantes
 A qui que soit, dont ie l'aye offensé ?
 Pourquoi plus tost est mon faict dispensé
 A l'appetit de ma folle nature,
 Que pour l'aduis de prudence & droiciture ?
 Voyla comment l'homme Sage & discret
 Avec Soymesme, en son priué secret,
 Faict vn recueil de tous ses dictz & faictz
 Du iour passé, soient bons, ou imparfaictz,
 Se repentant des propos vicieux,
 Et contentant des actes vertueux.

Victime Paschalis Laudes. A Claude
 Feraud, Lyonnois.

Tous vrays Chrestiens se viennent presenter
 Pour humblement & de bon cueur chanter
 Digne louenge au Paschal Sacrifice:
 Le doux Aigneau ha bien faict son office
 Quant au recueil des Brebis esgarees.
 L'Innocent ha les faultes reparees
 De tous pecheurs esperans auoir grace.
 Vie Inuincible, & Mort qui tout embrasse
 Ont eu enhuy vn combat furieux:
 Mais le Seigneur, de Vie glorieux,
 Par mort vaincu en ha eu la victoire.

Vous, Magdaleine, en scauez bien l'hystoire,

Comptez nous en ce que veu en auez.

I'ay, dict Marie, ainsi que vous scauez

A ce matin le Tumbeau visité,

Dont Iesus Christ estoit resuscité:

Duquel viuant i'ay la gloire immortelle.

Veüe & congneüe. Et de ceste nouvelle

Tesmoings en sont les Saints, et benoists Anges,

Tesmoings en sont le Suaire & les langes

Que i'ay trouuez dedans le Monument.

Or me croyez quand ie vous dy comment

Christ nostre espoir, contre Mort, & Enuie,

Qui estoit mort, est retourné à vie,

Dont Mort se tient morte & anichilee:

Vous le verrez de brief en Galilee.

Il vault bien mieulx (& si est de besoing)

Croire Marie estant vn seul Tesmoing,

(Vn seul tesmoing, neantmoins veritable)

Que des Iuifz la tourbe detestable,

Estans encor en mensonge atterrez.

Nous sommes bien certains, & assurez,

Que Iesus Christ qui souffrit passion

Est vray auteur de Resurrection.

Donc, ô Vainqueur, & puissant Roy aussi,

Qui n'aez point pour vous fait tout cecy,

Ains pour monstrer celle grand' Amytié

Qu'a

Qu'auiez à nous : Ayez de nous pitié.

Pour le iour des Estraines. A Claude le
Maistre, Lyonnois.

Enfant Diuin, dont la Mere est Pucelle,
Par ce doux laiçt de la pure mammelle
Que maintenant vostre bouchette succe
En appaisant la douleur du prepuce
Que lon vous ha, vn peu bien rudement,
Enhuy couppé, soubz le commandement
De celle Loy pleine de peurs & peines,
Ie vous supply me donner mes Estraines
Vous qui avez bien voulu estre né
A ce qu'en fin l'homme fust Estrené,
Non point en chair, ny de choses charnelles,
Mais en Esprit d'estraines Eternelles.

Nouuel Enfant le plus beau des Humains,
Desquelz les biens sont tous entre voz mains,
A ce beau Iour que l'an se renouuelle,
Et prent de vous vne clarté nouvelle
Estrenez moy de quelque nouveaulté:
Mettez en moy vne telle beaulté
Par le dedans, que le dehors ne tasche
Fors à l'aymer, & d'aymer ne se fasche:
Et me donnez que i'estime en tout temps
L'auoir certain, qui rend les cueurs contents

f. s. Estre.

*Estre en Vertu, en Prudence, & Sagesse,
Non point en l'or de mondaine richesse,
Dont ie vous pry ne m'en donner grand' somme,
Tant seulement la charge d'un Preudhomme.*

*Cantique de la Vierge. A la Roynne
de Nauarre.*

*L'ame de moy soubz ceste chair enclose,
En nul viuant ores plus ne se fie,
Car elle estime, honnore, & magnifie
Le Seigneur Dieu par dessus toute chose.
Et mon esprit, pour la bonne assurance
De veoir la fin d'ennuyeuse tristesse,
Se resiouyt, & fonde sa ließe
En Dieu mon bien, & ma seure esperance,
Qui ha daigné, par douceur amoureuse,
Ietter les yeux sur son humble Seruante,
Dont à iamais, de toute ame viuante,
Dicte seray la plus que bien heureuse.
Vn tresgrand bien de grace incomparable
M'a faict celuy qui ha telle puissance
Que tout chascun luy rend obeysance
Pour son saint Nom à tousiours memorable.
Et sa Clemence, & pitié paternelle
Tousiours monstree aux siens de race en race,
Qui sont crainctifz deuant sa sainte Face,*

Demeurera à iamais eternelle.

Il ha haulsé par vaillante surprinse

Son puissant bras tout orné de victoire:

Et pour monstrier sa souueraine gloire,

Des orgueilleux ha rompu l'entreprinse.

Ceulx qui auoient l'autorité pleniére,

Contrainct les ha de leurs sieges descendre,

Pour plainement restituer & rendre

Aux plus petis, la dignité premiere.

Aux affligéz de famine & greuances,

Qui se païssoient de langueurs & destresses,

Il ha donné les plus grandes richesses,

Et renuoyé les riches sans cheuances.

Estant recordz de sa Pitié louable,

Dont ses plus chers il recoit & embrasse,

Nouvellement luy ha pleu faire grace

A Israël, son seruant variable,

En ensuyuant la promesse assuree

Qu'il fait aux chefz de nostre parentage,

A Abraham, & à tout son lignage,

Lequel sera d'immortelle duree.

Le Cantique de Simeon. A la-
dicte Dame.

Puis que de ta promesse

L'entier accompliment.

Octroye

Octroye à ma vieillesse
Parfaict contentement,
L'attendray, sans soucy,
De la mort la mercy.

L'estincelle derniere
De mes ternissans yeux
Ont veu de ta lumiere
Le Rayon gracieux,
Dont ie suis esblouy,
Et mon cueur resiouy.

Le Rayon pur, & munde,
Que tu as enuoyé,
A fin que ce bas monde
Ne fust plus desuoyé,
Car son lustre obscurcy
En sera esclarcy.

Ta clarté preparee
Qui de loing reluyra,
A la gent esgaree
Par tout esclairera,
Et ton peuple affoibly
Sera lors anobly.

D'Auarice. A Helias Boniface d'Auignon.

Voyant l'homme Auaricieux,
Tant miserable & Soucieux,

Veiller, courir, & tracasser,
 Pour tousiours du bien amasser,
 Et iamais n'auoir le loysir
 De s'en donner à son plaisir
 Sinon quand il n'a plus puissance
 D'en perceuoir la iouissance,
 Il me souuient d'une Alumelle,
 Laquelle estant luyfante & belle
 Se voulut d'un Manche garnir
 A fin de Couteau deuenir:
 Et pour mieulx s'emmancher de mesme
 Tailla son Manche de soy mesme:
 En le taillant elle y musa,
 En musant de sorte s'usa
 Que le Couteau bien emmanché,
 Estant desia tout ebreché
 Se veit gaudy par plus de neuf
 D'estre ainsi vsé tout fin neuf,
 Dont fut contrainct d'en rire aussi
 Du bout des dentz, & dist ainsi:
 I'ay bien ce que ie souhaittois,
 Mais pas ne suis tel que i'estois:
 Car ie n'ay plus ce doulx trencher
 Pour quoy taschois à m'emmancher:
 Ainsi vous en prent il, humains,
 Qui nous auez entre voz mains,

*Hors mis qu'on peut le fil bailler
 Au trenchant qui ne veut tailler,
 Mais à vieillesse esuertuee
 Vertu n'est plus restituée.*

Compte nouveau. A la Royne
 de Navarre.

*Vn bon Esprit (quand le beau Iour l'esueille)
 Soudain congnoist que ce n'est de merueille
 Si en ce poure & miserable monde,
 Prou de Malheur, & peu de bien abonde,
 Par ce qu'il voit (tout bien quis & compté)
 Plus y auoir de Mal, que de Bonté.*

*Je dy cecy me souuenant d'un Compte,
 Lequel est tel, que (certes) i'ay grand honte
 Toutes les fois que ie y tourne à penser:
 Si ce n'estoit que i'ay peur d'offenser
 La netteté de voz chastes oreilles,
 Je le ferois, & vous orriez merueilles
 Touchant le faict de certains malefices.
 Mais s'il est vray que les propos de Vices
 Sont moins nuysans aux espritz Vertueux,
 Que de Vertu les Actes fructueux
 A gens peruers ne sont bons & vallables,
 Faire le puis: car voz mœurs tant louables
 Ia n'en seront pires, comme ie pense.*

Or dict

Or dict le Compte (à fin que ie commence
 Vous racompter ces estranges nouvelles)
 Qu'à Tours estoient quelques Sœurs assez belles,
 De beau maintien, & bonne contenance,
 De quel estat? Je n'ay point souuenance,
 S'il me fut dict qu'en Religion fussent,
 Ou qu'autrement de Nonnes le nom eussent:
 Mais tant y ha que de leur compaignie
 Autant estoient, que Nonne signifie,
 Qui souffiroit pour fournir vn Couuent.

Ces belles Sœurs (comme il aduient souuent,
 Que lon n'a pas tousiours avecques soy
 Gens de sa sorte, & de pareille foy)
 Ne scay comment s'estoient accompaignees
 De quelque Rouffe, ayant maintes menees,
 Mainte traffique, & plusieurs petis tours
 Autresfois faict en la ville de Tours:
 A dire vray, à peine eust on sceu faire
 Vne alliance au monde plus contraire;
 Car celle là estoit d'autre stature,
 D'autre facon, de toute autre Nature
 Que ces neuf Sœurs, lesquelles gentement
 Se contenoient, & fort honnestement
 Taschoient garder Fermeté immuable:
 Mais celle Rouffe estoit plus variable,
 Plus inconstante, & trop moins arrestee,

Que

Que n'est la plume au vent mise & iettee,
 Ou l'eau qui court par ces prez verdoyans.
 Qu'en aduint il? Vn tas de gens, n'ayans
 Autre soucy que d'auoir bon loysir
 De satisfaire à leur mondain plaisir,
 Voyans ces Sœurs, & leur Compaigne, telles
 Tindrent propos de se ruer sur elles,
 Et en commun les trousser sur les rencz,
 Sans aduiser qu'ilz estoient tous parentz,
 (Freres germains la plus part, & Cousins)
 Ny sans auoir honte de leurs voysins.

Or, pour iouyr d'elles plus aiseement,
 Ilz feirent tant, que tout premierement
 Eurent pour eulx celle là que i'ay dict,
 Laquelle auoit tout moyen & credit
 Enuers les Sœurs: & si estoit propice
 Pour faire aux gens tout plaisir & seruice
 En tel endroict, selon leur vueil & guise.
 Se voyant donc incitee & requise
 Par telles gens, l'habille macquerelle
 Delibera de porter la querelle
 De leur legere & folle vouldenté,
 Pour de ses Sœurs vaincre la Fermeté.

Tant tournoya, tant vint, & tant alla,
 Que d'une, ou deux, la Constance esbranla,
 Et à la fin si bien la conuertit,

Que tout à plat sur le champ l'abatit,
 Dont aux gallantz moult ioyeux & contentz,
 (Qui ne cherchoient pas meilleur passetemps)
 Creut le desir avecques l'esperance
 D'auoir la reste, au pourchas & instance
 De ceste là, qu'ilz feirent prou trotter,
 Sans luy donner le loysir d'arrester:
 Mais bien souuent (si l'un d'eulx s'y mettoit)
 La poure sotte aux piedz foulee estoit
 En recompense, & pour mieulx luy apprendre
 A se haïster, à celle fin de prendre,
 Et attrapper les Sœurs plus cautelement:
 Ce qu'elle fait, de sorte, que vrayment
 Les poures Sœurs, avecques leur Constance,
 Ne sceurent tant faire de resistance
 A l'importun & ardant appetit
 De ces gens là, que petit à petit
 (Soubs tant d'efforts, soubs tant d'assaults diuers)
 Toutes en fin ne cheussent à l'enuers:
 A quoy aussi celles qui se laissoient
 Ainsi gaigner, aydoient, & s'efforcoient
 Pour le plaisir de ces bons gaudisseurs)
 A ruyner quelqu'une de leurs Sœurs,
 Tant bien aprins auoient l'art, & adresse
 De celle là, qui en estoit maistresse.
 Quant aux Gallants, tant creut leur ardeur grande,

Et pour vn temps fut si chaulde & friande,
 Qu'a chasque fois qu'ilz se prenoient à elles,
 Contents n'estoient d'une, ou deux des plus belles:
 Mais bien taschoient ces hommes peu rassis,
 A leur coucher en auoir cinq ou six.

Conclusion: quand tout fut despendu,
 Et le beau temps trop follement perdu,
 En les laissant toutes desemparees,
 Fort mal en ordre, en maintz lieux esgarees,
 Du pied au cul gentement leur donnerent,
 Puis à la fin vous les abandonnerent
 A tous venans: Chose presque increable,
 Mais neantmoins certaine & veritable,
 Dont on deuroit faire inquisition,
 Et quant & quant iuste punition.

Chant de Vendanges. A Alexis
 Iure, de Quiers.

Ca, Trincaires,
 Sommadaires,
 Trulaires, & Banastons,
 Carrageaires,
 Et Prainssaires,
 Approchez vous, & chantons,
 Dansons, saultons,
 Et gringottons

Puis

Puis que l'auons en la danse
La Nonuieillissable Enfance.

Sa presence

Nous dispence

De Sageffe, & grauité:

Sa prudence,

Nous agence

Le train de Ioyeuseté.

Sa Gayeté

Ha inuenté

(Contre toutes fascheries)

Misteres, & mommeries.

Maint Satyre

Se retire

Des Vignes à la maison,

Tant pour rive,

Que pour dire

Des sornettes à foyson.

C'est bien raison,

(Veul la Saison

De vendange tant chérie)

Qu'on meine ioyeuse vie.

La Gabbie

Ia rougie

Du sang des bruns Espirans,

Coule, & trye,

(Comme pluye)
 Les ius des blancs Sperollans,
 Des Rouuergans,
 Des Picquardans,
 Des belles grappes Muscades,
 Pellefedes, & Oeillades.

En sa Tine

Propre, & digne,
 S'egaye l'enfant Diuin,
 De sa quine
 Tant benigne
 Y ayde à pisser le vin:
 La le Poupin
 Sur vn raisin
 (Lequel luy sert de Carraque)
 Va nageant parmy la Racque.

Tant se fie,

Glorifie,
 Et vanté en sa rouge mer:
 Qu'il deffie
 La mesonie
 De Regret rude & amer:
 Sans soy armer,
 Il peult charmer
 (Au seul flair de sa grand' Couppe)
 Des Soucys toute la trouppe.

Rix, Careffes,
 Gentilleffes,
 Plaisirs, Esbatz, & Repos,
 Jeux, Lieffes,
 Hardieffes,
 Caquetz & menuz propos,
 Espoirs dispos,
 Ses bons Suppostz
 (Ou qu'il voyse) l'accompaignent,
 Et avecques luy se baignent.

Resueries,
 Baueries,
 Gasouillent là au profond.
 Batteries,
 Et Follies,
 Leurs babines y refont.
 Noyses au fond
 Dorment, ou font
 Le guet, avecques Crierie
 La Snyte d'Yurongnerie.

Luy se touille,
 Et se souille,
 De Marroquins, & Foiratz,
 Il gargouille,
 Il barbouille,
 Il se tainct iambes, & bras:

CHANT DE VENDAN.

Puis (s'il est las)

Pour son soulas

Il succe les goutelettes

De ses Hugues rondelettes.

Quand il nouë,

Ou se iouë:

Silenus riant sans fin,

Faiët la mouë,

De sa iouë

Plus rouge qu'un Cherubin:

Mais le Lubin,

Des le matin

Ha tant haulsé la bouteille,

Que maintenant il sommeille.

Ha, bon homme,

Ton œil chomme,

Mais garde toy qu'au besoing

Cestuy somme

Ne t'assomme,

Car les Nymphes ne sont loing,

Ains en ce coing

Preennent ia soing

De venir faire deigade,

Si tu dors vne veigade.

O pure Vnde

Dont redonde

Toute

Toute douceur, & amour,
 La profonde
 Tine ronde
 Desdiee à ton Seiour,
 A ce bon Iour
 De ton retour
 (Veu d'antan la souuenance)
 Prent du futur esperance.

Du Ieu. A George Renard
 Lyonnois.

Telle est du Ieu l'ordonnance & police:
 Quand vous iouez ne soit par Auarice,
 Qui aux espritx n'acquiert que fascherie.
 Hommes discretx iouez sans tromperie:
 Vous apprentiz, les maistres deuez croire,
 Mais que chascun pose de sa memoire
 Les appetitz de son ardent courage
 Quant & l'argent, ou ce qu'il met en gage.
 Par ce moyen à celuy qui perdra,
 D'auoir perdu non plus il ne chauldra,
 Comme de chose estant pieca perdue
 Que trop en vain il auroit attendue.
 Vous qui auez rentes, & force escuz,
 Si de Fortune estes matx & vaincu
 Il ne vous fault colerer nullement.

Iouer deuez pour plaisir seulement:
 Mais tel y vient riche, ioyeux, & miste,
 Qui s'en reua poure, peneux, & triste.
 Quiconques est chault au ieu, si se garde,
 Car le malheur tombera, quoy qu'il tarde.
 Les gens de bien scauent passer le temps
 En bonne paix, sans courroux ne contentz.
 Somme, il ne fault iouer fascheusement.
 Celuy qui perd, perde ioyeusement
 S'il est possible, au moins (si ie scay dire)
 N'en prenne en soy aucun despit ou ire,
 Veu qu'on ne peult estre tousiours heureux.
 Et puis le Ieu est bien tant dangereux,
 Tant variable, & plein de desuerie,
 Qu'il est tenu pour la quarte furie.
 Or domptez donc ces cueurs tout à loysir,
 Pour puis apres mieulx iouer à plaisir:
 Et faictes fin à voz ieux & debatx,
 Ains que venir aux iouxtes & combatx.

Des mal contens. A Pierre de Bourg
 Lyonnois.



Ont vient cela, mon Amy Pierre,
 que iamais nul ne se contente de son
 estat, soit que Fortune le luy ayt of-
 fert & donné, ou que luy mesmes
 l'ayt

Horace

personne n'a
 contentemēt.

l'ayt choisy pour certaine cause & raison? Que les Marchands sont bienheureux, dict le vieil souldart qui se sent tout rompu de peine et de coups. Et au rebours, celuy qui est dessus la Mer en marchandise, dict ainsi quand il faict tormente: Il faict bien meilleur à la guerre: qu'il ne soit vray, on s'y escarmouche de sorte qu'en vn moment vient ou mort, ou ioyeuse victoire. Le Conseiller, ou l'Aduocat (quãd il oyt le Soliciteur hurter deuant iour à sa porte) louë l'estat du laboureur. Le Paysant qui vient de loing pour comparoistre à sa iournee dict, qu'il n'y ha heureux que ceulx qui ont leur demeure en la ville. Et tant d'autres semblables choses, que Fabius ce grand causeur se lasseroit à les cõpter. Mais (à fin que ne te tienne trop longuement) escoute vn peu là ou c'est que tend mon propos. Si quel que Dieu disoit ainsi à telle maniere de gens: Ca, que ie donne à vn chascun de vous ce que plus il desire. Toy qui estois Souldart, n'agueres, à ce coup Marchant deuiendras. Et vous Monsieur le Conseiller, serez bon homme de village. Or puis qu'auex changé d'estatz vuydez d'icy, allez vous en, Sus, haye auant, qu'attendez vous? Sire Dieu, ilz grattent leurs testes, c'est signe qu'ilz sont mal contens. Et toutesfois ilz peuuent estre tous bien heureux, selon leur dire. A quoy tient il que Iupiter, voyant cela, ne se despitte à bon droit contre telles gens, disant que plus ne

Fabius grand
causeur.

L'hõme ayãt
ce qu'il sou-
haittoit.

Dieu ne scau-
roit les hom-
mes cõtenter.

escouterà vœux, ne prieres, qu'on luy face? Au reste à fin que ce discours ne semble à celuy d'un plaisant, qui ne tasche qu'à faire rire, combien qu'il n'est pas defendu qu'en riant lon ne puisse dire & remonstrer la verité: Comme font les bons Magisters, qui donnent aucunesfois aux petis enfans des lettres faictes de marcepains, pour mieulx les leur faire cōgnoistre. Mais laissons risees et ieux, & parlons à bon escient.

Ancienne mode d'enseigner les petis enfans.

Pourquoy c'est que les hommes prennent tant de peines à amasser des biens. Le petit Formy nous est un grand exemple.

Le Laboureur, le Tauernier, le Souldart, & les Mariniers qui par toutes mers vont, & viennent, se disent tant prédre de peines à celle fin qu'en leur vieillesse ilz se puissent mettre à repos, voyantz qu'ilz auront de quoy viure: Comme faict le petit Formy, de grand labeur parfaict exemple, qui porte & traîne à tout sa bouche tout cela qu'il peult au monceau qu'il faict, luy qui n'est ignorant, ny nonchalant de l'aduenir. Puis en hyuer durant les neiges, qu'il ne

Contentement trouué au Formy, & non point en l'homme.

peult aller nulle part, il vit content en patience, usant des biens qu'il ha acquis. Mais toy, il n'est si grand chaleur, froid, feu, eaux, ny autres dangers, qui iamais engarder te puissent d'aller, & venir, pour le

Le plus grand mal gist en Opinion.

La raison de ceulx qui mettent en tresor.

gaign. Brief, il n'y ha rien qui te nuise. pourueu qu'un autre n'ayt le bruyt d'estre plus riche que toy. Pourquoy caches tu dedans terre les gros monceaux d'or, & d'argent? Pource que si tu en prenois tant ne quāt ilz pourroient décroistre en fin iusques à un denier.

Voire

Voire, mais si tu n'en prens rien, qui ha il de bon, ou de beau au tresor ainsi amassé? Je prens le cas qu'en ton grenier ayes de bled cent mille muidz: Si n'en entrera il pourtant point plus en ton ventre qu'au mien: Comme si lon te menoit vendre avec plusieurs autres esclaves, & ta charge fust de porter le pain de la prouision, nonobstant ce, tu n'en magerois non plus que cestuy là qui rien ne porte. Or ca, dy moy, quand l'homme vit selon nature, & par raison, que luy doit il chaloir s'il ha ou cent, ou mil arpans de terre? Tu me diras qu'il faict bon prendre, tant soit peu, d'un bien grand monceau. Ouy, mais si tu me confessois que i'en prens autant d'un petit, pourquoy donques louë tu tant tes greniers au pris de mes arches? Il en est certes tout ainsi que si tu auois grand besoing d'un seau, ou d'une esguiere d'eau tant seulement, & tu me disses que tu l'aymerois beaucoup mieulx puyser en vne grand' riuere qu'en ceste petite Fontaine. De là viët que le fleuve Aufidus, lequel est si impetueux, emporte avecques le riuage ceulx là qui ayment abondance plus grande qu'il n'est necessaire. Mais cestuy là qui n'a disette que de ce qui luy faict besoing, iamais ne beura son eau trouble, & ne mourra en la puyfant. Toutesfois la plus part des hommes deceuz par faulse couuoitise diroient que ce n'est point assez. Que ferois tu de telles gens? laisse les estre miserables, quand

de si

Si tu es riche disne roy deux fois.

Cõparaifon.

Nature se cõtente de peu.

Superfluité inutile.

Opiniaftreté dangereuse.

Aufidus, fleuve impetueux

Contentemët

Miserables volontaires.

- Compte Ancien. de si bon cueur ilz le veulent : Comme lon racompte d'un homme qui estoit iadis à Athenes, fort riche et auaricieux, lequel se souloit ainsi rire de ceulx qui se mocquoient de luy. Le peuple (disoit il) me hue tousiours quand ie vois par la ville, mais quand ie suis en ma maison ie me louë & flatte moy mesmes, lors que ie viens à cõtèmpler l'argent qui est dedans mes cofres. Tātalus est au fond d'enfer en un fleuue iusques au col, & quand il se baïsse pour boire, l'eau s'enfuyt de deuant ses leures. Pourquoy ris tu ? c'est de toy mesmes que le nom seulement changé, la fable est feincte & racomptee. Tu dors dessus tes sacz d'escuz en en souhaittant d'auantage, & comme si c'estoient reliques, es contrainct de t'en abstenir, & n'en prendre que le regard, tout ainsi que d'un tableau painct. Tu ne scais point que vault l'argent, ny à quoy c'est qu'il peult seruir. Achetes en du pain, des choulx, du vin, & tout ce dont nature ha necessairement besoing. Trouues tu bon viure tousiours en craincte, faire le guet tant de iour que de nuict, te doubter du feu, des larrons, & de tes seruiteurs aussi, qu'ilz ne te pillent & desrobent. Quant à moy, ie serois content d'auoir tout le temps de ma vie tousiours faulte de ces biens là : mais si tu as quelque frisson de fieure, ou que tu sois du tout au lict malade, tu as qui te visite & pense, & qui s'en va au Medecin le prier qu'il
- Cinq cens de telz, pour le iourd'huy, en chasque ville.
- Fable de Tantalus.
- L'auaricieux n'ose toucher à son argent, non plus qu'à choses sacrees
- A quoy est bõ l'argent.
- Les biens que l'auaricieux a de ses escuz.
- te ren

te rende sain à tes enfans, tes parentz, & amys.

Dis tu? ta femme, ny ton filz, n'ont que faire de ta santé. Les voysins, ceulx qui te congnoissent, et mesmes les petis enfans, tous te hayent mortellement. Et

Les parens & amys de l'auaricieux.

puis veu que tu ne fais compte de rien qui soit fors que d'argent, t'esmerueilles tu que personne ne te porte l'amytié que tu n'as defferuyé? Si tu penses entretenir les parètz que Dieu t'a dōnez sans grace ny moyen

L'auaricieux n'ayme rien q̄ l'argent, ausi n'cst il aymé de personne.

quelconque, & tes amys semblablement, tu t'abuses bien, malheureux: Autant que celuy qui voudroit

Cóparaifon.

brider vn Asne, & luy apprendre à courir en vne campagne. Finablement metz vn arrest, & vn but

On deuroit mettre vn but d'acquérir.

en cas d'amasser, si que tant plus auras de biens, tant moins tu craingnes poureté: & cōmence à faire vne

fin de trauailler, puis que tu as cela que tant tu desirois. Qu'il ne t'en prenne tout ainsi cōme il fait à Vuidius, le compte n'en est gueres long, lequel estoit riche

Le compte de Vuidius.

à merueilles: toutesfois pour plus espargner, tāt estoit

villain & auare qu'il ne s'accoustroit autrement que en simple vallet ou esclaué, de peur qu'il auoit d'auoir

faulte de viures, iusques à la mort. Mais vne garse la plus forte d'entre toutes les Tyndarides luy bailla vn

coup de coignee, & le fendit par le milieu. Comment veulx tu donc que ie viue? comme le chiche Neuius,

Neuius auare, Nomentanus prodigue.

ou Nomentanus le prodigue? Voicy merueilles: car tu cuydes en confrontant choses contraires, les ioindre

l'vne

l'une auprès de l'autre, de sorte que rien ne moyenne. Quand ie te deffendz d'estre auare, point n'entendz que fois despè;ier. Dea, quelque chose y ha il entre les lendes de Bourdeaux, & les montaignes de Sauoye.

Moyen en toutes choses.

Il y ha moyen en toutes choses, & avec ce certaines bornes, hors lesquelles ne ca, ne là, le droict ne scauroit consistèr. Or ie reuiens dont suis sorty. Que per-

Qui veult auoir cõtente-ment ne doit estre ny auare, ny enuieux sur autruy.

sonne ne se complaise en estant auaricieux: Et qu'il ne louè, ou esmerueille l'estat et fortune d'autruy: qu'il ne trã;isse de douleur de veoir la Vache à son voysin auoir plus de laiçt que la sienne. Qu'il ne se glorifie d'estre plus riche & plein que beaucoup d'autres, se efforcant passer en richesses puis cestuy cy, puis cestuy là. De là voyons nous aduenir, que le plus riche & aduancé met tousiours quelque empeschement à ce-

Cõparaifon.

luy qui cuyde aller oultre: Comme celuy qui court au pris, boute ou retient son compaignon, qui tasche gagner le deuant, en se gaudissant des derniers lesquels il ha desia passez. Et ceste est la cause dont vient que peu en trouuons qui se vantent d'auoir heureusement

Peu de gens s'en vont cõtés de ce monde.

vescu: & qui à la fin de leurs iours s'en voisent contents de ce monde, ainsi qu'on faict saoul & repeu de quelque sumptueux banquet. Or c'est assez, & à fin que ne cuydes que i'aye pillé tous les coffres du bon homme Crispin le chas;ieux, ie n'en diray pas un mot d'auantage.

Crispin le chas;ieux, philosophe du tẽps d'Esopè.

A mon

A mon petit, & grand amy, Robert
de Andoſſille.

S.

Petit Robert, d'une petite epiſtre
Je te ſalue, & ſi ie te chapitre
Petitement, d'un petit & bas ton:
Car ie ſcay bien que tu es un chatton,
Qui n'as ſoucy, en ce ſoucieux monde,
Sinon de faire ou le caca immunde,
Ou de crier avecques ta gorgette,
A celle fin qu'un tetin on t'y iette
Pour t'appaiſer: ou à fin qu'on te berſe
Comme un Monſieur couché à la renuerſe:
Et le meilleur de toute ta beſongne,
C'eſt quand tu tiens une riante trongne,
Reconnoiſſant ton amyable Pere,
(Auquel tout puiſſe eſtre ſauf, & proſpere)
Ou quand ſoubris, faiſant ſemblant d'eſtre aiſe,
A celle fin que ta Mammam te baiſe.
Voyla ton beau, & ſainct gouvernement.
Depeſchez vous, ſus, mauuais garnement,
De mignoter, crier, bauer, & rire,
Pour en l'eſchole aller lire, & eſcrire,
Si parlerez de quelque beau ſecret
A voſtre Pere, en langage diſcret,
Dont voſtre Mere en aura grand' enuie,

Alors

Alors, Robert, si Dieu nous tient en vie,
 Tu requerras tes deux nobles Parrains,
 Qui de ta Foy sont Pleiges souuerains,
 Et ta Mairaine, aussi, laquelle t'ayme,
 Qui te diront l'Espoir de ton Baptesme,
 Dont tu viuras comme les bons Chrestiens:
 A Dieu sois tu, Robert, & tous les tiens.

Le Cry, Touchant de trouuer la Bonne
 Femme.

Mulierem fortem, quis inueniet. Prouer. 31.

A la Royne de Nauarre.

Qui est ce qui trouuera,
 Ou scaura
 Femme bonne, & vertueuse?
 Le guerdon qu'il en aura
 Passera
 Toute perle precieuse.
 Le cueur du mary d'icelle
 Ne chancelle,
 Mais en elle ha sa fiance:
 Faulte n'aura telle quelle
 Pres la belle,
 De despouilles & cheuance
 Tout le temps de son viuant
 Met auant

Le bien enuers iceluy,
 Non pas le mal deceuant,
 Que souuent
 On voit commettre aujourd'huy.

Elle applique son desir
 Pour choysir
 Et du lin & de la laine,
 Et en besongne à loysir,
 Son desir
 Est de prendre soing & peine.

Elle est de telle maniere
 Mesnagere
 En tout ce que faiçt besoiing,
 Comme la barque merciere
 Voyagere,
 Apportant son pain de loing.

Elle se leue de nuict
 Sans nul bruit
 Pour repaistre sa maison:
 Ses seruantes introduict,
 Et instruiçt
 Sa famille par raison.

Elle tresprudente, & sage,
 L'heritage
 Prent & vise soir & main,
 Y plantant vigne & fructage,

Labourage,
 Des fruictz de sa propre main.
 Ses reins, de puissance & force;
 Elle trouffe
 Pour ouurer à tout rebras:
 Alegre, plaisante, & douce,
 Non rebourse,
 Tousiours fortifie ses bras.
 Apres elle experimente
 Si la vente
 De sa marchandise est seure:
 Sa lampe sera luyfante,
 Esclairante,
 Tout le temps que la nuit dure.
 Elle entend à sa besongne,
 Tousiours songne
 A faire profit nouueau:
 Et à fin qu'elle besongne
 Elle empongne
 La quenouille, & le fuseau.
 Elle pitoyable & bonne
 Tend & donne
 Sa main, ou gist poureté:
 Et console, par aumosne,
 La personne
 Qui est en necessité.

Elle ne crainct morfondure,
 Ou froidure
 Aduenir à sa famille,
 Laquelle ha bonne doubleure,
 Et uesture
 D'escarlata tressubtile.
 Elle s'est faict des tapis
 De hault pris,
 De fin lin abondamment:
 Et sont de vermeil exquis
 Ses habitz,
 Qu'elle uest pour ornement.
 Le sien mary est congneu,
 Bien venu
 Aux portes de la cité,
 Là ou siege est cher tenu,
 Maintenu
 Entre gens d'authorité.
 Elle faict toile, & lincieux
 Precieux,
 Qu'elle vent & distribue,
 Et au marchant curieux,
 Soucieux,
 Liure surceintz de value.
 Force, avecques Dignité,
 Maïesté,

Sont en elle pour atour:

Et ris de ioyeuſeté,

Gayeté,

Donnera au dernier iour.

Elle ouure, par ſapience,

Et ſcience,

Sa bouche, dont bien deuife:

La loy de beniuolence,

De clemence,

Eſt deſſus ſa langue aſſiſe.

Sa maiſon qu'eſt comme vn Temple

Bien contemple

Que nul n'y ſoit pareſſeux,

En remonſtrant par exemple

Bon & ample,

Non manger le pain oyſeux.

Ses enfans ſe leuent tous,

Sus, & ſoubz,

Et la diſent bienheureuſe:

Auſſi le ſien noble eſpoux

Bon & doux,

La loue de face ioyeuſe.

Plusieurs filles ſe ſont miſes

Aux empriſes

Pour amaſſer grand auoir,

Mais toy, ſus leurs entrepriſes

As acq

As acquises
Richesses par ton deuoir.

Or, la grace est deceuable,
Et damnable,
Et trop vaine la beauté:
Mais la femme est moult louable,
Venerable,
Qui crainct Dieu en loyaulté.

Donnez luy de ses labeurs
Des fructz meurs
De ses mains en toutes sortes:
De ses œuures les meilleurs
Par honneurs,
La louent, deuant tous, es portes.

Au Roy François. De la mort
de son Filz.

Les Fatales destinees
Cruelles & obstinees,
Les Dieux & hommes contraingnent
A ce que larmes espraingnent,
Et la court de Iupiter
Ne se tient pas d'en ietter:
Iuno la playe ha gemy,
Que receut Mars son amy
De Diomedes rien qu'homme.

h 3

Et puis

Et puis vn chascun scait comme
 Iupiter print amertume
 De dueil, oultre sa coustume,
 Et ploura (pour tout guerdon)
 Son bien aymé Sarpedon,
 En ordonnant que les Dieux
 En iettassent larmes d'yeux.
 Ce n'est pas merueille aussi
 Si toy, François, fais ainsi
 Comme Iupiter ha faict,
 Que soulages le forfaict
 De Destinee enragee:
 Que si Niobe eagee
 Fust vefue d'un tel enfant,
 Qui fust autant triumphant,
 Elle (veu telle infortune)
 Fust trois fois pierre, pour vne.
 Donc à bon droict (que n'en mente)
 Le bon Pere se lamente:
 Ceulx là hommes ne sont pas,
 Qui ne pleurent ce trespas:
 Mais ilz sont plus tost pierre, eulx,
 Et plus que pierre, pierreux.

A luy mesmes.

François (que Dieu tienne en vie)

N'ayes

N'ayes sur ton filz enuie,
 Qu'il est possesseur des cieulx,
 Et ia compaignon des Dieux:
 Tous les honneurs & les biens
 De la court des cieulx sont tiens.
 Des accidentz & scandales
 Des trois Deesses fatales
 O Iupiter il dispose.
 Il s'eslouyt & repose
 Avec celestes douceurs
 Dedans le sein de ses Sœurs,
 De sa Grand' mere, & sa Mere.
 Ainsi Destinee amere
 T'a donc donné, neantmoins,
 Cinq Dieux, de cinq tiens humains:
 Quand ton temps passé auras,
 Le Six iefme tu seras.

Epitaphe de François Daulphin.

Premier nay du Roy

François.

Esperance gist icy,

Que tu n'ayes ce soucy

(Quoy que Pandora promette)

De l'esperer de sa boette:

Icy ont leur demourance

Et la boette & Esperance.

A la Royne de Nauarre.

Tes yeux ont veu ce qu'ilz n'esperoient pas,
 Dont larmoyans maintz ont faict larmoyer
 De ton Neueu le trop soudain trespas,
 Et ton bon Frere en larmes s'en noyer:
 Tu luy as veu à son debteur payer
 Le debte(las) lequel luy estoit deu,
 Toy vn Neueu, luy vn Filz ha perdu,
 Mais France en doit bien plus grand dueil auoir,
 Car tout l'esperoir d'elle y est respandu:
 Peuent tes yeux ce pourtraict en reueoir?

Bonauenture, à Marot. A son retour
 de Ferrare.

Maro en Marot, immortal Poète, l'honneur de ce
 temps, que veoir tant souhaitte, mes poures ver-
 setz crainctifz, & douteux ne s'osent mon-
 strer (tant ilz sont honteux) à vous, veu qu'ilz
 sont sans rithme & raison: dont ie vous salue en
 simple oraison, Priant (comme faict chascun à son
 tour) qu'il vous soit heureux ce ioyeux retour.

LES QUATRE PRIN- CESSES DE VIE

HUMAINE,

C'est à sçauoir, Les Quatre Vertus Cardinales,
selon Senecque.

*

AV LECTEUR S.

*Amy lecteur, qui lis, & qui entendz,
Et qui tousiours as pour ton passetemps
Liures en mains, ce petit t'est donné
D'un, qui combien qu'il soit abandonné
De tout sçauoir, & noble Poësie,
Ce nonobstant, par vne ialousie
Qu'il ha, de quoy chascun te baille à lire,
Il s'est voulu mettre aussi à t'escrire,
Contrefaisant le Singe, imitateur
De ce qu'on faict. Donques pour Translateur
Mè porte cy d'un liure, que iadis
Senecque emplist de sententieux dictz
Touchant le faict des Vertus Cardinales,
D'humain estat gouuernantes loyales,
Lesquelles sont ouvrieres diligentes,
Comme il affiert à mesnageres gentes,
Qui scauent hien conduyre par raison,
Et gouuerner le train de la maison.
Prudence y sert de Maïstresse d'hostel,*

h z

Bien

Bien au profit de son homme mortel:
 Car elle ha l'œil sur le faict, & à faire,
 Si que leans rien ne se peult meffaire.
 On y voit puis aller, & tracasser,
 Force, portant gros faiz, sans se laisser:
 Allegrement elle faict la besongne,
 Sans que iamais de rien se plaigne ou hongne.
 Hors de leans ne fault querre Attrempance,
 Elle se tient tousiours en la despense,
 Gardant sur tout que Voluptez friandes
 Secrettement ne rissent ses viandes.
 Iustice ayant ses propos aduenans,
 Y faict la court à tous les suruenans,
 Les recueillant avec benigne face,
 Faisant ainsi qu'elle veult qu'on luy face.
 Sent il pas bien ses douceurs immortelles
 L'estat conduict par mesnageres telles?
 Lesquelles sont Quatre en nombre parfaict,
 Qui de la vie en main ont tout le faict.
 Or tout ainsi que Lesbia fut mise
 La Quarte Grace, & Sappho fut admise
 A auoir lieu d'une Muse Dixiesme,
 Ainsi y ha vne Vertu Cinquiesme,
 Viue Vertu viuant en ceste vie,
 Que ie ne nomme, à cause de l'enuie
 Du Temps Present, aux Vertueux amere,
 Qui se

Qui se mocqua, mesme de son Homere,
 Lequel apres de la Posterité
 (Qui du Passé iuge à la verité)
 A tant esté aduoué & chery,
 (Veu son renom, qui n'est encor pery)
 Que sept citez debattent à puissance
 Pour soy nommer le lieu de sa naissance.

Ainsi à toy Posterité paisible,
 (Veu du Present l'iniquité nuysible
 Mescongnoissant ce que plus tu reueres,
 Et renyant ce qu'apres tu adueres)
 Laissons iuger de telle Vertu nee
 De nostre temps, diuine & incarnee,
 Ce neantmoins n'est du tout incongneüe:
 Car sa beauté contemplant, toute nuë,
 Maintz bons espritz en ceste chair mortelle,
 Confessans tous qu'il n'en fut onc de telle:
 Mais les malings qui sont en si grand nombre
 (Comme lon voit) qu'ilz font au Soleil vmbre,
 Iceulx malings (qui les bons tousiours picquent)
 A son vray loz de leur pouoir replicquent:
 Mais tant viuront que mort s'en ensuyura,
 Ainsi mourront, & la Vertu viura.

Or viue donc la Vertu vigoreuse,
 Par qui sa gent est plus que tres heureuse
 Pon son exemple, & benigne faueur

Qu'elle

Qu'elle ha à ceulx lesquelz prennent saueur.
 Tant aux Vertus qu'à diuine Science,
 Dont elle en ha l'entiere experience:

Or si ie faulx, toy Poëte François,
 Ie te supply que pardonneur franc sois:
 En maniant la Poëtique plume
 Pourtant Poëte estre ne me presume:
 Car tous ceulx là lesquelz de gueule chantent
 Chantres ne sont, ne pour Chantres se vantent,
 Pour bien chanter fault vaincre l'Alouette,
 Et toy aussi, pour se nommer Poëte.

V O U L O I R E T P O U V O I R.

DES QUATRE PRINCESSES
DE VIE HUMAINE,
C'est à sçauoir, Senecque des Quatre
Vertus Cardinales.

*



*E maints sçauãs les sentēces expresses
Ont diffiny de Vertus quatre especes,
Dõt l'humã sens orné (maugré enuie)
Peult acquerir l'honnesteté de vie.*

D'icelles donc vient la premiere en dance

Celle Vertu qu'on appelle Prudence:

Et la seconde est Magnanimité,

Puis Attrempance à son pas limité

S'en vient apres: La Quatriesme Princesse

Se dict Iustice, en qui tout le ieu cesse.

Vne chascune (ainsi que tout expres

Est annexé, & conioinct cy apres)

Le sien office ayant mis à effect,

Rend l'hõme honneste, et en mœurs biẽ parfaict.

P R V D E N C E.

*Q*uiconques donc aymes Prudence suyure,

Lors droictement par raison as à viure:

Premierement, poise tout, & estime

La dignité des choses legitime,

Comme elles sont, & selon leur nature,

Non

Non pas selon le plus à l'adventure:
 Car il en est d'aucunes, qui de race
 Bonnes n'estans, semblent bonnes de face:
 D'autres on voit pour non bonnes tenues,
 Qui bonnes sont, quand on les ha congneues.
 En grand' merueille, ou estime, ne tiens
 Aucunement quelques biens qui soient tiens:
 Car ilz sont tous pour quelque fois perir.
 Ce qu'est à toy, & quas peu acquerir
 En l'espargnant ia tant ne contregarde,
 Comme d'autruy chose donnee en garde,
 Ains pour ton faict (comme tien) le dispense,
 Et comme tien en vser tousiours pense.
 Si vne fois Prudence tu embrasses,
 Tousiours seras tout vn en toutes places,
 Selon le temps, & changement des choses:
 Pareillement fais que tu les disposes,
 Et qu'en nul faict tu ne te dessaissones,
 Mais que plus tost en mieulx tu te faiconnes,
 Comme la main, estre main ne delaisse,
 Soit qu'on l'estende, ou qu'en poing on la presse.
 Le Prudent doit (si Prudent onques veis)
 Examiner de plusieurs les aduis:
 Ne sois donc pas de credulité telle,
 Que croyes tost à mensonge, ou cautelle.
 Tais toy plus tost de la chose incertaine,

Que d'en ietter sentence trop soudaine.

N'affirme rien sans seure experience:

Car tout cela qui ha belle apparence

De verité, n'est pas vray, ne possible,

Comme souuent ce qui semble incredible

Premierement, n'est en soy faulx pour tant:

Car mainte fois Verité va portant

Le masque laid de mensonge attaché,

Et bien souuent le Mensonge est caché

Soubz la couleur de Verité bien miste:

Comme souuent chere rebourse & triste

Monstre l'amy, ou le flatteur plaisant

La monstre belle: ainsi s'en va taisant

Ce que n'est vray, soubz de vray la couleur,

Pour inferer tromperie & malheur.

St desir as de Prudent deuenir,

Prendre te fault esgard à l'aduenir:

Et à part toy premettre & pour penser

Ce qui se peult par fortune auancer.

Rien en tes faictz hastiueté ne prise,

Preuoy le cas auant toute entreprise:

Car le Prudent ne dict iamais cecy:

Pas ne cuydois qu'il en aduinist ainsi.

Point il ne doubte, ains attend & regarde:

Rien n'a suspect, mais il est sur sa garde.

D'un chascun faict quiers l'origine, à fin

Que

Que depuis là tu penses de la fin.
 Des cas y ha qui sont de tel affaire,
 Que tu les dous acheuer & parfaire,
 Si commencé les as aucunement:
 Et d'autres sont qu'attenter nullement
 Il n'appartient, dont la perseuerance
 N'a nul profit, ny aucune assurance.
Homme Prudent, iamais tromper ne veult,
 Aussi iamais estre trompé ne peult:
 L'homme qui est en bonté demourant
 Ne peult tromper aucun, mesme en mourant.
Tes dictz, propos, & aduertissemens
 Sentences soient, arrestz, & iugemens.
Pensemens sotz, & friuoles mensonges,
 Estans pareilz à inutiles songes,
 Et, comme on dict, des chasteaulx en Espagne
 N'aberge en toy, si que ton cueur s'y baigne.
 Que si tu viens le tien oyseux desir
 A recreer en iceulx à loysir,
 Apres que tout bien disposé auras,
 Fasché, pensif, & triste resteras.
Ton pensément ne recule en arriere,
 Soit qu'il dispose, ou que du cas s'enquiere,
 Ou sur le faict contemple en telle sorte,
 Et que iamais de verité ne sorte.
Le tien parler ne soit point deshonesté,

Mais

Mais qu'il conseille, ou bien qu'il admoneste
 Tou siours quelcun, qu'il enseigne, & console,
 Ou qu'il remonstre, & que point ne s'en saoule.

Peu de louenge, & moins de vitupere
 Baille à autruy: car autant d'impropere,
 Loz superflux & inconsideré
 Merite, & plus que blasme immoderé,
 De flatterie est tel loz, soupçoné,
 Et de tout mal tel blasme empoisonné.

A verité rendz loyal tesmoignage,
 Non à amour, congnoissance, ou lignage.

Auec aduis de promesse entre es las,
 Et la tiens miculx que promise ne l'as.

Si Prudent es, ou à Prudence tendz,
 Ton sens sera dispensé en trois temps:
 Le temps Present tresbien ordonneras:
 A l'aduenir bon ordre donneras:
 Et du passé auras le souuenir.

Cil perd sa vie, & n'en peult bien venir,
 Qui de ses iours les faictz passez ne compte,
 Et qui de ceulx qui viennent ne tient compte,
 Fol, oublieux bien appeller le fault:
 Car le lourdaut en tout choppe, & deffault.

Metz au deuant de ton entendement
 De l'aduenir les maulx expressement,
 A fin que mieulx les porter consideres,

Les biens aussi, à fin que les moderes.
 Ne sois fiché, ainsi que par despit,
 A la besongne, ains repos & respit
 Aucunes fois permetz à tes espritz,
 Auquel repos soient meslez & compris
 Les bons soucis d'estude de sagesse.
 Iamais Prudent ne languit de paresse,
 Il est bien vray que son esprit relasche,
 Mais il n'est pas pour tant recreu, ne lasche.
 Il sçait tant bien haster tardifues choses,
 Et deschiffrer les doubteuses & closes:
 Ce qui est dur sçait tresbien amollir,
 Et aspreté de chose aspre tollir:
 Ce qui est hault esleué, abaisser,
 Et sçait par ou il doit son faict dresser:
 Tantost congnoist dont les choses sont faictes,
 Et des experts il voit les entrefaictes
 Diligemment : par les claires & nues
 Sçait estimer les choses incongneues.
 Par les petis, les grandz & les haultains,
 Par les presens, les absens & loingtains:
 Aussi faict il le tout par ses parcelles,
 Et sçait congnoistre aux vieilles les nouvelles.
 Ne sois esmeu pour l'adueu & credit
 De celuy là qui la parolle dict,
 Et ne prens point esgard à la personne,

Mais seulement à ce que lon raisonne.

Pense sur tout & considere bien

Aux quelz plairas, & non pas à combien.

Ne cherche rien qui ne se puisse auoir,

Et estudie à ce qu'on peult sçauoir.

Soient tes desirs & tes souhaitz mis en ce.

Que desirer peuz des bons en presence.

Tascher ne dois en celuy lieu attaindre,

Ou trembler faille, & la descente craindre.

De bons conseilz salutaires te douë,

Lors que le bien te flatte & amadouë,

Et tout ainsi qu'en vn glissant passage

T'asseureras, tu ne serois pas sage

De te lascher impetueusement:

Mais tu dois bien preuoir songneusement

Ou va le cours, & ou c'est qu'il termine:

Ce que Prudence ha dict, si le rumine.

MAGNANIMITÉ,

ou, FORCE.

Q*Viconques donc est Prudent, si s'efforce*

Auoir en soy la magnanime Force,

Qui est aussi Magnanimité dicte.

Si de ton cueur elle n'est interdite,

Franc tu viuras avec grande constance,

Bien assuré, hors de crainte & doubtance.

Le plus grand bien, & douaire plus cher
 Du Magnanime, est de non trebuscher,
 Mais estre ferme, & sans rien s'esmouuoir:
 La fin de tout, considerer & voir.

Si tu es Fort, ou Magnanime, point
 N'estimeras que blessé t'ayt, ou poinct,
 Ton ennemy, & ne diras iamais
 Que luy t'ayt faict aucune iniure, mais
 Qu'il ha bien eu le vouloir de te nuyre:
 Et quand verras que l'auras peu reduyre
 A la parfin soubz ta main & puissance,
 Vengé te tiens pouoir prendre vengeance:
 Saches que c'est de vengeance l'honneur,
 Estre en vengeant de mercy franc donneur.

Par faulx rapport ne dois nul assaillir,
 Ny en secret sur personne saillir:
 Mais si tu veulx vaincre, vaincz en publicque:
 Et ne prens point à qui que soit la picque,
 Sans que premier à sçauoir ne luy faces:
 C'est au couart à vser de fallaces.

De Magnanime & Fort nom auras tu,
 Si tout ainsi que feroit vn testu
 Ou temeraire, en perilz ne te boutes,
 Et les perilz, comme crainctif, ne doubtés:
 Car rien ne rend le couraige paoureux
 Fors de mal viure vn regret langoureux.

CONTINENCE.

OR si tu es en amour Contenance,
 Laquelle est dictée autrement Attrempance,
 Retranche au tour les superfluités,
 Refrain les tiens souhaits de vanités,
 Considerant que nature requiert,
 Non ce qu'en toy Concupiscence quiert.

Si Attrempé tu es, & Continent,
 De toy seras content incontinent:
 Certes celuy est nay avec cheuance,
 Qui de soy mesme ha en soy souffisance.

Diligemment metz bride à tes desirs,
 Pour les garder de faire leurs plaisirs.
 Tous attraymens de volupté secrette
 Tirans les cueurs, d'avecques toy reiette.

Mange, non tant que le saoul ventre en rie,
 Boy sobrement, fuyant yrongnerie.

Ne t'abandonne aux delices presentes,
 Et ne souhaite en ton cueur les absentes.

Facilement soit ton viure appresté,
 Quiers la viande & non la volupté:

La faim plus tost ton appetit aguise,
 Que la saueur de la viande exquisite,
 Et soit de peu ton desir racheté.

Tu ne viendras iamais à poureté
 Viuant ainsi que le requiert nature:

Que si l'auoir de quelcun d'adventure
 Point ne luy semble estre assez plantureux,
 Et eust il tout, si est il malheureux.

Celuy qui bien poureté entretient,
 Riche & puissant chascun le iuge & tient.

Tant seulement à ce soing sois enclin,
 Que ta nature on ne voye à declin,
 Et comme si en ce te voulois plaire
 D'estre semblable au diuin exemplaire,
 Tant que pourras par deuers l'esperit
 Retire toy de ce corps, qui perit.

Ne cherche point les logis de plaisance,
 Contente toy d'estre en vn lieu d'aisance:
 Ne vueilles pas par la maison le maistre,
 Mais la maison par le maistre congnoistre.
 Et ne sois point de sens si contrefaiçt
 De t'imputer ce que tu n'as pas faiçt:
 Ne tasche point sembler & apparouïstre
 Ce que tu n'es, ou que tu ne peux estre.

Ta poureté ne soit d'ordure pleine,
 Aussi ne soit ton espargne villaine:
 Non à mespris soit ta simplicité,
 Ny fade aussi soit ta facilité.
 Et si tu as des biens petitement,
 Ne les tiens pas pourtant estroictement.

Ja ne te fault regretter ta fortune

Voyant

Voyant qu'elle est aux autres opportune.

Si Contenance est vers toy bien venue,

Fuy villenie, & n'attendz sa venue.

Tu ne dois point pour quelque faulte extresme

Tant chastier autruy, comme toy mesme:

Pense que tout peult estre supportable

Fors villenie inepte, & detestable.

Ne tiens propos salles, dont la licence

Couue & nourrit l'esbaudie impudence.

Tu dois aymer les propos vertueux

Plus que les doux, & les facetieux,

Et les bons motz, ou verité se fonde,

Plus que ceulx là qui coulent en faconde.

Mesler pourras aux choses serieuses

Aucunes fois des sornettes ioyeuses:

Mais tellement s'attrempent & astraignent,

Que dignité & honte ne s'en plaignent.

Le ris vrayment doit bien estre reprins,

Qui sans mesure en la bouche est emprins,

Ou esclatté tant que la gorge en fend,

Tel que le faict, ou la femme, ou l'enfant.

Le ris maling, fol, hault, & desdaingneux,

Ou du meschef d'autruy, est ris hayneux.

Si aux propos ioyeux es inuité,

Traicter les dois, auèques dignité,

Si sagement, que quelcun ne s'en fasche

De les ouyr, ou ne t'en tienne lasche.

En toy ne soit donc flatteuse risée,

Maintiens plus tost ciuilité prisee.

Tes plaisans dictz soient faictz sans mocquerie,

Tes motz ioyeux soient dictz sans resuerie,

Ton ris sans mouë, & sans cry ton parler,

Sans bruyt aussi doit estre ton aller.

Le tien repos tu prendras sans paresse,

Et ce pendant qu'au ieu chascun s'adresse

Tu penseras à toute saincteté,

Et traicteras chose d'honesteté.

Si Attrempance est de toy bien chérie,

Euitier dois les dictz de Flatterie,

Et craindre autant loz partant d'homme infame

Qu'estre loué pour vn blasme, ou diffame:

Resiouy toy, & te vueilles complaire

Lors que tu vois qu'aux meschās ne peux plaire:

Repute & tien pour vn loz esprouë

Par les meschans le blasme controuë.

Le souuerain chef d'œuure d'Attrempance

Est mettre aux dictz des flatteurs resistance,

Desquelz souuent le plaisantin langage

A volupté esbranle le courage.

Par flatterie (ou faulseté se brasse)

Enuers aucun ne te dois mettre en grace,

Et si quelcun vient à toy, celle voye,

Sans

Sans luy ouurir, dis luy qu'il se pouruoie.

Estre obstiné ne dois par arrogance,

Ny estre enflé de folle oultrecedance:

Humilier te dois, non mespriser,

Ou de l'estat la grauité briser.

Patiemment reçoÿ correction,

Tresuoluntiers oy l'admonition:

Que si quelcun t'a reprins à bon droict,

Saches qu'il t'a profité orendroit:

S'il t'a reprins sans point le meriter,

Saches qu'il t'eust bien voulu profiter.

Craindre ne dois iamaïs parolles aigres,

Mais crains plus tost les douces, & alaignes.

Sois l'ennemy du vice qui te tient,

Et de l'autruÿ (qui rien ne t'appartient)

Ne sois iamaïs enquesteur curieux,

Ny repreneur austere, & furieux:

Mais, toy estant correcteur sans reproches,

Souuienne toy que tellement approaches

Par charité la remonstrance faire,

Que courtoisie en conduyse l'affaire.

Facilement du meffaiet pardon donne:

N'esleue aucun, & n'abaisse personne.

Des proposans sois auditeur taisible,

Et rapporteur des dictz non confusable.

Au demandant rendz facile responce,

*Au querelleur, tost la noise renonce:
Soudainement en debat ne te monte,
Et (s'il en vient) par raison les surmonte.*

*Or si tu es Continent, si aduise
Du tien esprit, & de ton corps la guise,
Leurs mouuemens, qu'ilz ne soient trop laschez,
Et ne te fie en ce qu'ilz sont cachez,
Car rien n'y faict si aucun n'y prent garde,
Puis que ton œil en secret les regarde.*

*Muable sois, non pas leger, pourtant:
Et ne sois point obstiné, mais constant.
Et si tu as sapience, & sçauoir,
N'en cache rien, fais le plus tost sçauoir.*

*Ne te soit grief de faire à toy semblables
Ceulx qui à toy ne sont equiparables,
Sans fièrement les auoir à desdain.*

En bien viuant ne crains Prince mondain.

*Garde d'auoir de lascheté le vice,
Quand vient à rendre vn plaisir & service:
Si tu l'as faict n'importune l'oreille
De ton amy, requerant la pareille.*

*Sois amyable, & bening à chascun,
Et ne sois point doulx flatteur à aucun.
Ayes à peu familiarité,
Et pour chascun iuge à la verité.
Sois plus seueré au iuger, qu'au langage,*

Et plus

Et plus austere en vie, qu'en visage:
 Sois amateur de pitié, & clemence,
 En detestant cruaulté & vengeance.
 Seme tousiours bon bruyt de mieulx en mieulx,
 Et sur l'autruy ne sois point enuieux.

Si nouueautez, & souspeçons vas oyant,
 Ou vitupere, à ce ne sois croyant,
 Ains ceulx (lesquelz soubz ombre de simpleesse
 Veulent iouer quelque tour de soupplesse
 Au loz d'autruy, le querans impugner)
 Conuaincre dois, & leur bien repugner.

Tardif à ire, à courroux difficile,
 Prompt à mercy, & à pitié facile,
 Ferme & constant durant l'aduersité,
 Humble & discret en la prosperité.

Tu dois cacher tes vertus & biensfaictz,
 Ainsi que font les autres leurs forfaictz.
 De vaine gloire hayr dois les obiectz,
 Non rigoureux, ne rude à tes subiectz.
 De qui que soit ne blasme l'imprudence:
 Sois peu parlant, preste aux gens audience,
 Seuere sois sans nulle cruaulté,
 Non mesprisant ioyeuse priuaulté.
 Sois de sçauoir docile & amoureux,
 Et à instruyre autruy non rigoureux:
 Apprens cela dont en as l'ignorance,

Sans

Sans de sçauoir en faindre l'apparence.

IUSTICE.

DE la quatriesme il fault auoir notice
 Iustice dicte. Or qu'est ce que Iustice,
 Fors de Nature vne vnion taisible,
 Pour de plusieurs l'ayde, & secours paisible?
 Mais qu'est ce encor de Iustice, sinon
 De la Nature vne reigle, & canon,
 Diuine loy, & diuine sentence,
 Ou le lyen de l'humaine accointance?
 Ce qui conuient pres d'elle on ne demande,
 Car conuenable est ce qu'elle commande.
 Quiconques donc veulx aller apres elle,
 Premierement ayme Dieu d'un tel zele
 Comme tu es de luy aymé aussi.
 (S'il se peult faire) or l'aymeras ainsi,
 Si (comme il faict) tu tasches ainsi faire,
 Valoir à tous, & à nully meffaire,
 Lors auras tu le nom de Iuste acquis,
 De tous seras bien aymé, & requis.
 Que Iuste sois, tant seulement ne nuys,
 Mais des nuys sans empesche les ennuys.
 Il ne fault pas ce pour Iustice prendre,
 Ne nuyre à nul, ou en rien ne mesprendre:
 Car rien n'y ha encor de conuenance,

C'est

C'est seulement de l'autruy abstinence:
 Commence là, que l'autruy ne retiennes,
 Puis marche auant, & qu'a tant ne te tiennes,
 Et si l'autruy prendre ne t'esuertues,
 Ce qu'a esté prins, si le restitues,
 En chastiant pillardz & raiisseurs,
 Que de telz griefz les autres en soient seurs.
 Et pour vn mot obscur, ou ambigu,
 Ne fonde point quelque debat aigu:
 Mais sans viser au dict, ou au langage
 Contemple & voy du parlant le courage.

Tout vn te soit, que nyes, ou affermes,
 Mais (ou que soit qu'on vienne mettre en termes
 De Verité, quelque inquisition)
 Tiens ce pour foy, & pour religion:
 Si, en nyant, Dieu pour tesmoing appelles,
 Et que de luy tu n'en ayes nouvelles,
 De verité pourtant ne te fouruoyes,
 Ny des statutz de Iustice & ses voyes.

Que s'il t'aduient vser de menterie,
 Soit pour le mieulx, non pas pour tromperie.
 Et s'il conuient verité racheter
 Par le mensonge, il vault mieulx inuenter
 (Sans point mentir) quelque excusation,
 Veu qu'il y ha honneste occasion.

Le Iuste est tant aduisé, & discret,

Qu'il

Qu'il ne reuele à aucun le secret,
 Car taire ſçait cela qui eſt de taire,
 Et ſçait parler ce qui eſt neceſſaire.
 Son ſeur repos n'eſt point ſolicité,
 Il vit en paix, & en tranquillité,
 Et ou pluſieurs ſont par mauſx ſurmontez,
 Les mauſx par luy ſont vaincuz & domptez.
 Que ſi tu as d'vn tel eſtude enuie,
 Tu attendras ioyeux la fin de vie:
 En gayeté & en ferme lieſſe
 Meſpriſeras du monde la triſteſſe:
 Tout à ton aïſe, en vn tranquile arroy,
 Tu attendras tout bruyt, trouble, & deſroy:
 Puis t'en iras, ſans regret ne ſoucy,
 Tout aſſeuré, ſoubz de Mort la mercy.

DV PRVDENT REGIME
 DE PRVDENCE.

Parfaiçt ſeras, ſi des Quatre Vertus,
 Suyuant les loix, preceptes, & ſtatutz
 Tu ſçais garder leur meſure equitable,
 Par vn moyen de viure raiſonnable:
 Car ſi Prudence eſt oultre bord flottant,
 Cault tu ſeras, tout engin redoubtant,
 Vn crocheteur de cas qu'on ne ſcent oncques,
 Et deſcouureur de tous delictz quelconques,

Tu seras dict & hayneux, & craintif,
 Et aux soupçons plus que trop attentif,
 Craignant tousiours, & tousiours enquerant,
 Tousiours pensant, tousiours considerant,
 Et appointant tes subtiles soupçons,
 Pour de quelcun reprendre les façons.

Monstré seras au doigt, de tout le monde,
 Et dict celuy en qui malice abonde,
 De preudhommie ennemy perilleux,
 Et de messaiçtz espieur cautelleux,
 Et (pour te dire à vn mot tout en somme)
 Nommé seras de tous vn mauuais homme.

A tel meschef, & telle decadence
 Meine souuent imprudente Prudence:
 Mais qui d'icelle en aura bien vsé.
 Ne sera point trop lourd, ne trop rusé.

D V F O R T I F I E M E N T
 D E F O R C E .

ET s'il aduient que Magnanimité
 Sorte dehors de son pas limité,
 Elle rend l'homme enflé, & despitieux,
 Tempestatif, ingrat, & marmiteux,
 Et tant en dictz qu'en faiçts, chauld & soudain,
 Honnesteté estant mise à desdain:
 Car à tout coup (donne vne beste mue)

Déses

De ses deux yeux les fiers sourcilz remue,
 Il met tout trouble, ou est bonne conduicte,
 Il frappe l'un, & l'autre met en fuytte,
 Et toutesfois qu'il soit fort courageux
 Impugateur, harceleur, oultrageux,
 Ce nonobstant ne pourra il durer
 A maintz effortz, suruenans endurer:
 Mais il fera vne fin malheureuse,
 Ou il lairra l'emprinsé dangereuse.
 Qui donc de Force ha ou mesure, ou art,
 Il n'est iamais trop hardy, ne couart.

DE L'ATTEMPLEMENT
 D'ATTEMPANCE.

D Ame Attrempance aussi donc te contienne,
 Que tu ne sois point chiche, quoy qu'il tienne:
 Ne donne point à ta main restrainctif
 Comme douteux, souspeçonneux, & craintif.
 Mettre en argent ne dois ton esperance,
 Car aussi doit pourrir telle apparence:
 Donc telle borne en Attrempance fiche,
 Que tu ne sois ne prodigue, ne chiche.

DV IUSTIFIEMENT
 DE IUSTICE.

F Inablement ainsi Iustice agense,
 Qu'en ton esprit n'entre vne negligence

De n'amender faulte grande, ou petite,
 En permettant toute chose illicite
 Tant à ceulx là, qui pres de toy s'esbattent,
 Qu'à ceulx lesquelz se mocquent, & debattent,
 Ou deuenir si tresmal gracieux,
 Qu'à nul ne sois misericordieux,
 Mais aspre, & dur, à accointance humaine.

Ainsi fault donc que Iustice se meine:
 Telle est sa loy, & amyable reigle,
 Que tient le Iuste, & point ne s'en desreigle,
 C'est qu'à mespris l'usage familier
 Ne luy met point son honneur singulier,
 Et n'est point tant rigoureux, ne rebelle,
 Que d'humain nom perde la grace belle.

CONCLVSION FINALE.

SI quelcun donc ha en soy bon vouloir
 Non à luy seul, mais aux autres valoir,
 De ces Vertus tient l'ordre recité,
 Selon des temps & lieux la qualité,
 Selon les gens, & les cas incertains.
 Luy donc (ainsi comme en charroys haultains
 Tresbien assis) euite les passages,
 Par ou vont ceulx lesquelz ne sont pas sages,
 En mesprisant d'oyssiueté l'affaire,
 Laquelle veult seruir Dieu de rien faire.

DES QUATRE
DE LA CINQUIESME
VERTU.

Celle Vertu dont tu requiers le nom
 Estre cy mis, te la diray ie? non.
 Si. non feray, on la congnoist assez,
 Tant sont ses dictz, & ses faictz compassez
 Mignonnement, si que ses autres Sœurs
 Ayans prins garde à ses propos tant seurs,
 Rassis, & sains, desquelz elle recree
 Grandz & petis, confessent qu'est créée
 Vraye Vertu, dont pour telle la tiennent,
 Et se tenans pres d'elle l'entretiennent,
 Rians ensemble avec ris d'attrempance:
 Iustice voit comment elle dispense
 Tout iustement, de quoy moult s'esmerueille:
 Et puis Prudence ha honte que tant veille
 Diligemment au suruenant affaire,
 En confessant que mieulx ne pourroit faire:
 Force voyant qu'a toute aduersité
 Resister scait, & qu'en felicité
 Attrempément se maintient sans excès,
 Ne cherche rien fors d'icelle l'accès.
 Ces Vertus là donc l'ont en leur mesgnie,
 Et si luy font, comme à Sœur, compaignie:
 Raison le veult aussi. Et les Trois Graces,
 Ou qu'elle soit, ou voise en toutes places,

Y vont

Y vont aussi: doux passetemps luy donnent,
 Ny nulle part iamaïs ne l'abandonnent.
 Et s'il luy plait les neuf Muses hanter,
 Digne sera qu'on l'escoute chanter,
 En apprenant quelque chose d'icelle.
 Nymphes des boys, Nymphes que Triton celle,
 Aymant la veoir, & luy faire seruire.
 Veulx tu bien veoir telle Vertu sans vice?
 Assemble moy en vn corps femenin
 Raison, Sçauoir, & le troupeau bening,
 Royal, & saint des Vertus qu'on renomme,
 Et telle tiens celle que ie ne nomme.

F I N.

LOYSIR, ET LIBERTÉ.

PROGNOSTICATION

DES PROGNOSTICATIONS,

Pour tous temps à iamais, sur toutes

autres ueritable, laquelle des-

cœuure l'impudence

des Prognosti

queurs.

*

Preface. A la Royne de Nauarre,

Dea, maintenant te congnoistray, Princesse,
 Sans demander aux autres laquelle est ce,
 Car ie t'ay veuë au milieu de l'eglise,
 (Ou quelque iour fault qu'on euangelise)
 Menant ta Sœur la noble Elienor,
 Qui de son cueur soubz or aliene or.
 Or t'ay ie veuë, & si est bien possible
 Qu'aussi m'as veu, en trouppes confusible,
 Quand plaisamment tu iettas tes deux yeux
 Sur nous, questions voz spectateurs ioyeux:
 Mais en l'instant de celle veuë heureuse
 Je fuz attainct de Honte langoureuse,
 Qui est pour vray (puis qu'il fault que le die)
 Vne piteuse, & griesue maladie.
 Las, quel' pitié il y ha aux honteux
 Plus que non pas en ces fourrez Goutteux:
 Car les Goutteux treuent prou de credit,

Mais

Mais les Honteux le perdent, comme on dict.

Or, si Dieu plait, mon mal se passera,

Et ce pendant ce passetemps sera

A toy de veoir ce nouveau Prognostique,

Qu'ay calculé, selon mon sens rustique,

Et faict offrir par nostre maistre Antoine.

A Dieu sois tu, ò Tresillustre Royne.



*Monde mondain, trop mondainement
monde,*

*Monde aueuglé, monde sot, monde im-
munde,*

Dont vient cela que, soit en Prose, ou Vers,

Tu vas cherchant par tout, les yeux ouuers,

Si tu verras point choses non pareilles,

Et qu'a tous mots tu leues les oreilles?

O curieux! iamaïs n'es à requoy,

Tu vas tousiours querant ie ne sçay quoy.

Ie ne sçay quoy, aussi ne fais tu pas,

Et bien souuent pers ton temps, & tes pas.

Ie ne croy point (à veoir tes modes sottes)

Que fol ne sois, ou que tu ne rassortes,

Ou bien (à veoir ta mine, & contenance)

Que ne sois prest à tomber en enfance.

Pourquoy t'es tu orendroit amusé?

Mais que quiers tu, abuseur, abusé,

Qui abusant veulx bien en abus estre,
 Et d'abuser te dis docteur & maistre?
 Chasses tu pas apres Abusion,
 Cuydant trouuer Prognostication,
 Ou il y ayt des nouueautez nouvelles?
 O affamé! belistre de Nouuelles,
 Poure alteré, coquin de vanité,
 Qu'en est il mieulx à ta mondanité?
 N'en auras tu iamais (nenny, ce pense)
 Asssez remply ta besasse, ou ta pance?
 N'est il aucun qui s'en apperçoie ores,
 Et prenne esgard comment tu les deuores,
 Considerant vn peu les belles bresches
 Lesquelles fais en ces Nouuelles fresches?
 Car tu les prens, auant le temps, hastees,
 Et sont par toy incontinent gastees:
 Tu ne les fais que taster vn petit,
 Puis tout soudain tu en pers l'appetit:
 Et celles là qu'as euës ce matin
 Sont ia autant vieilles qu'un vieil patin.
 Tu les sçais bien mendier à ta guise
 De porte en porte, & d'eglise en eglise,
 Et (que pis est) de peur d'estre au basac,
 Au racompter tu metz tout en ton sac:
 Et tant tu es les Nouuelles leschant,
 Que tu prens tout, le bon, & le meschant:

Car bien souuent les faulſes & meſchantes
Sont celles là pour leſquelles plus chantes.

Si lon t'a faict quelque aumosne bien graſſe,
Dire ne fault combien en ſçais de grace:
Auec telz biens, enflé comme vn crapault,
Et remonté tout ainſi qu'vn marpault,
Tu vas, & cours, çà, & là, par ces rues,
En les mangeant, & rongéant toutes crues,
Te repaiſſant des neuſues amaſſees,
Sans plus penſer aux vieilles ia paſſees.

Mais s'il aduient, que quelque diligence
Qu'en ayes faict, nul de ton indigence
N'ayt prins pitié, & que la tienne queſte
N'ayt profité en demande, ou requeſte:
Tu es bien tel, & de telle nature,
Que incontinent en fais à l'aduenture.
Puis en garnis les ſacx des ſouffreteux,
Des autres gueux, qui en ſont diſetteux:
Ainſi tu fais, que de tes bribes vaines
Remplir s'en vont, & les os, & les veines.

Or en cecy fol es tu manifeſte:
Car quãd tu voy qu'ilz en font leur grand' feſte,
Ce nonobſtant que les ayes trouuees,
Tantost de toy ſont bonnes approuuees,
Tu les reprens, tu les priſes, & notes,
A belles dentz auec eulx les grignotes,

En te saoulant de tes Nouuelles faulses,
 Comme vn souillard cuysinier de ses faulses.
 T'en ris en moy, chesque fois que i'y pense,
 De tel excès, & de telle despense,
 Et du deguast, que de Nouuelles fais,
 Dont les reliefz sont pourris, & infectz,
 Et bien souuent, O glouton de Nouuelles,
 T'ay veu happer les vieilles pour nouvelles,
 Quelque vieil bruyt, quelque fable, ou mensonge,
 Comme le Chien, qui ses os d'antan ronge,
 Aux quelz il prent appetit aussi bon,
 Comme il feroit à quelque bon iambon,
 Ou ventre frais sur croustes de pains blancz,
 A tout le moins il en fait les semblans:
 Ainsi fais tu des Nouuelles moysies,
 Lesquelles sont souuent par toy choisies,
 Et d'appetit soudainement briffées,
 Si elles sont par quelcun rechauffées.
 Or en es tu tant glout, que tu t'apprestes
 A les manger, auant qu'elles soient prestes.
 Mais il t'ennuye que trop tard tu demeures,
 Si ne les as plus tost crues que meures:
 Et maintes fois (soient grosses, ou menues)
 Gripper les veulx ains qu'elles soient venues:
 Mais tu en es si dangereux riffleur,
 Que tu les quiers manger encor en fleur,

Et com

Et (comme on dict en vn commun Prouerbe)

Manger les veulx, comme ton blé en herbe.

Mais ta faim est de telle vehemence,

Que mesme en veulx manger graine, et semence.

Pour donc fournir à telle nourriture,

Et en auoir amas, & fourniture

De celles là qui ne sont encor nees,

Voluntiers oys les haultz sons, & cornees

De ceulx qui font Prognostication,

Toute-nouuelle à la munition.

Là mon amy, à ces Nouuelles chauldes,

Ainsi qu'enfans apres leurs baguenauldes,

Ou ces mignons à dancier l'antiquaille.

Tu en as prou là encor en l'escaille

D'or, & d'argent, d'alquemie, & d'yuoire,

De toute sorte, & plusieurs autres, voire,

Et (si n'estoit que prodigue en es tant)

Tu en aurois pour cent ans tout contant:

Car, tu entendz, si elle ne conuient

A cestuy an, c'est pour celuy qui vient,

Et si celuy n'y trouue rien d'expres,

Metz la à poinct, sera pour l'autre apres:

Car elle peult autant estre à profit

Comme elle estoit l'annee qu'on la feit.

Or ie t'en veulx bailler vne pour toutes,

A celle fin que plus tu ne te doubtes.

Il est bien vray que Prognosticateurs
 Semblent auoir esté expilateurs,
 Ou crocheteurs, par leur art gent, & net,
 Du hault tresor, & diuin cabinet,
 Et auoir veu tout ce que Dieu nous cache
 Secrettement, voire sans qu'il le sache,
 Et auoir leu, en ses sacrez registres,
 La fin des Roys, des Papes, & Belistres,
 Prins les fuseaux, & toutes les menees
 Des sœurs qu'on dict Fatales destinees:
 Et desrobé avec leurs Lunaisons
 De l'aduenir, le temps, & les saisons:
 Et auoir prins tout en leur Sphere entiere,
 Comme tous ratz dedans vne ratiere.
 Dont puis apres, de plumes bien deliures,
 Ilz nous en font & composent des liures,
 En prophanant du hault Dieu les secretz,
 Ou babillant leurs songes indiscretz.
 Là de tous cas iugent assurement,
 Comme vn meurtrier, lequel assurement,
 En affermant de tous les accidentz
 Feablement, comme arracheurs de dentz.
 Brief, rien n'y ha dont ne tiennent propos
 Par leur parfaict Astralabe & Compos:
 Mais ilz ne font aucunes mentions
 De leur Progno(d'abus)stications,

A sçauoir mon si telle marchandise
 Aura son cours, quoy que le marchand dise:
 Pourtant fault il, pour vn peu pratiquer
 En cestuy art d'elles prognostiquer.

Par ainsi donc, ò Monde lunatique,

Ayes pour tous cestuy seul Prognostique:
 C'est que (pour vray) tous tes Prognostiqueurs
 Sont, & seront, ou mocquez, ou mocqueurs:

Et tiens cecy pour vn mot bien notable,
 Qu'ilz ne diront rien qui soit veritable
 Pour cestuy an, ny pour l'autre à venir,
 Ny à iamais s'il t'en peult souuenir.

Et qu'ainsi soit, ie t'en rendray raison,
 Va t'en chercher par toute ta maison,
 Si trouueras des Almanachz les briques,
 Et puis t'en viens visiter les Chroniques,
 Et esplucher (à fin que mieulx t'asseures)

De receueurs Ephemerides seures,
 Les confrontant, pour congnoistre, & sçauoir
 Ou il vault mieulx foy, & fiance auoir.

Là verras tu par effectz euidenz
 Cōbien leurs dictz sont aux faictz discordantz:

Et si tu veulx de cecy des tesmoings,
 Tu en auras dix mille pour le moins,
 Qui te diront, mon Almanach est faulx:
 I'y ay trouué plus de cinq cens deffaulx:

Mon Almanach (dira l'un) ne vault rien:

(Ce dira l'autre) aussi ne fait le mien.

Plusieurs diront ainsi pareillement:

Le mien qui ha façon pareille, ment.

Puis qu'ainsi est donques que les passez,

Ny ceulx qui sont de nouveau compassez,

N'ont rien en eulx qu'on ne puisse desdire:

Fault il pas bien prognostiquer & dire

Que les futurs seront aussi semblables,

Et n'y aura que mensonges, & fables?

Si qu'on verra que Prognosticateurs

Ne sont sinon folz, mocqueurs, & menteurs,

Chasseurs, preneurs, vendeurs de fariboles,

Et que leur fait n'est que vaines parolles.

Que pourroient ilz dire du temps qui vient,

Quand du passé mesme ne leur souuient?

Duquel ilz ont menty, & mentiroient,

Car quel il fut, à grand' peine diroient.

O vanité! ô oyseux gaudisseurs!

Aymez, prizez, receuez des guarisseurs

De gēs, lesquels n'ont point de maulx extremes:

Des guarisseurs? mais guarisseurs eulx mesmes,

Qui en iasant de leurs humeurs styptiques

Vont controuuer plusieurs raisons celiques,

Pour (quand souuent ilz faillent à leur cure)

Dire qu'il tient à Saturne, ou Mercure.

Laiſſons

Laiſſons les là en ce terreſtre eſmoy,
 Laiſſons les là, & allons toy & moy
 Là hault es cieulx, pour veoir d'astrologie
 L'art, & la fin, & comme elle eſt regie.
 Depeſche toy, poſe de chair la charge
 Tant en chargeable, & qui ſi fort te charge,
 A fin que ſois à voler plus dehait:
 Sus, eſt ce faiçt? Or volons à ſouhait
 Par ce bel air, auquel Dieu nous conuoie.

Quelle te ſemble eſtre des cieulx la voye?
 A ton aduis, faiçt il pas meilleur eſtre
 En ce doux vol, qu'en ce dur nid terreſtre?
 Montons touſiours, ne viſe ia là bas
 Ou lon triumphe, ou lon faiçt maintz esbas:
 Leue la teſte, & n'entre en phantaſie
 De regarder Europe, Afrique, Aſie,
 Ou vn chaſcun y domine à ſon tour:
 N'y penſe point, ſera pour le retour.

Or voy tu là Ieſus Chriſt en ce lieu,
 Qui eſt aſſis à la dextre de Dieu:
 Lequel doit eſtre, & eſt, ton eſperance,
 Ton ſeul appuy, & ta ferme aſſurance,
 Le voy tu là le Viuant immortal,
 Lequel te peult rendre apres la mort tel?
 Ceſtuy te ſoit pour horoſcope unique,
 Dont tu prendras tout certain prognostique

Pour

Pour l'aduenir: car Luy est verité,
 Sans t'abuser à la temerité
 De ceulx, lesquelz (pour remplir bourse et panse)
 De leurs abus te font belle despense:
 Escoute bien de ses dictz l'epilogue.

L'as tu ouy? Or t'en viens Astrologue,
 Et ne crains point par ces douze maisons,
 Souffise nous si au Maistre plaisons,
 Lequel sçait mieulx ce que nous faict besoing,
 Que ne pourrions, avec tout nostre soing,
 Songer, preuoir, penser, ne desirer.

Tu eusses bien là voulu demourer,
 Ie le congnois: mais il n'est pas possible,
 Iusqu'à la fin de ta chair corruptible.

Or maintenant (si tu es rien discret)
 De l'aduenir tu entendz le secret,
 Tu le sçais mieulx voire, ie te prometz,
 Que ces diuins ne le sceurent iamais:
 Car il t'a dict, le Viuant qui faict viure,
 Que renoncer il se fault pour l'ensuyure,
 Sans prendre en soy soucy du lendemain,
 Ains seulement du temps qu'on ha en main:
 Car les Payens quierent toutes ces choses:
 Que s'il aduient qu'icelles leur soient closes,
 Chercher les font à leurs sotz Astrologues,
 Qui leur en font (Dieu sçait quelz) catalogues,

Ou chascun d'eulx ses mensonges recite.

Et d'auantage ha dict qu'il n'est licite

*A nous scauoir les temps, & les momentz,
Que Dieu ha mis hors noz entendementz,
Hors de noz sens, & nostre congnoissance,
Et reseruez à sa seule puissance.*

Va maintenant, & de Dieu te messies,

*Et à ces beaulx Astrologues te fies,
Lesquelz iamais n'ont sceu de Dieu l'affaire,
Et s'ilz l'ont sceu, ilz le deuoient bien taire.*

*Non feras dea, ia Dieu ne plaise aussi
Auquel tu croy. Or fais que tout cecy
Tantost à tous racomptes & reuelles.*

*A Dieu te dy, alteré de nouuelles,
Lequel, à fin que merueille te donnes
De ses haults faictz, t'en doint en brief de bonnes.*

F I N.

Au seul DIEU honneur, & gloire.

Ballade . A la Roynne de
Nauarre.

Puis que ie sçay de quelle humanité
Elle est douee en tout temps & saison,
Puis que suis seur de sa begninité,
Pourquoy ne romps ie à Peur sa lyaison?
Deurois ie pas aller en sa maison
Me presenter franchement deuant elle?
Est ce bien faict luy faire fourbe telle,
Veu que ie suis à elle, non pas mien?
De quoy me sert tant vser de cautelle?
Ie luy fais tort, que ne luy rendz le sien.

Mais quand ie pense à la capacité
Du mien esprit, dont n'en ay pas foison:
Quand ie regarde à ma rusticité,
Passer ne puis la premiere cloison:
Disant en moy, qu'ay meilleure achoison
Me deporter, qu'il n'en soit plus nouvelle:
Mais ie crains trop que quelcun luy reuelle,
Dont ne seroit pas le plus seur moyen:
Brief, quand i'ay bien traouillé ma ceruelle
Ie luy fais tort, que ne luy rendz le sien.

Quand me souuient de la facilité
Dont elle abonde en vers, & oraison,

Mon petit sens se sent debilité
 Plus que deuant, & sans comparaison:
 Me repliquant que ie n'auois raison
 Ainsi fascher celle fleur naturelle,
 Et que ie dois quicter telle querelle:
 Mais ie luy dis, ce que tu dis n'est rien:
 Il ne fault ia qu'en ce plus on querelle,
 Ie luy fais tort, que ne luy rendz le sien.

Princeſſe pure, autant que Colombelle,
 Ou des vertus la tourbe gente & belle
 Ha mis des dons sans regarder combien,
 Ie me confesse estre enuers toy rebelle,
 Ie te fais tort, que ne te rendz le tien.

A ladicte Dame.

Si tu me veulx donc pour toy retenir
 Ie te diray qu'il en peult aduenir:
 Seruir pourray d'un bien franc Aumosnier,
 Car ie ne ſçay point l'aumosne n'yer:
 Ou ſi tu veulx que ſois ton ſecretaire
 Ie ſçauois bien le poinct du ſecret taire:
 Ou bien pourrois estre laquais de Court
 Pour bien courir la poſte en ſale, ou court:
 Ou ſi i'auois ſur moy ton equipage
 Ie pourrois estre un tien honneſte page,

l

OH

Ou cuyfinier, pour seruir (quoy qu'il tarde)
 Apres disner de saulse, & de moustarde:
 Ou pour mieulx estre eslongné de la table,
 Estre pourrois quelque valet d'estable,
 Que si besoing tu n'as de mon service,
 (Veu que tu as maintz seruiteurs sans vice,
 Plus dru beaucoup que l'eau que Rosne meine)
 Courray illec en celle court Romaine,
 Au grand Lendy, dis ie, des Benefices,
 Qui vallent bien autant que point d'offices,
 Pour en seruant gaigner quelque Chappelle,
 Dont ie ne sçay comment le Sainct s'appelle.
 Là si ne puis en estre depesché
 Au fort aller i'auray quelque Euesché:
 Si ie ne puis impetrer d'estre Prebstre,
 Je ne pourray qu'aumoins Cardinal estre:
 Ainsi feray, si tu ne me retiens,
 Et toutesfois tousiours seray des tiens.

A elle encores.

Sans Rithme donc, mais non pas sans raison, en Prose
 veulx faire mon oraison: & ce pendant ie diray
 à ma Muse, qu'escire en vers maintenant ne s'a-
 muse. Si ie vous dis icy ou toy, ou tienne, ne vous
 soit grief: car liberté Chrestienne si en dispense, et
 Dieu l'accepte aussi quand on l'inuoque, & on
 l'appelle

l'appelle ainsi. Or parler veulx à toy vne fois l'an, ainsi que Dieu dict de Ierusalem : Parlez, dict il, à elle & en son cueur. Ainsi veulx donc sans rigueur ne rancueur parler vn peu à ton cueur gracieux, ou sont les loix & statutz, precieux du Roy des Roys, grauez et entaillez, bien mieulx qu'en pierre ilz ne furēt baillez. Escoute dōc, de par Dieu, cueur Royal, ce que te dict ton seruiteur loyal, lequel pour tien, ains que iamais le veisses, as retenu, pour faire aucuns seruices, qui te seront, aydant Dieu, agreables. Or ay ie ouy propos peu fauorables, qui sont à toy, & à moy, mal seans, et ne croy point qu'iceulx soient nez ceans en Royal cueur, auquel i'en fais le compte, & toutesfois pour tiens on les me compte : C'est que ie dois me tenir là tousiours, dont suis party, & s'il y ha huiict iours que i'en suis hors, pour là au tien affaire (dict on) vacquer, cōment se peult il faire ? Car il n'y ha ne repos ne loysir pour bien escrire, ainsi que i'ay desir, et que l'entēdz. Oultreplus, des celle heure on s'est pourueu d'un lequel y demeure : & ie me tiens illec soir, & matin, chez mon Seigneur Monsieur de saint Martin, en attendant que tu me faces signes d'aller chez toy, ou qu'estat tu m'assignes : dont tāt petit soit il, en verité, indigine en suis, et ne l'ay meritē. S'il est ainsi qu'il faille que retourne, & qu'estant tien loing de toy ie seiourne, que dira lors ma premiere mai-

stresse, qui me laissa en regret & destresse : & à laquelle, en voyant telle attente, disois ainsi: Estes vous pas contente que ie vous laisse en change d'une Roynne, pourueu que sois souffisant & idoyne? Que diront ceulx, lesquelz premier que moy, ains que iamais m'en vinst au cueur l'es moy, ont veu, & sceu enuers moy ton vouloir, dont ne me puis repentir ne douloir, qui m'ont nommé possession Royale, ilz cuyderont que faulte desloyale se soit trouuee en moy, ce que n'est pas, & Dieu me doint plus tost le mien trespas. Or que de toy ie suis loing & remot, ie ne croy point que ce contraire mot, ce mot iamais ayt prins en toy naissance, veu ton vouloir dont i'ay bien congnoissance. Ce mot ne part de Royale largesse, ains sort plus tost d'infidele sage Je, qui cuyde apprendre aux Royaux cueurs à craindre, & s'en tient pres pour leurs desirs enfraindre. Vn autre poinct y ha, lequel i'escoute: c'est, si ie veulx qu'au seruice on me boute d'un Gentil homme, et c'est mieulx mon profit (ce me dict on) mais le tien me souffit, puis que ie voy aussi qu'il te plait bien, le tien seray, c'est ou Royal, ou rien.

A V ROY DE NAVARRE.

H Eureux depart vous prierois à mon tour,
 Et d'auantage vn plus qu'heureux retour,
 Vous souhaittant tousiours bonne aduenture,

En

En ensuyuant de mon nom la nature:
 Roy renommé, si n'estoit que i'ay peur
 D'encourir nom d'affecté attrapeur,
 Et rançonneur de largesse Royale,
 En moy n'a lieu Cautelle desloyale,
 (Loué soit Dieu) pour vouloir cela faire:
 Ce neantmoins que i'aye bien affaire,
 Veu mon estat, & poure qualité,
 De quelque Grace, & liberalité.
 Or ie ne sçay point l'art de demander,
 Mais s'il vous plait de me recommander
 Tant seulement à ma bonne Maïstresse,
 Ce ne sera pas petite largesse.
 Faiçtes le donc, Sire, pour la pareille,
 Tel mot ne soit estrange à vostre oreille:
 Car si ie suis recommandé à elle
 De vous, vn iour par Grace mutuelle
 Sçay bien qu'à vous me recommandera.
 A Dieu soyez, lequel vous gardera.

A la Royne de Nauarre.

S.

Si vous ne demandez sinon les demandeurs,
 Suyuant vertu Royale, & les recommandeurs
 D'eulx, et de leurs amys: demãdeur deuiendray.
 Hâ, qu'est ce que ie dis? à moy ie reuiendray:

l 3 Car

Car auoir ne pourrois le cueur de demander,
 Quand vous me le voudriez encores commander.
 Ia soit que lon ayt dict qu'argent ie demandois,
 Quand dire à Dieu au Roy dernièrement cuydois,
 Ou ce que ie craingnois certes m'est aduenu,
 En m'imputant cela dont ie suis moins tenu.
 Ouy, mais, ie n'auray rien, si rien ie ne demande:
 Et bien, ou rien n'y ha, le Roy perd son amende.
 Si donc, Roynes, voulez qu'il y ayt quelque chose,
 Donnez sans demander; car demander ie n'ose.
 Mais qu'est ce qu'il me fault, ne que me fault il? rien.
 Rien, Madame, que tout, & me contente bien:
 Vray est que cil qui dict qu'il se contente, ment:
 Toutesfois ie me vante auoir contentement,
 Contentement content, ou point ne me mescompte:
 Car riche autāt qu'un Roy, me treuve en fin de cōpte.

Vita uerecunda est, Musa iocosa mihi.

Inuectiue contre Re=
nommee.

Or es tu bien maligne, Renommee,
 Car tu ne l'as pas telle renommee
 Qu'elle est vrayment: & par ainsi, Langarde,
 A tes propos vne autre fois prens garde,
 Que de formais ne te vois mesler

Des

Des grandz vertus vouloir si peu parler.
 En as tu dict beaucoup? la grand' pitié
 Que de ton faict, ce n'est pas la moytié:
 Car tesmoing ceulx qui d'elle ont congnoissance,
 Quant à son loz rien ne t'y congnois: en ce
 Qu'il semble à veoir que tu vueilles lascher
 La plus grand' part soubz Silence cacher,
 Mais tu ne peux, que chascun ne le sache:
 Dont en seras renommee bien lasche.
 Quand tu congnois que tu ne peux atteindre
 A si hault blanc, sans tes forces estaindre:
 Et quand tu vois que tes langues cliquantes
 Ne sont tel loz iustement expliquantes,
 Les dois tu pas soubz tes plumes tenir,
 Et d'ainsi peu parler t'en abstenir.

O que i'ay bien parlé à celuy Monstre
 De grand' vertu, faisant petite monstre:
 Mais qu'ay ie faict? certes rien, au vray dire,
 Ia ne me fault tant estre gonflé d'ire:
 Car ces vertus, qui ne sont point nombrees,
 Ne veulent point estre ainsi celebrees
 Par bruyt mondain, ny par humaine voix,
 Qui bien souuent fraudent le pris, & poix,
 Ainsi qu'il est manifeste orendroit:
 Aussi ne veult Madame là son droict,
 Car elle sçait que ceulx là qui font bien,

l 4 A celle

A celle fin qu'on en die du bien
 Ont ia receu leur salaire content.
 Or n'est le cueur d'elle de ce content,
 Si Renommee est lasche à son venom,
 Sa recompense est en Dieu, & son nom.

A Madame de saint Pater.

S.

Ha, Madame de saint Pater,
 Si i'osois iurer Iupiter,
 Et Styx, ce marays des enfers,
 Ou les damnez sont mis en fers,
 Soubz grief serment, sans feincte & ruse,
 Je pourrois faire mon excuse
 De ce que nulle rithme expresse
 N'auex eu de moy pour la presse
 Qu'ay endure à mon affaire,
 Ou i'ay trouué beaucoup à faire.
 Or y ha il remede assez,
 Car tous mes escritz sont passez
 Par voz mains, apres que la Royne
 Ha faiçt d'iceulx lecture idoyne:
 Toutesfois encor veulx ie bien
 Declairer par escript, combien
 Pour vous me voudrois employer,
 Sans iamais me feindre, ou ployer.

Vous

Vous n'en auez, par aduventure,
 Pas vn tel que Bonaventure,
 Qui vous vouldist faire seruice
 Plus voluntiers (au dict n'est vice,
 Si lon note les motz entiers,
 Veu que ie dis plus voluntiers)
 Car ia soit mon pouoir petit,
 Neantmoins i'ay grand appetit
 En tout, vous seruir & valoir:
 Dont parier puis mon vouloir,
 (Puis que ie n'ay pouoir aucun)
 A tout le moins contre vn chascun,
 Que si i'auois le pouoir tel,
 Ie ne craindrois homme mortel
 Qui soit en ce monde viuant,
 Quant au nom de meilleur seruant.
 Ie n'en veulx autre chose dire:
 Ie vous empesche icy à lire,
 Ou pas n'auetz loysir, peult estre:
 C'est faict, ie n'ay plus guaire à mettre.
 Puis que vous voy de pres hanter
 La Royne, à vous viens presenter
 Vn don des Musés mal nourries:
 Le voicy, sont Pasques flouries,
 Que, s'il vous plait, luy baillerez,
 Et le vostre me nommerez,

*Elle n'y contredira rien,
Combien que ie sois ia le sien.*

EPIGRAMMES.

De la Royne de Nauarre.

*Tu es trompé, ò Peuple Lyonnois,
Quand tu prens garde au magnifique arroy:
Car parmy toy cachee mescongnois
En simple habit, la Sœur de ton bon Roy:
Mieulx es trompé, quand en Royal charroy
La regardant, l'estimes mondaine estre.
Dieu ne l'a pas, non, pour cela faict naistre,
Quoy que mondain estat qui trompe, rie:
Que pleust à Dieu, que tu sceusses congnoistre
L'heureux secret de telle tromperie.*

A ladicte Dame.

*Or l'ay ie veu cheminer en publique
Ce Monstre là, Princeesse, que tu sçais,
Qu'est Feminin, Viril, & Angelique,
Et qui surpasse en tout humain excès:
De honte, & crainte, en ay eu tel excès
Incontinent que de mes yeux l'ay veu,
Qu'onques ne fuz mieulx prins au despourueu:
Brief, i'ay esté surprins tout ainsi comme*

Iadis

*Iadis le fut, vers luy, le Despourueu,
Mais iay aussi Bon espoir ce Bonhomme.*

A elle encores.

*Ma poure Muse, ò Noble Dame, chomme,
Et si ne tient qu'a faulte de loysir:
Las, elle voit en tel estat son homme,
Qu'on n'en pourroit pas vn pire choysir:
Cuydez vous point que c'est grand desplaisir,
Qu'elle se voye ainsi tant destourbee:
Ce qu'elle escript, c'est à la desfrobee,
Car ou i'ay prou besongne tout le iour,
Tant que i'en ay la main lasse & courbee,
Il semble encor que i'aye faict seiour.*

*De Soy mesme, & de son maistre Antoine
du Moulin.*

*Merlin auoit son maistre Blaise,
Et i'ay mon maistre Antoine aussi:
Merlin viuoit bien à son aise,
Maistre Blaise auoit du soucy.
Mais il ne nous en prent ainsi,
Car maistre Antoine est soubz la tente
D'heureux Repos, ou il s'exempte
De tous Soucys, au cueur ferrans:
Et malheur veult que ie m'absente*

Des

De nobles Cheualiers errans.

A Jean de Tournes, Imprimeur.

*Veulx tu garder que perte ne t'aduienne,
 Ou que n'en sois de regretz morfondu,
 Ne te dis point que ta chose soit tienne,
 S'elle se perd, tu n'auras rien perdu:
 Et pour tout dire, à vn mot entendu,
 Tout mal se moule en la forme de dire:
 Car si tu dis, en ton cueur remply d'ire,
 Que lon te hayt, le bien en mal prendras:
 Et si tu dis, que chascun te peult nuyre,
 Le tien amy pour ennemy tiendras.*

A Monsieur le Viconte du Perche.

*Monsieur le Viconte du Perche,
 Dedalus, quand volera il?
 Vous l'auetz laissé sur la perche,
 Ou il est dru, gay, & gentil:
 Par le vostre moyen subtil
 Il est encor en son plumage,
 Dont chantera en chant ramage
 Viue par qui vie ha son compte,
 A iamais, sans dueil, ne dommage,
 Viue du Perche le Viconte.*

A la

A la Royne de Nauarre.

Tu as trouué vn Enquesteur de mesmes
 Pour t'enquerir de moy, ton Malfaieteur,
 Qui me congnoist mieulx que ne fais moy mesmes,
 Qui ha esté, & est mon precepteur,
 Qui m'a monstré quel est mon Redempteur,
 Qui m'a monstré Rithmes, Grec, & Latin,
 Auque! i'allois le soir, & le matin,
 M'en retournois faire aux enfans lecture:
 C'est mon Seigneur, Monsieur de saint Martin,
 Qui me pourchasse encor Bonne aduventure.

A ladiete Dame.

Hà, le voicy, Madame, le voicy
 Le Malfaieteur, qui les Rithmes mal faiet.
 C'est luy qui ha baillé ce dix ain cy,
 Lequel, peult estre, encor est imparfaiet.
 Or qu'il soit donc detenu pour le faiet,
 Et chastié de son oultrecuydance:
 Remonstrez luy sa faulte, & impudence,
 Et s'il vous plait, qu'il soit en telle sorte
 Mis prisonnier, pour faire residence
 En lieu si seur, que iamais il n'en sorte.

A maistre Noel Alibert, Lyonnois.

Deux Cordeliers, avec deux Iaccopins,
 En vn batteau veis, qui passoient la Saone,

Semb

*Semblans deux sacz entre deux gros tuppins,
 Depuis le Pont, tant leur blason consonne:
 Le Battelier bien deuote personne
 Prioit, disant: Si ces ames diuerses
 De noz Conuentz, professes, ou conuerses
 Se perdent cy en ce val terrien,
 Helas, mon Dieu, n'en ayons controuerses,
 Nul bien n'en vient, ne m'en demande rien.*

*A Madame la Seneschale de
 Poictou.*

*Doubteux esmoy, qui parler m'a contrainct,
 Mon poure Espoir voudroit bien diuertir,
 Il le harie, il le serre, & estrainct,
 Et voluntiers le feroit repentir
 De ce qu'il vint iamais à consentir
 De trouuer mieulx, veu que longue est l'attente:
 Mais Espoir dict tout bas, qu'il se contente,
 Et qu'il n'y ha qu'un petit d'interualle,
 Qu'il n'ayt responce assuree, & patente,
 Dict il pas bien, ô Noble Seneschale.*

A la Roync de Nauarre.

*Madame, vostre Prisonnier,
 Il faiet encor là de la grue:
 Luy voulez vous prison nyer,*

Car

Car il va, & court par la rue:
 Qu'il n'ayt plus la plume si drue,
 Et le gardez de tant voler.
 Oultreplus, souffrez vous mesler
 Ainsi le vostre parmy tous?
 Car à le veoir ainsi aller
 On ne sçait pas qu'il soit à vous.

A la dicte Dame.

Si le Preuost des Mareschaulx venoit,
 Veu que ie suis maintenant sans rien faire,
 Consideré, que point ne me congnoit,
 Il n'est pas seur que n'eusse de l'affaire:
 Ie ne pourrois respondre, ou satisfaire,
 S'il me trouuoit vagabond, & oyseux,
 Il me prendroit, comme vn de ces noyseux,
 En moins qu'auoir dict vne Patenostre,
 Et me mettroit captif avecques eulx
 Sans regarder que ie suis ia le vostre.

A Monsieur le Chancelier
 d'Alençon.

Prudent Chancelier de renom,
 Auant que faire la closture
 De l'estat, n'oubliez le nom
 Tant ioyeux de Bonauenture:

Que

Que s'il est en vostre escripture,
 Et que la Royne vous l'efface,
 Je ne sçay pas plus que i'en face
 Fors l'aller noircir de douleur,
 Et escrire, changeant sa face,
 Pour Bonauenture Malheur.

A la Royne de Nauarre.

Que me mettiez ainsi au choiz de dire
 Combien ie veulx auoir de vous de gage,
 Je doubte fort se i'y dois contredire,
 Ou accorder, voire & en quel langage:
 Car si ie dy trop, veu le personnage,
 Je vous feray grand tort, & à moy honte:
 Si ie dis peu, & que ie me mescompte,
 Veu que n'ay rien, ce n'est pas saine chose,
 Et diroit on, que tiendrois peu de compte
 De Royaulté, parquoy rien dire n'ose.

A ladicte Dame.

Baillé m'auex de la besongne à faire,
 Et pour ouurer ie m'appareille aussi:
 Ce nonobstant, encor pour mon affaire
 Je vous escriis, comme voyez icy,
 Veu que ne puis pour vous escrire ainsi
 Comme ie suis, pourtant donc vous requiers ie,
 Que

Que m'ordonniez lieu hors trouble, & soucy,
Et i'escriray aussi droict comme vn Cierge.

Du Goust du Vin retrouvê.

Autour de la machine ronde,
Tournant, virant, & voltigeant,
Cerchois la chose qu'en ce monde
Ne se recouvre pour argent:
Et dont m'auoit faict indigent
Ce Monstre laid, dict Maladie:
Bacchus à la teste estourdie,
Qui est bon Gaudisseur diuin,
Par vne risée esbaudie
Me la rendu le Goust du vin.

De l'Appetit recouuert.

O petit, petit Appetit,
Helas, que stois tu deueni?
Maintenant, petit à petit
Me seras tantost reueni.
Or sois tu le tresbien venu,
Et ne t'en vas qui que t'harcelle:
Mais tu as perdu la vaisselle
Ou le Noble escu Nauarrois
Donne lieu au deuy de celle,
Que disois que plus ne verrois.

A Madame Marguerite, fille
du Roy.

Vous voulez donc veoir Dedalus qui vole,
O Marguerite, ou nostre Espoir espere,
Que verrez vous? vne naisue Idole,
Vn filz qui est par trop rebelle au pere.
En ceste chair digne de vitupere
N'est le meilleur regarder la personne:
Mais vostre Tante, en qui tout bien consono,
Ha vn Miroir, sans macule, ne vice,
Ou maint Esprit se voit, & se façonne:
Là la congneuz auant que ie la veisse.

A la Royne de Nauarre.

Quand premier ma rustique Muse
Pleine de grand' legereté,
Qui de nature ne s'amuse
Voluntiers qu'à ioyuseté,
Salua vostre Maiesté,
Elle auoit d'autres cas à dire:
Et ne pensoit pas vous escrire
A iamais supplication,
Ou on treuve trop à redire,
Et n'y ha nulle inuention:
Mais c'estoit son intention
De parler de la loy de CHRIST,

Dont

Dont souuent faiçtes mention,
Autrement iamais n'eust escript.

A Blaise Vollet, de Dye.

Iaques le Gros n'ayme que les Iambons,
Et mesmement des Iambons de Maiance:
Mais, comme il dict, ilz ne luy sont pas bons,
S'ilz ne sont bien salez par excellence:
Beaucoup plus tost au Merlux il se lance,
Qu'il ne faiçt pas à quelque Esturgeon fraiz:
Vous auez beau faire grands coustz & fraiz
Si au festin vous l'auetz appellé,
Vous y perdrez tous voz exquis apprestz:
Iaques le Gros n'ayme que du salé.

A la Royne de Nauarre.

Or vous voyez ma valeur toute nue,
Et scauez ia bien quel est mon scauoir,
Puis donc qu'auetz ma plume retenue
Feray descrire, & voler bon Deuoir:
I'escriis tousiours pour vous de mon pouoir,
Et pour escrire encor mieulx m'appareille:
Veu tant d'escriptz, requiers pour la pareille
Que me baillez de la vostre escripture
Vn mot flory de grace non pareille,
Pour tout l'heureux heur de Bonne aduenture.

A Madamoyselle de saint Pater.

Pourray ie auoir vn priuilege
 De Dame, ou Damoyselle dire,
 Puis que c'est pis que sacrilege
 L'un de ces motz pour l'autre eslire:
 Hyer, il me conuint desdire,
 Et rescinder la queuë oyselle,
 Car i'auois dict tout d'une tire
 A la Royne, Madamoyselle.

A la Royne de Nauarre.

En escriuant voz immortalitez,
 Ou il y ha tant de subtilitez,
 Tant de propos de haulte inuention,
 Tant de thresors, & tant d'utilitez,
 Mes sens en sont tous rehabilitez,
 Ma plume y prent sa recreation,
 Voulant voler à l'imitation,
 Mais il n'y ha aucune conuenance:
 Dont puis qu'elle ha telle occupation,
 Ou elle peult prendre erudition,
 De plus rithmer deuroit faire abstinence.

A ladicte Dame.

Le vostre volant Dedalus
 Interrogué à quoy tenoit,

Qu'il

Qu'il n'auoit vn Bucephalus,
 Ains voloit ou il cheminoit,
 Dict, que point ne s'en estonnoit:
 Car, dict il; (veu ce que poursuis)
 De plus gens de bien que ne suis
 S'en vont à pied à l'adventure:
 Mais aussi (comme dire puis)
 Gens aussi vains vont sur monture.

A elle encores.

Pour vostre Liçtiere presente
 Je n'ay rien que ie vous presente,
 Sinon ce vostre immortal Liure,
 Lequel pour lire ie vous liure,
 Par tel si, que le me rendrez,
 Et mes faultez y reprendrez:
 Mes faultes (dis ie) d'escriuain,
 Qui fais souuent maint escript vain:
 Car leans la mienne escripture
 Faiçt grand tort à vostre facture:
 Mais du tout me corrigeray,
 Quand temps, loysir, & lieu i'auray.

D'une Mule, qu'on me noit uendre.

La Mule de Monsieur porte vn chappeau de paille,
 Dont chascun dict ainsi: C'est vn signe d'art gēt:

m 3 Car

*Car il fault que vrayment Madame rien ne vaille:
Ou que, sauf vostre honneur, Monsieur n'ayt point
d'argent.*

*Epigramme. Sur un ouurage de Mousches
à miel, attaché à un Couldrier.*

*C'est vn Couuent, ou Republique,
De Mousches moult ingenieuses,
Lesquelles ne sont point oysseuses,
Car chascune au labour s'applique.*

De z, & s. A ses Disciples.

*Vous auez tousiours s, à mettre
A la fin de chesque plurier,
Sinon qu'il y ayt vne lettre
Crestee au bout du singulier:
Et quand e, y ha son entier,
Bonté vous guide à ses Bontez:
Si vous suyuez autre sentier
Voz bonnes notes mal notez.*

*Sur l'Eglogue faicte par Claude le
Maistre, Lyonnois.*

*O douce Niece tant requise,
La ioye qui m'est aduenue
A ta plus qu'heureuse venue,*

En vers

En vers ne peult estre comprise:
 Veu que les Vers, selon leur guise,
 Tousiours veulent qu'on les mesure,
 Et ma ioyè passe mesure.

A Antoine du Moulin, Masconnois.

Rosne mignon, qui Saone, & Sorgue meines,
 Et qui du pere, & du filz gentement
 Vas arrosant les deux amples domaines,
 En diuisant leurs confins iustement,
 Soit donc tesmoing ton beau tiers bastiment,
 Non loing duquel Laure ha sa sepulture,
 Que ceste poure & lasse creature,
 En s'en allant, comme chose sans nom,
 Ie ne sçay ou, chercher son aduenture,
 Ha rencontré vn amy de renom.

De la Royne de Nauarre.

A quoy tient il, qu'il y ha si grand' presse
 De gens ceans, qu'on ne se peult tourner?
 Ilz viennent veoir (ce croy ie) ma Maistresse,
 Et pour l'ouyr ayment bien seiourner:
 Ouy, mais, i'en voy plusieurs se prosterner
 Pour luy parler: dont me fait souuenance
 De Athena, qui par bonne ordonnance
 Veult essayer vn chascun professeur:

Mais quelcun diët que (veu la contenance)
Elle ressemble vn bien bon Confesseur.

Enuoy. Par Iacqueline de Stuard,
Lyonnoise.

O quel effort cruel, & dangereux,
Quand contre Amour, Amour faiët resistance!
O que celuy est vrayment malheureux,
Qui contre soy ha soy mesme en deffense!
Ie sens en moy ceste grand' violence
Estant contrainte à autre m'adresser:
Mais qui pourroit de cela me presser,
Veu que changer n'est point à mon usage?
Amour luy mesme, il le me faiët laisser
Pour me venger de son tort, & oultrage,

Responce.

Le cueur qui diët qu'à changer le contrainët
Contraire Amour, d'Amour n'a congnoissance,
Car qui bien ayme, à bien aymer s'astrainët,
Doubtant d'Amour la cautelle & puissance.
Il est si fin ce Dieu de Iouyissance,
Que comme il sçait par semblans attrapper,
Ainsi il fainët de laisser eschapper
La Froye, à fin d'esprouuer sa constance:
Mais s'elle cuyde en fin s'emanciper,
Il ha pour elle assez de resistance.

A la

A la Dame Penelope.

Vrayment, puis que ie m'en aduise,
 Bailler vous veulx vne deuise
 De trois lettres tant seulement,
 Que vous pourrez facilement
 Painsdre par tout ou vous voudrez.

T, & d, assez pres ioindrez,
 Dont les deux boutz esgaulx seront:
 Puis les couplez d'un O, bien rond
 Le tout en vne espere ronde:
 Il n'est pas possible en ce monde,
 Penelope, ie vous assure,
 En inuenter vne meilleure,
 Ne qui plus vostre esprit contente,
 Veul la fortune, & longue attente
 D'Ulixes, dont le souuenir
 Vous faiçt ia vieille deuenir.

CHANSON. A Claude Beçtone,
 Daulphinoise.

SI Amour n'estoit tant volage,
 Sou qu'on le peust veoir en tel aage,
 Qu'il sceust les labeurs estimer,
 On pourroit bien sans mal aymer.

Si Amour auoit congnoissance
 De son inuincible puissance,

- Laquelle il oyt tant reclaimer,
 On pourroit bien sans mal aymer.
- Si Amour descouvroit sa veüe
 Aussi bien qu'il faiçt sa chair nuë,
 Quand contre tous se veult armer,
 On pourroit bien, sans mal aymer.
- Si Amour ne portoit les fleches,
 Dont aux yeux il faiçt maintes breches
 Pour en fin les cueurs consommer,
 On pourroit bien, sans mal aymer.
- Si Amour n'auoit l'estincelle,
 Qui plus couuerte, & moins se celle,
 Dont il peust la glace enflammer,
 On pourroit bien, sans mal aymer.
- Si Amour, de toute coustume,
 Ne portoit le nom d'amertume,
 Et qu'en soy n'eust vn doux amer,
 On pourroit bien, sans mal aymer.

Responce.

- Si chose aymee est tousiours belle,
 Si la beauté est eternelle,
 Dont le desir n'est à blasmer,
 On ne sçauroit que bien aymer.
- Si le cueur humain qui desire,
 En choisissant n'a l'œil au pire,

Quand

Quand le meilleur ſçait eſtimer,
 On ne ſçauroit que bien aymer.
 Si l'eſtimer naiſt de Prudence,
 Laquelle connoit l'indigence,
 Qui faiçt l'amour plaindre & paſſer,
 On ne ſçauroit que bien aymer.
 Si le Bien eſt choſe plaiſante,
 Si le Bien eſt choſe duſante,
 Si au Bien ſe fault conformer,
 On ne ſçauroit que bien aymer.
 Brief, puis que la bonté benigne
 De la ſapience Diuine
 Se faiçt Charité ſurnommer,
 On ne ſçauroit que bien aymer.

Chanſon.

Par ton regard tu me fais eſperer,
 En eſperant, my conuient endurer,
 En endurent ne me fault ia complaindre,
 Car la complaincte ne peult mon mal eſtandre:
 Mais du danger, ſeul me peulx retirer,

Chanſon.

Par ton parler me fais en toy fier,
 En m'y fiant ne me dois ſoucier:
 Se ſouçiant, on ne faiçt rien que craindre,

Et par

R O N D E A V L X.

*Et par la crainte on peult la Foy enfraindre:
Or ie ne veulx de toy me meffier.*

Chanfon.

*Par ton amour, tu m'apprens à aymer,
En bien aymant, de nul mal eftimer:
En eftimant du grand comme du moindre,
Et moins n'entendz ie en Charité me feindre
Vers mon Prochain, lequel me vient blasmer.*

R O N D E A V L X.

A la Royne de Nauarre.

*Trop plus qu'heureux, ie fuis par vous, Princeffe,
Car mes foucys langoureux ont prins cefse,
Puis qu'il vous plait pour vofre m'aduouer:
I'en rithmeray donques, fans m'enrouer,
Iufques à tant que vous me difiez cefse.*

*Ie ne craindray plus Ennuuy, ne Dreffeffe,
Puis que Dieu m'a donné telle Maiffreffeffe,
Dont ne l'en puis iamais affez louer,
Trop plus qu'heureux.*

*Si vous trouuez en moy d'efcrire adreffeffe,
Si me gardez du peché de pareffeffe,
Et que ie n'aye appetit de iouer:*

Car

Car au labeur me veulx du tout vouer
 Pour mieulx seruir à la vostre Noblesse.
 Trop plus qu'heureux.

A ladiète Dame.

Ce m'est assez, en vous tresbien seruant,
 Si i'acquier nom de fidele Seruant,
 Plus tost d'effect, que non pas de langage:
 Acheuez moy l'Euangelique gage,
 Qui est auoir la vesture en viuant.

La vestu m'a, pour son propre escriuant,
 Vostre bonté que ie vois obseruant:
 Donnez moy lieu pour vacquer à l'ouurage,
 Ce m'est assez.

Ayant seruy plusieurs par cy deuant,
 Ou i'ay esté Indigence esprouant,
 Tant qu'on disoit, Cestuy là perd son aage:
 Dieu maintenant, d'un Royal personnage,
 Face que sois la grace desseruant:
 Ce m'est assez.

A Benoit Baumet, Lyonnois.

En Court, pour le beau premier soir,
 Couché fuz comme en vn pressoir,
 En lict bien autre que de plume,

*Vn petit plus dur qu'une enclume,
On le peult sentir à s'y seoir.*

*Mais sans rien m'en appercevoir,
De dormir ie feis mon deuoir,
Non obstant la neufue coustume
En Court.*

*Il ne m'en doit gueres chaloir,
Ie n'en puis de rien pis valoir,
Ainsi que i' espere, & presume:
Le temps passé ie ne ressume,
Car d'endurer i' ay bon vouloir,
En Court.*

*A Matthieu de Quatre, de la
Mastre.*

*Les Aueugles, & Violeurs,
Pour oster aux gens leurs douleurs,
Chantent tousiours belles chansons:
Et toutesfois par chantz, & sons,
Ilz ne peuuent chasser les leurs.*

*Ce qu'ilz chantent en leurs malheurs,
Ilz ayment mieulx que les couleurs,
Ou moins qu'enfans longues leçons,
Les Aueugles.*

En chantant ilz pensent ailleurs,
 Mesmement aux biens des bailleurs,
 Autrement, chantz leurs sont tençons,
 Et n'en prisent point les façons
 Si leurs Bissacz n'en sont meilleurs,
 Les Aueugles.

A la Roync de Nauarre.

Pour passetemps, donc, de vostre licthiere
 Regarderez ceste triste matiere,
 Du corps de CHRIST seconde passion,
 Dont vous prendrez grande compassion,
 Quand l'aurez veüe, & leute toute entiere.

C'est Poureté, de langueurs courratiere,
 Et de la croix, de CHRIST, vraye heritiere,
 Qui vous faiçt cy sa supplication,
 Pour passetemps.

Elle ha espoir, la poure irreguliere,
 Considerant la bonté singuliere
 Qui est en vous, qu'a sa profession
 Ferez donner quelque perfection,
 Vous le pouez, Sœur du Roy familiere,
 Pour passetemps.

A la

A ladicte Dame.

Loysir, & Liberté,

C'est bien son seul desir:

Ce seroit vn plaisir

Pour traicter Verité.

L'esprit inquieté

Ne se faict que moysir.

Loysir, & Liberté:

S'ilz viennent cest esté,

Liberté, & Loysir,

Ilz la pourront saisir

A perpetuité,

Loysir, & Liberté.

C A R E S M E P R E N A N T,

En Taratantar 4.

Caresmeprenant, c'est pour vray le Diable,

Le Diable d'enfer plus insatiable,

Le plus furieux, le plus dissolut,

Le plus empeschant la voye de salut

Que Diable qui soit au profond manoir,

Ou se tient Pluton, ce Roy laid, & noir:

C'est le desbaucheur des malings espritz,

Qui soubz forte main sont liez, & pris.

Tous ses cōpaignons ia meschants d'eulx mesmes,

Enhorte,

Enhorte, & semond à tous mauulx extremes.
 Eacus, Minos, & Rhadamantus
 Iuges Infernaulx du tout se sont teulx,
 Quand de loing ont veu Caresmeprenant,
 Ce gros diable là, grand à l'aduenant,
 Qui les inuitoit à tous griefz exces,
 A vuyder les potz, non pas les proces.
 Tisiphone lors ha baillé les champs,
 Et ha suspendu la peine aux meschans,
 Lesquelz pour si peu qu'ilz sont relaschez,
 Retournent encor à leurs vieulx pechez.
 Elle, pour fournir mieulx aux beuueries,
 S'en va amasser toutes les Furies,
 Auec Lachesis, Clotho, Atropos,
 Qui ont bon vouloir à vuyder les potz:
 Tantalus y court, à fin qu'il desieune,
 Et mauulgré les Dieux, il rompt son long ieusne.
 L'oyseau qui le cueur à Titius mange
 S'en est enuolé, craingnant la reuenge:
 Puis il congnoist bien que de chair n'a pas.
 Asez pour fournir à vn tel repas.
 Sisyphus se paist, & prent ses esbas,
 Sans aller querir sa grand' pierre en bas.
 Ixion lié en rouë tournant,
 S'estant arre, té boit à tout venant.
 Brief, les Enfers sont sans reigle, ne frain,

CARESMEPRENANT.

Par ce Diable là, qui les met en train:
 Charon le Naucher hydeux, & sauvage,
 En se reposant boit sur le riuage,
 Et ne pensez pas, non, que ce soit eau,
 Car de s'appuyer ne veut son batteau,
 Qui est soustenu par eau sale, & trouble:
 Il ayme bien mieulx du vin voire, au double.
 Qui luy bailleroit des anniuersaires
 Tout le reuenu, & des mortuaires,
 Il ne passeroit point celle iournee
 De qui que ce fust, nulle ame damnee.
 Dueil s'est esbaudy, & de rage court,
 Auec les Soucys, en la basse court:
 Crainte à tous forfaitz, & maulx, s'enhardit:
 Poureté ayant trop si se gaudit:
 Faim prent les morceaulx que macher ne peut,
 Et comme d'estœufz esbattre s'en veut.
 Caresmeprenant, qui ne quiert qu'à mordre,
 Par sa faction met tout en desordre:
 Et ayant esmeu ainsi les Enfers,
 Tous ces Diabletons en chaines, & fers,
 Cà hault ha mené, en cestuy sot monde,
 Pour leur faire veoir vn triumphe immunde,
 De meschanceté vn vif exemplaire,
 Lequel onc ne peut aux Vertueux plaire.
 Lors poures Humains (las) trop curieux,

Veulent

Veulent imiter ce tant furieux
 Diable folloyant: ilz le contrefont,
 Et se vont ventans, que vrayment ilz font
 Caresmeprenant, ilz font donc le Diable?
 Aussi le font ilz, tant soit amyable
 La vieille façon. Et la Quarantaine
 Qui s'en vient apres n'est point tant certaine
 De tous les biens faictz qu'elle entreprend faire,
 Qu'à tous ces maulx là puisse satisfaire,
 Lesquelz en ce iour on commet sans crainte;
 Ou ses biens sont faictz, souuent par contraincte.
 Peult vn bien forcé vn mal volontaire
 Purger deuant Dieu? Je ne m'en puis taire:
 Chascun à ce Iour de riffler s'efforce,
 Aux autres suyans on ieune par force,
 Ou à tout le moins on faict abstinence,
 Ou si vous voulez on faict contenance:
 Et n'ose iuger, de ma phantasie,
 Qu'on face telz biens sans hypocrisie:
 Mais ie suis certain, qu'elle n'a point lieu
 Aux actes commis ce iour deuant Dieu,
 Qui ne partent point sinon d'un vain cueur
 Caresmeprenant en estant vainqueur.
 A fin donc que pis il ne nous aduienne,
 Requerons à Dieu, que plus ne reuienne

*Ce qui est tous maulx au monde apprenant,
Ce Diable mauldict Caresmeprenant.*

A la Royne de Nauarre.

*Si i'ay faict Caresmeprenant,
Il vous plaira me pardonner,
Car veu que ie suis apprenant
M'y ha faillu ma part donner:
Il vous ha pleu de m'ordonner
Pour vostre Poësie escrire,
Ie m'y deuois mieulx addonner,
Mais il failloit à ce Iour rire.*

F I N.

T O V T A V N.

L'IMPRIEUR

A V X I M P R I -

M E V R S .

*




I chascun de nous taschoit, pour l'ampliment & perfection de nostre art, de faire de mieulx en mieulx, & non corrompu de l'esperance du gaing, d'aller par la trace d'autruy, nous n'aurions si mauuais bruyt aujourd'huy que nous auons, de faire ouuraiges incorrectz. l'entens, pour mieulx le vous declairer, que nous sommes si adonnez au profit indeu, que incontinent que l'un de nous ha mis quelque belle œeuure en auant, il est par l'autre incontinent refaiçt. Refaiçt (dis ie) le plus souuent avec mille faultes : & à ce moyen demeure celuy qui en auoit premieremēt prins la peine frustré de son labeur, pour autant qu'en vendāc les meschans ouuraiges, ne se expedient les bons, à cause du vil pris ou accourent les indoctes, ne sachans que c'est. Et le pis que ie y voy. c'est que la faulte aduient aux liures nouveaulx le plus souuent : desquelz à iuste cause celuy qui premier les met en lumiere deuroit retirer le profit, sans y estre retardé ny empesché. Donc, quant à moy, i'ay delibéré de tenir en mon imprimerie ceste mode, qu'il n'y sera imprimé aucun liure nouveau, qui ayt esté premierement imprimé par autre, que premier celuy n'ayt retiré le loyer & profit de ses peines & despenses, Si prie tous autres de nostre art qu'ilz

veulent tenir ceste façon de faire, & l'observer diligemment, attendu que ce sera bien fait, & cause que chascun aura les gaingz & profitz comme il appartient.

*

AV LECTEUR

Saches que ayant imprimé ce que tu vois de Bonaventure, ay recouuré depuis plusieurs choses, entre lesquelles sont les Brandons, Mycareme, Pasques Flouries, Pasques, Quasimodo, & autres plaisantes choses dignes d'estre veues, lesquelles avec l'ayde de Dieu, i'espere te donner à la seconde edition, ce oque i'eusse faict à present n'eust esté que elles ne sont pas encores mises au net.



628. Voy. le Dict. Bibliogr.

